



## Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ  
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial  
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով  
ձևափոխել կամ օգտագործել առկա նյութը ստեղծելու համար նորը

You are free to:

**Share** — copy and redistribute the material in any medium or format

**Adapt** — remix, transform, and build upon the material



891.99-82

9-82

Handwritten text in a cursive script, likely Georgian, consisting of a single line of characters.

Large, stylized, blocky characters, possibly representing a title or decorative element in a specific script.

221





ՏՊԱՐԱՆ „ՄԱՄՈՒԼ“ — ՏՆՕՐԷՆՆԵՐԻ Մ. ԷՓՐԻԿԵԱՆ ԵՒ Յ. ՄԱՅԻԼԵԱՆ



# Յովհ. Թումանյանին

Նրա ծննդեան 50-ամեակի առիթով:



1701 4-3.

2126-55





## ՎԱՅԱՆԻ ՑԱԻՐ

Ամսից աւելի էր Քանանեանների տանը արտասովոր անհանգստութիւն էր տիրում: Անհանգիստ էին բոլորը — թէ ընտանիքի հայրը՝ մօտ վաթսուն տարեկան այդ ալեգարդ փաստաբանը, թէ նրա ծերացող կինը՝ տիկին Աննան, թէ նրանց ջահել աղջկերքը՝ զոյգ կեչիների պէս բացւած այդ կենսաթրթիռ օրիորդները, և թէ գեղջկուհի պառաւ աղախինը: Եւ դա սովորական անհանգստութիւն չէր. պ. Քանանեանը կարծես ծերացել էր մի քանի տարով. օրերով նա քաշւում էր իր առանձնասենեակը և անձնատուր լինում տխուր խոհերի. տիկին Աննային յաճախ տեսնում էին միայնութեան մէջ լաց լինելիս, իսկ օրիորդները — այդ մշտաժպիտ, խնդամուկ աղջկերքը — դարձել էին զարմանալի զգաստ ու խոհուն, կարծես մէկը մի ծանր նախատինք էր տւել նրանց: Խեղճ աղախինը հօ այնպէս էր կորցրել իրեն, որ կերակուրները կամ աղի էր անում կամ ալանի: Խոհանոցի մօտով անցնողը միշտ կարող էր լսել նրա այս խօսքերը. «Տէր, Քո դուռը բանաս, մինուճար է»...



Այս ընդհանուր անհանգստութեան պատճառը Քանանեանների միակ որդի Վահանի հիւանդութիւնն էր, մի հիւանդութիւն, որ միանգամայն անհասկանալի էր մնում շրջապատողներին: Քսանեօթ տարեկան մի գունատ, շատ գունատ երիտասարդ էր Վահանը—կարճահասակ, ծայրերը կտրած բարակ բեղերով և խոշոր մտախոհ աչքերով, որոնք երբեմն ստանում էին այնպիսի արտայայտութիւն, որ թւում էր թէ մի թագուն հուր է վառւում նրանց մէջ: Օտարոտի բան էր թւում սակայն նրա հիւանդութիւնը:—Բնում, ելնում, դատում և խօսում էր Վահանը, ինչպէս ամեն մի առողջ մարդ, բայց երբեմն, —շաբաթը մի կամ երկու անգամ,—երկար կանգնում էր նա որևէ մի տեղ և անշարժ, անթարթ աչքերով նայում մի կէտի, ու մէկ էլ յանկարծ ցնցւում ահաբեկ, տևական մի սարսուռով, յաճախ ինքն իրեն խօսելով. իսկ լայն բացւած աչքերը վառւում էին բոցավառ մի փայլով: Թւում էր թէ նա պատրաստւում է յարձակւել մէկի վրայ կամ պաշտպանւել—ու չի կարողանում անել ոչ մէկը, ոչ միւսը... Այս ցնցումները պատահում էին թէ ցերեկ և թէ գիշեր ժամանակ: Եւ Քանանեաններն ուղղակի չգիտէին ինչ անել, չգիտէին ինչ է իրենց որդու իսկական ցաւը:

Մի ամիս առաջ Վահանին բերել էին Մոսկւայից այդ հիւանդութիւնը հետը: Բերող ընկերը պատմել էր, որ պատերազմի սկզբում իրեն ու Վահանին՝ իրաւագիտական մասնաճիւղը աւարտելուն պէս՝ վերցրել էին իբրև սպաներ և տարել գերմանական սահմանը կռիւ: Ծնողներն այդ գիտէին: Վեց ամիս ճակատում մնալուց յետոյ սակայն Վահանը սրով վիրաւորւել էր թևից և բժշկութեան համար տարւել Մոսկւայի զինւորական հիւանդանոցներից մէկը, ուր և նրա վէրքը առողջացել էր բոլորովին: Քանանեաններն այդ ևս գիտէին: Բայց ինչ էր



իսկապէս որդու հիւանդութիւնը—Վահանին բերող ընկերը ուսերն ու յօնքերը վեր էր քաշում միայն. նա ինքը ոչինչ չգիտէր, իսկ հիւանդանոցի բժիշկներն ասել էին, որ դա թեթեւ ջղացաւ է և հայրենիքում կանցնի:

Բայց ամսից աւելի էր անա նա հայրենիքումն էր և հիւանդութիւնը չէր անցնում... Տեղական բժիշկները նոյնպէս այն կարծիքի էին, որ դա շուտով կանցնի, և որ լաւ կը լինի ամառը գալուն պէս Վահանին տանել ամառանոց, ուր՝ բնութեան գրկում՝ ամեն ինչ պիտի անցնէր. իսկ առ այժմ—քանի ձմեռ էր—խորհուրդ էին տալիս զբաղեցնել Վահանին հաճելի ու զլարճալի երևոյթներով. տանել զբօսանքի, կրկէսներ, ուրախ կոմեդիաների ներկայացման և, վերջապէս, ամենալաւագոյն միջոցը—կարդալ ուրախ գրքեր... Մի խօսքով, բոլոր բժիշկների կարծիքը գրեթէ մէկ էր. հանգստութիւնն ու հաճելի մթնոլորտը կը բուժի Վահանին:

Ու Քանանեաններն ամբողջ տնով աշխատում էին ստեղծել այդ մթնոլորտը. մայրն ու քոյրերը յաճախ Վահանին տանում էին կրկէս, ցերեկայ ուրախ ներկայացումներին, արև օրերը շրջում էին հասարակաց այգում, իսկ մեծ մասամբ քոյրերը փոխէ-փոխ կարդում էին զաւելչտական գրքեր և աշխատում էին ծիծաղել ամեն մի նախադասութեան, նոյնիսկ ամեն մի խօսքի վրայ, որ ծիծաղ բերեն և Վահանի դէմքին: Վահանը սակայն բոլոր ժամանակ մնում էր անտարբեր, իսկ եթէ երբեմն միայն ժպտում էր—այդ վայրկեանները Քանանեան ընտանիքի համար դառնում էին տօն. ծնողները հրճւում էին, խանդաղատում, քոյրերը զոյգ թիթեռների պէս թրվում եղբօր շուրջը, և բոլորը միասին ժպիտներով, ակնարկներով ու շարժումներով խնդակցում իրար... Բայց դրանք վայրկեաններ էին միայն, որ ոչինչ չէին փոխում: Վահանի ցաւն այնուամենայնիւ կրկնւում էր առաջւայ պէս:



Մի գիշեր, սարսուռով բռնւած միջոցին, նա ձեռքը բռունցք շինած, անկողնի մէջ նստելով՝ գոռաց ուսերէն.

— He смѣй!

Մայրը (որ որդու հիւանդութեան պատճառով նրա սենեակումն էր քնում) գիշերւայ շապկով վեր թռաւ տեղից սարսափահար.

— Ի՞նչ է, Վահան ջան, ի՞նչ է:

Մօր ձայնը կարծես զգաստացրեց Վահանին. նա լարւած ձեռքը իջեցրեց և գլուխն ուսին թեքելով՝ հառաչեց.

— Ի՞նչ է, Վահան ջան, — կրկնեց մայրը անհանգիստ. — ո՞ւմ էիր ասում. այդ ո՞ւմ հետ էիր խօսում:

— Ուզում է ինձ խփել, — արտասանեց Վահանը հեացող ձայնով, աչքերը սենեակի դրանը յառած. — կարծում է քնած եմ...

Մայրը բան չէր հասկանում. նա նայեց դէպի դուռը. այնտեղ ոչ-ոք չկար:

— Ո՞վ, Վահան ջան. ո՞վ էր ուզում խփել. ո՞վ է կարծում...

Վահանը նայեց մօրը և լռեց. իսկ այնուհետև մայրը որքան հարց ու փորձ արաւ — նա բան չխօսեց. ուստի ենթադրելով, որ որդին խօսում է երազի մէջ, դադարեցրեց իր հարցերը և նորից մտաւ անկողին՝ մի ծանր հառաչանքով:

Մի ուրիշ անգամ սակայն Վահանը մի այնպիսի բան արաւ, որ բոլոր տնեցիներին զարմացրեց:

Ջրօրհնէքի տօներէից յետոյ էր այդ:

Մի ցուրտ առաւօտ քաղաքապահ ոստիկանը ինչ-որ մի թուղթ էր բերել պ. Քանանեանին և, պատասխանի սպասելով, շինելի օձիքն ականջներին քաշած, թուրը կողքից կախ, ցրտից կարմրած դէմքով, այտերն ուռցնելով՝ իր բարձր հասակը պտտում էր պատշգամբում և ժամանակ առ ժամանակ՝ գիւղացիներին յատուկ հետաքրքրութեամբ՝ լուսամուտներից նայում ներս:



Վահանը, որ այդ ժամանակ մօր և մեծ քրոջ հետ իր սենեակումն էր—ոստիկանին տեսնելով—յանկարծ գուհատուեց և նստած տեղից ցատկեց դէպի լուսամուտը՝ ուստերէն գոչելով.

— Հեռո՛ւ, հեռո՛ւ...

Ոստիկանը շարած կանգ առաւ և նայեց Վահանին:

— Հեռո՛ւ,— կրկնեց Վահանը այս անգամ ոտից մինչև գլուխ դողալով և բռունցքը ոստիկանի վրայ թափ տալով:

Մայր ու աղջիկ բռնեցին Վահանին:

— Ի՞նչ ես ուզում, Վահան ջան, ի՞նչ ես ուզում. նա հայրիկի համար թուղթ է բերել,—ասին նրանք միասին:

Զգալով որ ձեռները բռնել են, Վահանը կարծես զինաթափուեց և սկսեց հեռալ:

Ոստիկանը կանգնած տեղը շարունակում էր ապուշի պէս ժպտալ: Տիկին Քանանեանը ձեռքով նշան արաւ նրան հեռանալու. և երբ ոստիկանը հեռացաւ, յիմար մէ՛ ժպիտ դէմքին, նա դարձաւ որդուն.

— Ի՞նչ կարծում ես նա գող է, Վահան ջան. չէ. նա հայրիկի համար ինչ—որ թուղթ է բերել ստորագրելու...

Վահանը մի վայրկեան յոգնած հայեացքով նայեց մօրը, ապա ճակատը բռնելով՝ զրեթէ ընկաւ գահաւորակի վրայ ու լաց եղաւ՝ ուսերը ցնցելով:

Տեսնելով այս ամենը՝ Քանանեանները կորցրին իրենց հաւատը դէպի բժիշկները և իրենց ամբողջ յոյսը դրին ամարանոցի վրայ. ամառը գայ՝ ընտանիքով կը փոխադրուեն Դիլիջան:

— Հէնց մայիսին,—ասում էին աղջկերքը:

— Այո, ի հարկէ, մայիսին,—պատասխանում էին ծնողները:

Դիլիջանը նրանց մշտական ամարավայրն էր. նրա



անուներ Քանանեանների սրտում զարթեցնում էր միշտ քաղցր յիշատակներ—եղևնիների բուրմունք, ջրերի աղմուկ, հաւքերի երգը անտառի թաւուտում. նորից յիշում էին նրանք արահետները ելևէջ, ուղիները օձաձիգ, փրրփրրած կաթը կովի տակ, ճաշը՝ ծառերի հովանու ներքոյ—ու մի անձառ հիացում՝ յոյսերով, սպասելիքներով համակում էր նրանց հոգին և նրանք մտածում էին, որ Դիլիջանում Վահանն անպատճառ կառողջանայ, անպատճառ. թո՛ղ մի մայիսը գայ...

\*  
\* \* \*

Բայց մայիսը հեռու էր տակաւին: Ուստի Քանանեանները, թէև յուսահատուած բոլոր բժիշկներից ու խորհուրդներից, այնուամենայնիւ սկսեցին զւարճութեան էլի նոր աղբիւրներ որոնել Վահանի համար. թերևս ամեն ինչ կորած չէ, գուցէ էլի մի բան կարելի է անել մինչև մայիս,—մտածում էին նրանք: Եւ մեծ եղաւ նրանց ուրախութիւնը, երբ մի օր լրագրում կարդացին, որ քաղաքում բացուած է ճոխ ցուցահանդէս, որին մասնակցում էին յայտնի նկարիչներ: Գրւածքի վերջում ասուած էր. «Մտնելով պատկերասրահը՝ մարդ մոռանում է շրջապասն իր ցաւերով և փոխադրւում է բնութեան կենսատու գիրկը»: Այս մի քանի խօսքը նոր պայծառ յոյսեր վառեցին Քանանեան ընտանիքում: Կարծես փրկութեան դուռը բացւել էր. բոլորը ձեռք ու ոտք ընկան. —Պէտք է գնալ, պէտք է Վահանին տանել, որոշեցին նրանք և որոշումը յայտնեցին Վահանին: Վահանը համաձայնեց.

— Այո՛, գնանք, — ասաւ նա ևս փոքր ինչ ուրախացած, — վաղուց է ես ցուցահանդէս չեմ տեսել:

— Եթէ լաւ լինի, մամա, մի քանի անգամ կերթանք, — ասին աղջկերքը:



Մայրը հաւան կացաւ այդ մտքին.

— Ինչո՞ւ չէ, ինչո՞ւ չէ. կարելի է:

Եւ իսկոյնեթ պատրաստութիւն տեսան գնալու:

Մայրը՝ չմրսելու. համար՝ հագաւ թեքերն ու օձիքը ճագարի մորթով եզերած ու բամբակած աստառով տաք վերարկուն, խոր կալօշները. քոյրերը՝ չնայած մօր յորդորներին, կալօշներից հրաժարուեցին, թէ ոտները մեծացնում է, բայց նոյնպէս հագան տաք վերարկուները և վերցրին գառան մորթուց մուֆտիները: Որովհետև այդ օրը սովորականից ցուրտ էր, Վահանին հագցրին հայրիկի մեծ, երկար վերարկուն լայնադարձ օձիքով, և երբ փողոցում քամու պատճառով այդ օձիքը բարձրացրին—Վահանի գլուխն աներևոյթացաւ նրա մէջ, այնպէս որ ետևից նայողին թւում էր թէ փողոցով քայլում է վերարկուն:

Քոյրերը ծիծաղեցին: Վահանը ժպտաց, և բոլորը միասին ուրախացան. սա լաւ նշան է, լաւ տրամադրութիւնը կարող է լաւ հետևանք ունենալ,—մտածեցին:

Պատկերասրահը երկրորդ յարկումն էր: Մարմարէ ցուրտ աստիճաններով բարձրացան վերև, գնեցին չորս տոմսակ, մի պատկերացուցակ և մտան սրահը:

Բարձր, լուսաւոր ու ընդարձակ դահլիճի ամբողջ չորս պատն էլ զարդարւած էին բազմաթիւ մեծ ու փոքր նկարներով. եռօտանի կլորիկ պատուանդանների վրայ դրւած էին գաճէ անդրիններ և խաղատիկնիկներ չափ փոքրիկ արձաններ: Այցելուները խումբ-խումբ ու մեկուսի դահլիճում ցրւած, ցուցակները ձեռներին, հեռանալով ու մօտանալով՝ եռանդուն աչքերով դիտում էին նկարները. ոմանք դիմում էին ակնոցի ու դիտակի օգնութեան: Հերթապահ նկարիչը, երիտասարդ, բայց արդէն ճաղատ գլխով մի պարոն, սպիտակ զօլաւոր մեծ բանտը վզին, անկիւնում նստած լրագիր էր կարդում:

Քանանեանները դիտել սկսեցին դրան մօտից:



Առաջին նկարը լճափ էր՝ խիտ եղեգնուտով. ձկնկուլ-  
ները մի ոտի վրայ կանգնած, երկար ու սուր կտուցները  
կախ, կարծես միտք էին անում. ջրերն ասեղնոտում էին,  
խոկ եղեգնուտը թւում էր թէ շրշուն է արձակում այդ  
վէտ-վէտող ջրերի քով:

Նկարը դուր եկաւ նրանց:

— Ի՞նչ սիրուն է, — ասաւ Վահանը հիացած:

— Այո՛, շատ, — պատասխանեցին քոյրերն ուրախա-  
ցած ոչ այնքան նկարի համար, որքան եղբօր լաւացած  
տրամադրութեան:

— Միւսներն աւելի լաւն են, Վահան ջան, — աւե-  
լացրեց մայրը որդու տրամադրութիւնն աւելի բարձրա-  
ցնելու նպատակով:

Մօտեցան միւսներին: Եւ իրաւ. դրանք մէկը միւսից  
գեղեցիկ էին: «Կեչիների անտառը» հիացրեց նրանց,  
«Բեռնակիրն» իր իրական գծերով՝ զարմանք պատճառեց,  
«Չինարկուտը» յիշեցրեց Դիլիջանը, «Ակրօպօլը»՝ յունաց  
պատմութիւնը, «Ախուրեանը»՝ Անին. Չիւնակատար «Ա-  
րարատի» առջև նրանք ցուրտ զգացին, բայց «Արաքսի  
հովիտը»՝ արևի ոսկեղէն շողերով ողողւած, ջերմութիւն  
հաղորդեց նրանց:

Երկրորդ պատի կտաւներն աւելի շատ էին: Բնու-  
թեան տեսարաններին այստեղ գերիշխում էին կեանքի  
պատկերները: Առաջին կտաւը ներկայացնում էր մու-  
րացկանները, երկրորդը՝ զբօսավայր—մանուկներով ու  
սպասուհիներով լիքը: Քանանեաններն անտարբեր անցան  
սրանց մօտով և կանգ առան երրորդ կտաւի առաջ, որը  
ցուցակի մէջ կոչւում էր «Վրէժ»: Ահագին մի նկար էր  
դա ոսկէ շրջանակի մէջ, որի փայլը խիստ հակադրութիւն  
էր կազմում պատկերի գորշ ֆօնին, տալով նրան մռայլ  
ու անհրապոյր տեսք: Կտաւը ներկայացնում էր ահաւոր  
ու մթամած մի կիրճ, ուր սպառազէն մի երիտասարդ՝



անհուն հրճանք ու հպարտանք իր հայեացքում՝ կանգնել էր կանաչների վրայ փուլած դիակի մօտ և իր աջ ոտն ու արիւնաթաթաւ սրի ծայրը դէմ տւել նրա կրծքին: Սպանւածի շորերը թարմ արիւնոտ էին, գլուխը բաց, անօգնական ընկած: Երևում էր երիտասարդը վրէժխնդիր է եղել նրան և այժմ ցնծութեան մէջ է, անասնական այն ինքնագոհ վիճակում, որ ուռեցնում է մարդու կուրծքը և հուր է վառում նրա աչքերում: Երիտասարդի ինքնագոհ արտայայտութիւնն այնքան յախուռն էր սպանւածի անմեղօրէն ընկած գլխի հանդէպ, որ տիկին Քանանեանը բարձրաձայն իր կասկածը յայտնեց պատկերի իրական լինելու մասին:

— Այսպիսի բան չի կարող լինել, — ասաց նա գլուխը շարժելով. — Սա հնարովի բան է:

— Ինչո՞ւ է հնարովի, — առարկեցին քոյրերը, որ միշտ աշխատում էին մօրից հասկացող երևալ: — Այսպիսի բան միշտ էլ կարող է լինել:

— Որ մարդ սպանեն ու ոտն էլ դնեն դիակի վրայ — հեգնեց տիկին Աննան. — Սա նկարչի երևակայութիւն է, ուրիշ ոչինչ!

— Բայց և այնպէս լաւ է նկարւած, — ասին քոյրերը միասին:

Մայրը քիթը վեր քաշեց.

— Իհն...

— Մամա, դու բոլորովին մեղչանական ճաշակ ունես, — նկատեց փոքր աղջիկը:

Տիկին Քանանեանը խէթեց:

— Իսկ դուք — արիստօկրատ! Ինչպէս չէ!...

Եւ մայր ու աղջիկ սկսեցին վիճել, առանց Վահանին նայելու, որ բոլոր ժամանակ լուռ էր և երբ դիմեցին նրա օգնութեանը խնդիրը պարզելու, նրանք սարսափեցին — այնքան վայրենի կատաղութիւն, վախ և ատելու-



Թիւն կար այդ բոլորէն վահանի աչքերում: Նա՛ գոյնը գը-  
ցած, դողում էր. հրաբորբոք աչքերը խաղում էին իրենց  
բներում:

Տիկին Քանանեանը վախեցաւ. այդ բոլորը վահանի  
հիւանդութեան նշաններն էին: Եւ առաջին միտքը, որ ծա-  
գեց մօր ու քոյրերի գլխում—այն էր, թէ հիւանդութիւնը  
«կրկնւում է», ուստի և մայրն շտապեց որդու ձեռները  
բռնել:

— Գնանք, վահան ջան, գնանք,—ասաւ՝ որդու ձե-  
ռից քաշելով:

Վահանը՝ իր երկար ու մեծ վերարկուի մէջ՝ տեղից  
չշարժւեց. նա շարունակում էր նայել պատկերին վախով  
ու ատելութեամբ. մէկ էլ յանկարծ հեքից նրա քթածա-  
կերն սկսեցին ուռչել, երկար վազքից յոգնած նժոյգի ուռն-  
գերի նման, և նա, ինչպէս միշտ, աջ ձեռքը բռունցք շի-  
նած, սկսեց սարսուռ ոտից մինչև գլուխ՝ այնպէս սաստիկ,  
որ նրա ձախ ձեռքը ցնցւում էր մօր սառը ձեռում: Տի-  
կին Քանանեանն այս անգամ հայեացքով օգնութեան  
կանչեց աղջկերանց:

— Գնանք, վահան, գնանք այն կողմը, —ասին քոյ-  
րերը եղբօր թևը մտնելով, և աշխատեցին քաշել նրան  
դէպի դուռը:

— Թողէք,—մոնչաց յանկարծ վահանը հեասպառ,  
ամբողջ իրանով դէպի պատկերը ձգւելով,—թողէք. նա  
ուզում է ձեզ խփել. բայց ես... —Ու գոռաց ուսերէն.

— Не смей!..

Վերջին խօսքերը վահանն արտասանեց այնպէս բար-  
ձրը, այնպիսի մի ահարկու ձայնով, որ այցելուները ցըն-  
ցւած իրարով անցան. մի քանիսը նոյնիսկ առաջ եկան  
զարմացած: Մայրն ու քոյրերը վահանի թևերն աւելի ա-  
մուր բռնելով՝ աշխատեցին քաշել նրան դէպի դուռը:



— Խելագար է, — ասաւ այցելուներէից մէկը հարե-  
ւանին:

— Ինչպէս երևում է...

Մօտեցաւ և հերթապահ նկարիչն այլայլած, ճաղատ  
զլուխը կարմրած:

— Ի՞նչ էր, ի՞նչ պատահեց, — հարցրեց նա վախեցած:

— Ոչինչ, ոչինչ, — պատասխանեց տիկ. Քանանեանն  
իրեն չկորցնելով, — որդիս մի քիչ վատ զգաց իրեն:

Քոյրերը քիչ էր մնում արտասուէին ամօթից. եղբօր  
ձեռները բռնած՝ նրանք աշխատում էին չանել մի այն-  
պիսի շարժում, որ կարող էր անքաղաքավարի նկատել:  
Այնուամենայնիւ, բարապանի օգնութեամբ, դուրս բերին  
նրանք Վահանին սրահից, միջանցքում ջուր խմեցրին և,  
կառք նստելով վերագարձան տուն — տխուր-տրտում, ինչ-  
պէս սգաւորներ:

— Քոռանամ ես, քոռանամ, — զլուխն օրօրելով ասաւ  
պառաւ աղախինը ինքն իրեն, մինչև արմուկները քրշ-  
տած, լացքաջրոտ ձեռներով դուռը նրանց առաջ բա-  
նալով: (Եկողների տխուր դէմքից նա կռահեց, որ «էլի»  
բան է պատահել): Եւ երբ բոլորն անխօս, Վահանին մէջ  
տեղ արած, բարձրացան սանդուխքներով, նա իր ցամա-  
քած աչքերը յառեց դրան արանքով երևացող երկնքին ու  
քրթմնջաց. — Տէր, բո դուռը բանաս...

\* \* \*

Այդ գիշեր Քանանեանների տանը ոչ ոք չքնեց հա-  
մարեա:

Աղջկերքը շուտ-շուտ յիշելով պատկերահանդէսի դէպ-  
քը, աշխատում էին յիշել նաև այնտեղ եղած մարդկանց.  
տեսնես ո՞վքեր կային այնտեղ, ո՞վքեր տեսան իրենց այդ  
անյարմար դրութեան մէջ: Ու յիշելով այս կամ այն ծա-



նօթ մարդուն, կնոջ, նրանց դէմքը ամբողջապէս, մինչև ականջներ, տաքանում էր ամօթից: Մտածելով Վահանի մասին, նրանք իրարից թագուն, հառաչանքով բացականչում էին. — Ա՛խ, երբ պիտի մայիսը գայ... Երկար ժամանակ խոհանոցում հառաչում էր և պառաւ աղախինը: Իսկ ամուսինները ջոկ-ջոկ մտածում էին՝ չլինի թէ որդու հիւանդութիւնն իսկապէս ժառանգական արմատ ունենայ, ինչ որ կարծում էին զանազան մարդիկ, երկուսն էլ, սակայն, քրքրելով իրենց տոհմը — չէին յիշում նման դէպք: Հայրը — որքան էլ չէր ուզում հաշտել այդ մտքի հետ — գտնում էր, որ որդին ցնորւելու նշաններ է ցոյց տալիս պարզապէս, բայց իրեն մխիթարում էր նրանով, որ լաւ խնամքն ու ամարանոցը կարող են փրկել նրան: Իսկ մայրը ենթադրում էր, որ Վահանն ուղղակի գրաբան է և — իբրև նահապետական ընտանիքի դուստր — կարծում էր, որ պէտք է այդ բանը փորձել իմանալու մի որևէ գրքաբացի մօտ: Եւ այս միտքն այնքան հաւանական թւաց նրան, որ նա անկողնից ելնելով, վերարկուն խալաթի փոխարէն ուսերին քցելով, Վահանի սենեակից գնաց ամուսնու մօտ իր կասկածը յայտնելու... Փաստաբանը անկողնի մէջ՝ գլուխն ափին յենած, արմուկը բարձին, միտք էր անում աչքը լամպի իջեցրած լոյսին յառած: Կիսամթի մէջ նա աւելի ծեր և աւելի մռայլ էր երևում: Լսելով տիկ. Քանանեանի կասկածը՝ նա դառը խնդաց կնոջ կարճամտութեան վրայ և փոքր ինչ բարկացած նկատեց, թէ լաւ կը լինի Վահանին այլևս տնից դուրս չտանել:

— Ա՛խ, ոտս կոտրւէր, ոտս կոտրւէր, չգնայի, — հառաչեց կինը ծնկներին խփելով:

— Այո՛, չպէտք է տանել, — կրկնեց պ. Քանանեանը մտազբաղ. — ինչպէս երևում է, զանազան տպաւորութիւններ ազդում են...

Տիկին Քանանեանը թուլացած նստեց բազկաթոռին.



— Բա ի՞նչ պիտի անենք հիմա, — հարցրեց նա յուսահատ, գրեթէ հանգած ձայնով:


Պատասխանը մարդու համար պարզ էր.

— Պիտի տանը խնամենք, տեսնենք, մինչև մայիս... Յետոյ, ես կարծում եմ ամեն բան լաւ կը լինի. դժւարը մինչև մայիս է...

Տիկ. Քանանեանը մտածմունքի մէջ ընկաւ:

Եւ մարդ ու կին այդպէս լուռ, կիսախաւար սենեակում, մտածում էին երկար:

Բոլորից հանգիստ էր այդ գիշեր ինքը՝ Վահանը: Նրա սենեակը լուսաւորւած էր փոքրիկ գիշերալամպով, որի թոյլ լոյսը հազիւ էր հասնում անկիւնները: Վահանի դէմքը հանդիսաւոր և համարեա ուրախ տեսք ունէր. ձեռը գլխատակին պառկած՝ նա հաճոյքով մտածում էր որ գտել է վերջապէս այն տեղը, ուր թագնւում է իր թշնամին և որտեղից միշտ սուրը ձեռին գալիս է և ուզում է իրեն սպանել: Իր այդ թշնամին, նրա կարծիքով, թագնւում էր ցուցահանդէսում: Նա եկել է այդտեղ պահուել, որպէսզի իրեն սպանի. բայց այդ նրան չի աջողւի... Եւ Վահանը հաճոյքով մտածում էր, թէ քանի երրորդ անգամն է ահա իր թշնամին փորձում է իրեն սպանել, բայց չի կարողանում. սկզբում միայն վիրաւորեց, յետոյ եկաւ Մոսկւա, հիմա էլ եկել է Թիֆլիս՝ պատկերահանդէսում թագնւել... Ու թւում էր Վահանին, որ իր թշնամին դիտմամբ թագնւել է ցուցահանդէսում, որ աւելի շատ մարդ սպանի, ինչպէս անցած օրն ուզում էր մօրն ու քոյրերին սպանել, բայց չկարողացաւ, որովհետև ինքը չթողեց: Եկել է նա ամենից առաջ, ի հարկէ, իրեն սպանելու, իսկ իրենից յետոյ արդէն բոլորին... Եւ Վահանն ուրախութեամբ մտածում էր, թէ որքան լաւ է, որ ժամանակին գտաւ նրա տեղը: Պէտք է ուրեմն շուտով ոչընչացնել նրան, որովհետև եթէ նա կենդանի մնայ — բոլոր-





ըին կը սպանի, բոլորին... Եւ իր թշնամուն ոչնչացնելու մէջ Վահանը տեսնում էր մեծ հերոսութիւն և մեծ բարիք բոլորի համար: Զո՛ւր տեղը անցած օրը չթողին, որ ինքը խեղդէր նրան: Նա կարծում էր, որ առհասարակ իրեն միշտ խանգարում են այդ բանն անելու: Խանգարում են ամենքը և, գլխաւորապէս, իր մայրը... Եւ Վահանն այժմ իր մէջ այնքան ոյժ էր զգում, որ դարձեալ հաճոյքով մտածում էր, թէ իր թշնամին եթէ հիմա գայ, ինքը շատ հեշտութեամբ կը խեղդի նրան:

Մէկ էլ յանկարծ Վահանին թւաց, թէ ոտի ձայն լսեց, ու նայեց դէպի դուռը. նրա դէմքը երկարեց վախից... Իր թշնամին՝ պատկերահանդէսի ինքնագոհ երիտասարդը, սուրը կողքից կախ՝ կանգնել էր դրան մօտ և քմծիծաղով նայում էր իրեն, ինչպէս մի երեխայի: Կուրծքը հպարտօրէն դուրս ձգած՝ նա աչքերը փայլեցնում էր ուրախութիւնից և ժպտում, մի քինախնդիր ու շարժւալիտով: Վահանն զգոյշ նստեց անկողնում, յարձակւելու յարմար դիրք բռնեց և արհամարհանքով ու ատելութեամբ նայեց նրան: Բայց թշնամին իր դիրքը բոլորովին չէր փոխում. նա շարունակում էր հեզնօրէն ժպտալ:

— Դու ինչո՞ւ ես եկել, — հարցրեց Վահանը երկար լռութիւնից յետոյ:

Քմծիծաղից թշնամու շուրթերն աւելի ետ գնացին, բացելով նրա սպիտակ ատամների շարքերը:

Ինչո՞ւ ես ծիծաղում այդպէս, — հարցրեց Վահանը բարկացած:

Թշնամին չպատասխանեց:

— Դու դարձեալ եկել ես ինձ սպանելո՞ւ... Այո՞...

Այս անգամ թշնամին գլուխը շարժեց.

— Այո:

— Դու ուզում ես սպանել և իմ ծնողներին:

Թշնամին նորից գլուխը շարժեց դրականօրէն:



— Եւ իմ քոյրերի՞ն:

— Այո... բոլորին:

Վահանը մերկ ոտքերը կախեց մահճակալից:

— Բայց ես քեզ չեմ թողնի, — ասաւ Վահանը հըպարտ. — ես քեզ աւելի շուտ կը սպանեմ, քան դու բոլորին:

— Տեսնենք, — ասաւ թշնամին և ձեռը տարաւ դէպի սուրը, բայց Վահանը ցատկեց տեղից և աղաղակեց.

— Не смѣй!

Այդ բոպէին սենեակի դուռը շրխկոցով բացւեց և ներս մտաւ տիկին Քանանեանը՝ սարսափած դէմքով: Ամուսնու մօտից գալու միջոցին նա լսել էր որդու աղաղակը և կռահել, որ նրա ցաւը կրկնուում է:

Մօրը տեսնելով՝ Վահանն աչքերը թարթեց և շուրջը նայեց. թշնամին չկար. նա չքացել էր: Այդ ժամանակ Վահանի կրծքից լսւեց մի լացախառն հառաչանք:

— Ա՛խ, մամա, դու դարձեալ խանգարեցիր ինձ: Դու միշտ խանգարում ես ինձ...

Ու սկսեց լաց լինել նա՛ ձեռքն աչքերին դնելով:

Այլևս չհարցնելով թէ — ինքն ինչով է խանգարում Վահանին, տիկին Քանանեանն աշխատեց հանգստացուցիչ խօսքերով պառկեցնել որդուն:

Վահանը պառկեց, բայց չքնեց. նա շարունակ մտածում էր, ինչպէս ոչնչացնել թշնամուն, ինչպէս իրագործել իր այդ հսկայական ծրագիրը, որ ոչ ոք չխանգարի իրեն...

\* \* \*

Առաւօտեան ձիւն էր գալիս խոշոր-խոշոր փաթիլներով: Վահանը ելաւ մտազբաղ դէմքով. թէյի ժամանակ նա ոչինչ չխմեց. նախաճաշին նոյնպէս բան չկերաւ: Մայրը,



արտասուքներն ու հառաչանքները հազիւ զսպելով՝ խնդրեց մի անգամ որևէ բան ուտել. Վահանը մերժեց.

— Ինձ մի խանգարէք, մի խանգարէք, — կրկնում էր նա, առանց գլուխը բարձրացնելու, ձեռները վարտիկի գրրպաններում, սեղանատանն անց ու դարձ անելով. — Մի՛ խանգարէք. տեսնում էք զբաղած եմ...

Ճաշին նմանապէս Վահանը ոչինչ չկերաւ: Տնեցիներին թւում էր թէ նա նիհարում է և աւելի է տխուր, քան երբևէ: Եւ նրանք կարծում էին, թէ Վահանը տրխուր է գուցէ նրա համար, որ ձիւն է գալիս: Իսկապէս, Վահանին հետևողը կը նկատէր, որ նրա տխրութեան պատճառը թերևս ձիւնն է, որովհետև սեղանատնից իր սենեակը և այնտեղից սեղանատունն անցնելով՝ նա շարունակ նայում էր թափւող ձիւնին և գլուխը շարժում յուսահատօրէն. թւում էր թէ ցանկութիւն ունի դուրս գալու, բայց ձիւնը խանգարում է: Իսկ ձիւնը գալիս էր այնպէս հանդարտ ու հանդիսաւոր, որ կարծես մի սրբազան արարողութիւն էր կատարւում օդում, և այնպէս վարար, որ ասես կտրւելու միտք չունէր բնաւ. բակի ծառերը, ցանկորմները, պատշգամբի ճաղերը և տանիքները վաղուց ծածկւել էին գգած քուլքի պէս փափլիկ ձիւնով, որը դեռ էլի շարունակում էր իջնել թել-թել:

— Գնանք, Վահան, ձնագնդակ խաղանք, — դիմեցին քոյրերը ճաշից յետոյ, եղբօր տխրութիւնը ցրելու նպատակով:

Վահանը ձեռքը թափ տւեց միայն:

— Ինչո՞ւ, Վահան... Գնանք բալկօնում...

— Ինձ մի խանգարէք, մի խանգարէք, — կրկնեց նա բարկացած և շարունակեց անցուղարձը լուռ, մտամփոփ ու համաչափ քայլերով:

Երեկոյեան դէմ ձիւնը դադարեց, բայց Վահանը գուհատ դէմքն աւելի լարւած ու մտածկոտ տեսք ստացաւ:



Գիշերը նա դարձեալ չքնեց. կրկին մտածում էր իր թրշնամուն ոչնչացնելու մասին: Իսկ հետևեալ առաւօտ, թէյից յետոյ, նա, տնեցիների համար միանգամայն անսպասելի կերպով, վերարկուն հագնելով՝ ուղեց տնից դուրս գալ:

— Ո՞ւր, Վահան ջան, ո՞ւր,— կտրեց նրա առաջը մայրը միջանցքում.— ո՞ւր ես գնում այս ցրտին:

— Թո՛ղ, մամա, թո՛ղ,— նեղացաւ Վահանը դէմքը կնճռելով.— մի՛թէ դու ուզում ես որ ես մեռնեմ...

Այդ խօսքերն ասւեցին այնպիսի խղճալի ձայնով, որ մայրը չիմացաւ ի՞նչ անել:

— Ի՞նչեր ես ասում, Վահան, ի՞նչեր ես ասում. Աստուած ո՛չ անի,— ասաւ նա, ասես մի անսպասելի մեղադրանքից արդարանալով:

— Դէ, թող ուրեմն գնամ:

— Ո՞ւր:

— Յուցահանդէս:

— Չէ, Վահան ջան. չէ-չէ-չէ... ցուրտ է կըմբսես. մի գնա. չեմ թողնի. միասին կերթանք...

Եւ տիկին Քանանեանը որդու ձեռներից բռնած, կրծքից հրելով, սեղանատան բաց դրնից բօթեց նրան ներս՝ թիկունքը դրներին դիպցնելով:

Վահանը, որ մօրը հակառակելու սովորութիւն չունէր առհասարակ, այս անգամ ևս համակերպեց նրա կամքին և՛ անխօս, վերարկուն հանեց նորից. և այն ժամանակ, երբ մայրն ուզում էր կախել այն, յանկարծ նրա ծոցագրպանից ցած ընկաւ մի շողշողուն իր: Դանակ էր:

Զարմանքից տիկ. Քանանեանի շուրթերը սեղմւեցին:

— Էս հացի դանակը քեզ մօտ ի՞նչ գործ ունէր, Վահան ջան,— հարցրեց նա՝ դանակը երկու ձեռով բռնած՝ միջանցքից սեղանատուն մտնելով:

Վահանը իսկոյն չպատասխանեց:



— Ինձ մօտ... դանդաղեց նա և գունատուեց:

Պարոն Քանանեանը, որ այդ ընկերին՝ պէնսնէն քթի կէսին դրած՝ լրագիր էր կարդում, յանկարծ, ահագին շարժումով, ձեռք ծնկանը խփեց յուզւած և ակնոցը վերցրեց:

— Տեսնեմ, տեսնեմ,—ասաւ նա շտապ-շտապ, կարծես մի բան իմանալով:

Կինը դանակը մօտեցրեց մարդուն:

— Ահ, դա երէկայ սրիկայի գործն է անպատճառ, — գլուխը շարժեց պ. Քանանեանը բարկացած. — վերցրել է և, փոխանակիր ջիբը դնելու, կոխել է Վահանի գրպանը: Чертъ беря. Ես այդպէս էլ կարծում էի, որ նա գող պէտք է լինի...

Պարոն Քանանեանը ակնարկում էր իր մի տարօրինակ այցելուին, որ ահա երեք շաբաթ էր ինչ իրար վրայ՝ ամեն հինգշաբթի՝ գալիս էր խորհուրդ հարցնելու իր ստանալիք ինչ-որ մի խոշոր ժառանգութեան մասին և վերջը «փոխարինաբար» հինգ ուրբի խնդրելով՝ հեռանում:

— Բայց մի՞թէ նա սեղանատնից անցաւ, — հարցրեց տիկ. Քանանեանը երկբայութեան մէջ:

— Կարծեմ, — ասաւ պ. Քանանեանը և աւելացրեց փոքր ինչ բարկացած. — Խնդրում եմ — աղախնին տաս, որ այլևս ներս չթողնի այդ սև ակնոցներով պարոնին:

Տիկին Քանանեանը կանգնած մտածմունքի մէջ ընկաւ:

— Ուրեմն քո կալօշներն էլ նա տարած կը լինի էլի, — ասաւ նա կասկածանքով:

— Շատ կարելի է...

Փաստաբանն իր խօսքն սկսեց այնպիսի պոռթկումով, որ տիկ. Քանանեանը հնարաւորութիւն չունեցաւ որդու պատասխանն իմանալու (մանաւանդ որ նա սովորականի պէս հօրից քաշւելով անցաւ իր սենեակը) բայց յետոյ



այնուամենայնիւ նրա սրտում մնաց մի ծանր տարակուսանք, թէ ինչպէս կարող էր դանակն իսկապէս ընկնել Վահանի վերարկուի գրպանը. եթէ գողն էր դրել, այդ դէպքում նա պիտի հագնէր և Վահանի վերարկուն. թէ Վահանն էր իր գրպանը դրել. բայց ինչո՞ւ համար. դանակը Վահանի ինչի՞ն է պէտք... Եւ խեղճ կիներ ոչինչ չէր կարողանում հասկանալ: Այդ օրը, սակայն, մի բան պարզւեց նրա համար, որ Վահանին չպէտք է թողնել անից մենակ ելնելու: Ուստի և սկսեց հետևել որդուն. ո՞վ է իմանում, կարող է յանկարծ Վահանն իրեն դուրս քցել, և փողոցում ի՞նչ ասես չի կարող պատահել: Տիկ. Քանանեանն առանձնապէս վախենում էր «կրկնւելուց»: Խայտառակութիւն կը լինի, եթէ փողոցում օտարները տեսնեն իրենց որդու ցաւագարութիւնը: Հիմա եթէ տասը գիտի, այն ժամանակ արդէն բոլորը կիմանան... Ու նա աղջկերանց ևս պատւիրեց՝ երբէք Վահանին մենակ դուրս չը թողնել անից՝ եթէ պատահի որ ինքը գործով ուրիշ տեղ լինի: Նոյնը պատւիրեց նաև աղախնին: Սա, լսելով տիրուհուն, հառաչեց.

— Քոռանամ ես, քոռանամ, — և գոգնոցով աչքերը սրբելով՝ աւելացրեց. — Մի բան ասեմ տիկին, չնեղանաս... Լեզուս չորանայ, քար դառնամ ես... Ձի՞ Վահանի ցաւը խաչից է, տիկին... Եւ նա ուղեց պատմել գիշերը տեսած երազը, բայց մինչև կը պատրաստւէր այդ անելու, տիկին Քանանեանը, ուսերը տարակուսանքով վեր քաշելով, դուրս եկաւ խոհանոցից.

Իսկ Վահանը դարձեալ ոչինչ չէր ուտում, չէր քնում և քանի գնում նիհարում էր ու դառնում լռակեաց, ինքնամփոփ: Ձուր էին անցնում տնեցիների ջանքերը, պ. Քանանեանի համալսարանական ընկեր բժշկի (որ այժմ ամեն օր գալիս էր իրրև թէ տան բարեկամ) մտերմական խորհուրդները, — Վահանը ոչինչ չէր ուզում լսել:



Տեսնեով՝ չեն թողնում իրեն տնից ելնելու, նա յուսահատ մտածում էր, որ եթէ ինքը չշտապի — չէ՞ որ նա՛ թշնամին՝ կը գայ և այսօր կամ վաղը, քնած տեղը կը սպանի իրեն. յետոյ կսպանի միւսներին, և վերջը — քաղաքում ոչ մի մարդ չի թողնի: Ա՛խ, ինչո՛ւ, ինչո՛ւ չեն հասկանում այս բանը... Ու երկար լալիս էր նա անխօս կամ, շրթունքները կրծելով՝ անցնում սինեակից-սենեակ:

Այսպէս տևեց երկու օր, իսկ երրորդ օրը կատարւեց այն, ինչից տիկին Քանանեանը վախենում էր այնպէս:

\* \* \*

Վահանն այդ օրը տնից դուրս եկաւ այնքան անսպասելի և այնպէս ծածուկ, որ ոչ-ոք ոչինչ չնկատեց:

Առաւօտեան թէյից յետոյ, երբ հայրը գնաց դատարան, քոյրերը հօր առանձնասենեակը՝ շուռ եկած գրքերը կարգի բերելու, իսկ մայրը խոհանոց՝ աղախնին ճաշի համար խորհուրդներ տալու, — Վահանն, ինչպէս փախչող մի կալանաւոր, արագ-արագ հագաւ վերարկուն և, գողի նրման՝ թեթև քայլերով, մի շնչում բակի մուտքով իրեն գցեց փողոց:

Ցուրտ էր. չորս օր առաջ եկած ձիւնի մի մասը տակաւին մնացել էր անհալ. սառած գետինը թնդում էր կառքերի անցուղարձից. սառինքը ձիւրի մուկից կախել էր բրթէ թելեր. կառապանները հագել էին ոչխարի մորթուց խոր ձեռնոցներ: Չնայած ցրտին, փողոցներում այնուամենայնիւ շատ մարդ կար. բոլորն անցնում էին վերարկունների օձիքն ականջներին քաշած կամ շարժերով փաթաթւած, իսկ քաղաքային այգում, ուր չոր ծառերն ասես կուչ էին եկել ցրտահար, մի խումբ երեխաներ՝ կապտած քթով ու ձեռներով, ձիւնագնդակ էին խաղում՝ սառած օդն իրենց ծիծաղով լցնելով:



Վահանն այս բոլորին անուշադիր, ցրտին անզգայ, առաջ էր գնում շտապ-շտապ՝ շուտ-շուտ ետ նայելով, ինչպէս հետապնդող մի փախստական: Նրա խոշոր աչքերի թախծալից հայեացքում դարձեալ հուրհրատում էր այն հիւանդագին բոցը, որ միշտ նիշում էր նրա ցաւի «կըրկնութիւնը»:

Ո՞ւր էր գնում և ինչի՞ — դա նրա գաղտնիքն էր, որ չէր ուզում յայտնել ոչ-ոքի: Կարծես մի անյայտ զսպանակից մղած՝ սլանում էր նա փողոցով և ժամանակ առ ժամանակ աջ ձեռքով շօշափում վերարկուի ձախ ծոցազրպանը, կարծես մի բան ստուգելու համար:

Մի քանի աննշան փողոց ու փողոցակ անցնելով՝ նա դուրս եկաւ վերջապէս գլխաւոր փողոցը և քայլերը աւելի արագացրեց: Այժմ նա գնում էր դրեթէ վազելով, ամբողջ իրանով առաջ թեքած, հրելով մարդկանց և հըրլելով նրանցից, և մոլորուն, ասես մի բան փնտրող հայեացքը միշտ հեռուն՝ դէպի առաջ՝ սևեռած: Անցորդները՝ նրա փութկոտ շարժումներից հրւած, կանգ էին առնում մի վայրկեան և զարմանքով նայում նրա, այդ տարօրինակ երիտասարդի ետևից, որ «ներողութիւն» անգամ չէր խնդրում: Երբեմն էլ նա խուսափում էր մարդկանցից, որ շլինի թէ իրեն խանգարեն:

Ճանապարհի կիսին նկատելով ծանօթ մի դէմք՝ նա, կարծես վախեցած, շեղեց ճամբան, անցաւ փողոցի միւս ափը և շարունակեց նոյն հապճեպ ընթացքը, մերթընդմերթ ձեռն էլի դէպի ծոցը տանելով:

Փոքր ինչ էլ գնալով՝ նա կանգ առաւ պատկերահանդէսի շէնքի առաջ և վերջին մի հայեացք նետելով իր շուրջը, հափ-շտապ, ինչպէս յարմար թագստոց գտած հալածական ընկաւ ներս:

Մարմարէ աստիճանների վրայ նա նորից ձեռքը տարաւ դէպի ծոցը: Նրա ոտքերն սկսեցին դողդողալ: Իայց



և այնպէս նա սանդուխտները բարձրացաւ ու դէպի սրահը նետուեց այնպիսի արագութեամբ, որ տոմսավաճառ կինն ստիպուած էր ձայնել նրա ետևից.

— Տոմսակ, պարոն, տոմսակ...

Ինչպէս գործով շտապող մէկը — Վահանը ետ անգամ չնայեց և, դուռն աղմուկով բանալով՝ մտաւ ներս:

Յրտի, թէ վաղ լինելու պատճառով սրահում այդ օրը այցելուներ քիչ կային. մի քանի օրիորդներ՝ աղւէսի մորթիներով, երկու ջահել տիկին և երեք պարոն, որ ծառայելու պատրաստակամութեան ժպիտը երեսներին, կանանց բացատրում էին նկարների նրբութիւնը: Այդտեղ էր և հերթապահ նկարիչներից մէկը, այս անգամ հասուն հասակով մի մարդ, որի գլխի մազերի կէսը արծաթագօծ էին արդէն: Որովհետև Վահանը ներս մտաւ դռների աղմուկով ու արտակարգ շփերթ ձևով — բոլորն ակամայ շրջեցին նրա կողմը և զարմացած իրար նայեցին, կարծես միմեանց հարցնելով թէ՛ «ո՞վ է այս դիւահարը», — այնպէս այլալուծ էր Վահանի դէմքն այդ ընկալին: Իսկ Վահանը, մտնելով ներս, իր հրաբորբոք հայեացքը պահ մի պտտեց սրահում, ապա, կարծես որոնածը գտնելով՝ նետուեց դէպի դիմացի պատը, ուր շողշողում էր մի մեծ ոսկեգոյն շրջանակ, իսկ նրա մէջ երևում էր մի երիտասարդ՝ մերկ սուրը ձեռին: Դա հէնց ինքը նա էր, Վահանի թշնամին:

Մի ընկալ ևս — և Վահանը, ծոցից հացի մի դանակ հանելով՝ յարձակուեց նրա վրայ.

— Ահա, այ քեզ, այ քեզ, — կրկնում էր նա ատամները սեղմած:

Վախից օրիորդներն ու տիկիները ճշացին և նետուեցին դէպի դուռը. տղամարդիկ ապշած կանգ առան, իսկ հերթապահ նկարիչը վախւորած ելաւ տեղից և, չի-



մանալով ինչ անել, երկու քայլի վրայ երեք անգամ ետ  
ու առաջ գնաց:

Այս ամենը կատարւեց մի քանի ակնթարթում:

Երեք-չորս անգամ դանակը խրելով «Վրէժի» կտաւի  
մէջ, Վահանը պատուեց իր թշնամու կուրծքը և արտա-  
սանեց ցնծալի ձայնով, որ ասես ելնում էր նրա սրտի  
խորքից:

— Ահ, վերջապէս, — ու այս խօսքերի հետ ամբողջ  
հասակով փռւեց յատակին:

Կանայք սարսափած դուրս թռան սրահից, իսկ նկա-  
րիչը վազեց սպասաւորին կանչելու...

... Երկու ժամ որոնելուց յետոյ, տիկ. Քանանեանն  
ու մեծ աղջիկը Վահանին գտան պատկերահանդէսում:  
Ենթադրութեամբ — հարց ու փորձից նաև պարզւել էր, որ  
Վահանն եկել է ցուցահանդէսի կողմը՝ մտել էին իմանա-  
լու:

Վահանը մեռած էր: Նրա գունատ՝ անարիւն դէմքը,  
զարմանալի հանդիստ, պայծառ և հպարտ տեսք ունէր  
միաժամանակ:

Երբ Վահանին փոխադրեցին տուն, վշտահար հայրը  
չգիտէր ինչ անել: Դիմելով բժշկին, որ եկել էր մեռածին  
քննելու, նա կրկնում էր շուտ-շուտ.

— Ախ, բժիշկ, քաղաքը սպանեց իմ որդուն... Նա  
չէր մեռնի, նա կը փրկւէր, եթէ մայիսը շուտով գար...



\*  
\* \*

Կորուցել եմ ուղիները տենչերիս  
Ոչ երգ ունեմ, ոչ երազանք, ոչ թախիժ,  
Մի անթափանց քող է իջել աչերիս  
Ասես օտար, անծանօթ եմ ինքս ինձ:

Կորուցել եմ ուղիները տենչերիս  
Պարուրել է հոգիս մի նինջ անպատում  
Հեզնանք, ժպիտ, լուռ սառել են շուրթերիս  
Հիմա ես էլ, ոչ սիրում եմ, ոչ ատում:

Կորուցել եմ ուղիները տենչերիս  
Էլ չեմ կանչում, չեմ աղօթում, չեմ լալիս,  
Մի հեքէաթ է թւում օրերն անցեալիս,  
Ասես ես չեմ, ես չեմ եղել երգելիս:

Կարօտել եմ, կարօտել եմ տենչերիս  
Հին օրերիս կարօտին եմ կարօտել  
Կարօտել եմ տառապանքիս, խաղերիս  
Սիրուց խաբւած, խաբւած ու թաց աչերիս:


=====  
\*  
\* \*

Կուզեմ յաւէտ երկրպագես հմայքիս  
Գերիս լինես, ինձ ծնրադիր աղօթես  
Հլու խօսքիս, հլու մտքիս ու կամքիս  
Աստուածուհիդ լինեմ դիւթւես ու դիւթես:



Ձրհնանան հմայքներս կանացի  
 Բոյր նազանքիս նոր բոյրերով միշտ արբես  
 Միշտ հմայլած գգլանքներովդ առնացի  
 Գինով լինի աստուածուհիդ սիրակէզ:

Արևի վառ ճաճանչներից էլ ժպտուն,  
 Բնութեան բիւր երանգներից էլ գունեղ,  
 Ծովերի ջինջ ծփանքներից էլ ցայտուն—  
 Նուրբ ու դիւթիչ լինի սէրը մեր բիւրեղ:



## Կ Ա Ր Օ Տ

Երբ դալկահար հեռաստանը կ'աղօտի,  
 Ես կը դիմեմ գիրկը լեռ ու արօտի  
 Հովերի հետ սիրտս մեղմիկ կ'աղօթի  
 Կըմբմնջայ թովիչ խօսքեր կարօտի:

Ու կը թըլայ թէ ինձ գրկել ես քնքոյշ  
 Հոգիս շունի էլ հեռաւոր տենչի ցաւ,  
 Ու կը թըլայ կարօտս հաճոյք էր անուշ  
 Տառապանքս մի երազ էր, որ անցաւ:



## Հ Ե Թ Ա Ն Ո Ս Ա Կ Ա Ն


Պատանիներ սիրում եմ ձեզ  
 Հուրը այրող ձեր աչերի  
 Համբոյրները ձեր խենթ ու հեզ,  
 Սիրուց անհագ, սիրուն գերի  
 Ձեր խելայեղ երթը սէրի,  
 Հիմնը՝ ուղղած միշտ մեզ ու մեզ:



Ինչպէս ծովը փրփրադէզ  
 Դուք գերին էք խենթ հողմերի,  
 Ու մենք նաւակ հնազանդ ձեզ  
 Ձեր խենթ կամքին հարձ ու գերի  
 Օրօրում ենք սուղում անտես  
 Գիրկը խելառ կոհակների:

Ձեզ բոլորիդ սիրում եմ ես  
 Գգլանջներդ բազմապիսի,  
 Ով էլ լինէք ծնունդ պէս-պէս  
 Երկիրների, սառ հիւսիսի,  
 Թէ հարաւի տաք, սիրակէզ,  
 Սիրում եմ ձեզ, սիրում եմ ձեզ:

Արմենուհի Տիգրանեան





## ՓՈՔՐԻԿ ԱՐՁԱԿ ԵՐԳԵՐ

Վերջապէս... արե՛ր, արե՛ր...

Պատուհաններս բացի.

Առաւօտը քաղցրօրէն սենեակս լեցւեցաւ.

Անձրեին տեղ լոյսի շիթեր կը կաթկթին տերեւնե-  
րուն վրայ.

Հեռաստանները սա մշուշ՝ որքան նման են ծովուն.

Որքան անըջալի է օրը, շողերով, ցոզերով լի.

Բզէզ, պզտիկ բզէզ, ներս եկուր.

Քեզի հետ՝ բեր դուրսի լոյսէն, հովերէն, երազանք-  
ներէն՝

Շիթ մը արցունք, շիթ մը ժպիտ.

Բզէզ քու պզտիկ երգէ երգէ ինձի:

\* \* \*

Միակերպ, ընդհանր...  
Անձանօթ ու անձրևոտ գիւղաքաղաքին վրայ,

կը տարածւի ղօղանջիւնը զանգին, ճերմակ եկեղեցիի,

Ղօղանջիւնը զանգին...

Թախձոտ, յուսահատ, գուժկան, ինչպէս կը սեղմի  
հոգիս.

Մայրիկ, հեռաւոր մեր տնակին մէջ

Մեղմօրէն կը փակւին աչքերդ...

Ու վերջին անգամ իմ անոնս կուտաս,

Բազուկներդ կ'անշարժանան դէպի ինձի,

Մայրիկ...



\*  
\* \*

Ի՞նչ կըլլար՝  
 Օտար այս փողոցներուն մէջ,  
 Ուրկէ տխուր ու դանդաղ կառքս կը սահի—  
 Այս օտար փողոցներուն մէջ  
 Յանկարծ յայտնւելիք դճւ մայրիկ...  
 Ու ես, չի ճշայի բերկրանքէս,  
 Չի ցատքէի դէպի քեզի.  
 Այլ մեղմօրէն ժպտայի՝  
 Եւ օտար այս փողոցներէն,  
 Տրտում, կառքիս հետ, անցնէի...

\*  
\* \*

Կապոյտին տակէն, արևով ու արևածաղիկներով ձո-  
 րճն ճամբայէն, դուն կը քալէիք զլարթ, զլարթ գարու-  
 նին պէս հերտրձակ...

Կը վազէի ես ետևէդ, ստւերիդ գերին, շարժումնե-  
 րէդ սարսուռն, դէպի ժայռերը վերի, ժայռէն ցայտող՝  
 դէպի աղբիւրը վերի...

Հասա, բռնեցի, այնքան թախանձանքիդ հակառակ  
 վերցուցի քեզ թևերուս, թևերուս վրայ գարճնը ու արևուն տակէն տարի մինչև աղբիւրը...

Այն ատեն, իրար միացուցած ձեռքերդ, ջուր տւիր  
 ինձի և թոյլ տւիր որ՝ հրահրուն շուրթերս իմ՝ ջուրին  
 մէջէն հպին մինչև՝ ափերդ...



\* \* \*

Այսօր աւելի, աւելի կը սիրեմ քեզի...  
 Աշնան տերևները կը թափին.  
 Սարսուռներ երկինքէն կը ցանւին...  
 Աւելի կը փարեմ կուրծքիդ—  
 Պաշտպանէ զիս անձրևներէն ու մրրիկէն,  
 Խոստացիր սրտիս՝ գարունը վաղւան...  
 Աշնան տերևները կը թափին,  
 Իմ արևս, իմ երկինքս, ժպտա ինձի,  
 Այսօր աւելի կը սիրեմ քեզի...

\* \* \*

Ես քեզի գուլպաներովդ սիրեցի.  
 Ականջիդ իսկ չպիտի ըսեմ այս գիտեմ, որ ամօթ է  
 այսպիսի բան խօսիլը:  
 Բայց երբ տեսայ սրունքներդ՝ հնադարեան հրաշալի  
 սափորներու այնքան նման, թափանցիկ մետաքսէ այդ  
 գուլպաներուն տակ թագնւած...  
 Ես որքան ուզեցի շրթունքներս մօտեցնել և այդ  
 սափորներուն խենթեցնող փրփուրներէն գոնէ մէկ ան-  
 գամ, մէկ ումպ, խմել...  
 Չէ, այս մասին ես իսկ ալ չպիտի մտածեմ.  
 Ըսեր են՝ գիտեմ, որ ասիկա ամօթ է...

Ռաֆայէլ Զարդարեան





## ԱԶԱՏՈՒԹԵԱՆ ԵՐԳԸ

Ինչպէս արծիւ, այդ երգը տարածեց իր լայն թեւերը: Ամեն մէկի կրծքի տակ հնչեց նա: Յնցւեց այդ թմրած ժողովուրդը: Դիւթական գաւազանի զօրութեամբ այդ երգը արթնացրեց նրանց դարաւոր քնից:

Հեռու բարձր սարերի վրայ ու խոր ձորերում, հեռու բռնակալի աչքերից, երբ լսում էին նրանք թափառական երգչի ազատութեան այդ երգը՝ զսպւած կատաղութեան և ուրախութեան արցունքներ էին քամում ու վրէժով լցւում:

Ոչ ոք չգիտէր, թէ որտեղից եկաւ այդ երգը. ոչ ոք չէր ճանաչում այդ երգի խիզախ երգչին, որի երգը գանգատ ու աղերսանք չէր, որի հնչիւնների մէջ չէր լսում վշտի, յուսահատութեան ճիչը: Այլ վրէժով էր սնւած ու թոյնով լցւած:

Ամեն մէկի հոգու մէջ այդ երգն էր բուն դրել և նրա արձագանքը թնդում էր ամեն մէկի կրծքի տակ: Օր ու գիշեր նրա հնչիւններն էին ալեկոծում նրանց հոգիները:

Մայրերը այդ երգով էին օրօրում իրենց գաւակների քունը: Երիտասարդ սիրահարը այդ երգն էր մրմնջում իր սիրած աղջկան: Ծերերը, որոնք այլևս անգօր էին դրսի աշխատանքի, թիակով գոմը մաքրելիս, իրենց խռպոտ ձայնով, անատամ բերաններով, թաւ բեղերի տակից, այդ երգն էին մրմնջում: Պառաւ կանայք, ճախարակի ներդաշնակութեամբ, կամ թել մանելիս, այդ էին երգում:



Այդ երգն էին երգում դաշտում մաճկալն ու հնձուրը:  
 Այդ էին երգում նախրապանն ու բանուրը: Ազատ լեռների  
 բարձունքից սկսած մինչև մութ գոմերում այդ երգն  
 էր հնչում. երգը կար, իսկ բանաստեղծին չէին էլ փնտ-  
 ում. նրանք սիրեցին այդ անյայտ բանաստեղծին, որի  
 երգը կար, իսկ ինքը չկար: Համեստ ու խոնարհ քայլում  
 էր նա իր ժողովրդի մէջ, գոհ, որ իր երգը հասաւ նպա-  
 տակին և արձագանք գտաւ ամենքի սրտում:

Ժպիտը դէմքին նա քայլում էր՝ իր գաղտնիքը խո-  
 րը թաղած կրծքի տակ, գոհ ու երջանիկ, որ իր սի-  
 րած աղջիկը բախտաւոր է իր գրկում: Որ միայն նա  
 գիտէ, միայն նրան է յայտնի այդ գաղտնիքը և այդ մէկը  
 նրա գրկումն է, իսկ գաղտնիքը երկուսի սրտում՝ թևերը  
 կտրած թռչունի նման:

Սակայն քնած չէր բռնակալը:

Սկզբում նրանք ուշ չդարձրին այդ երգի վրայ: Բայց  
 քանի գնում, աւելի ու աւելի էին զգում երգի ոյժը:  
 Նրանք տեսնում էին, որ օր օրի վրայ յանդուգն է դառ-  
 նում ժողովուրդը:

Այն ժողովուրդը, որին այնքան ստրկացած էին կար-  
 ծում և որից այլևս չէին վախենում:

Մահւան պատիժ սպառնացին այդ երգը երգողին,  
 իսկ բանաստեղծի գլուխը երեք հարիւր ոսկի գնահատեցին:

Օր օրի վրայ աւելի ու աւելի էր բորբոքւում սէրը  
 աղջկայ կրծքում. նա հպարտ էր այդ սիրով: Բայց ինչ-  
 պէս աշնան տերև, դալուկ ու գունատ, նա դողում էր  
 իր սիրածի գրկում:

Վախենում էր ինքն իրենից, որ անկարող լինի այդ



մեծ գաղտնիքը պահել կրժքի տակ, որը ինքն իրեն ուզում է դուրս թռչի, վախենում էր, որ քնած տեղը չբանայ գաղտնիքը:

Ինչպէս որդը կրծում է ծառի բունը, այնպէս էլ այդ գաղտնիքը ինչպէս մի ցեց կրծում էր աղջկայ սիրտը: Չկար մէկը, որին հաւատար այդ մեծ գաղտնիքը: Նա ճիգ էր գործ դնում, որ դուրս չգայ մարդկանց մէջ ու աղաղակի «ի դուր էք նրան ուրիշ տեղ փնտռում, ահա նա, ձեր բանաստեղծը, նայեցէք, նա ձեր մէջ է, ձերն է և ինձ է սիրում»:

Բայց նրա գլուխը գնահատւած է:

Եւ վախը կաշկանդում էր նրա լեզուն:

Ու հանգաւ նրա ժպիտը, նրա երջանկութիւնը փոխւեց անվերջ տանջանքների: Գիշերները նա վախենում էր աչքերը փակել, ցերեկը դադար չունէր. վախից աչքին պատրանքներ էին երևում և սարսափից ճչում էր ու դողում:

Նա այլևս անկարող էր մի վայրկեան մենակ մնալ. լսողութեանը չարագուշակ ձայներ էին հնչում. աչքերի առաջ պարզ պատկերանում էր նա, աչքերը դուրս վիժած իրենց տեղերից, կապտած, լեզուն կախ, վիզը երկարած: Ինքն է մատնել նրան, և նա կախւած է... սարսափած ճչում էր ու ուշաթափ թաւալւում գետնին:

Ոչ հմայող կանանց դեղ ու հմայքներ, ոչ սրբի դրոներ, ոչ զոհ, ոչ աղօթք, ոչինչ չէր օգնում. օր օրի վրայ մաշւում էր, հալւում, գունատ՝ ինչպէս աշնան հողմերից դողացող տերև:

Նա ծիծաղում էր անմիտ քրքիշով, լալիս, կամ անխօս, ինչպէս բրոնզէ արձան, հայեացքը մի կէտի մնում քարացած:



Մայր ու ազգական, սիրած տղայի փաղաքշանքն ու  
 օէրը, ոչինչ, ոչ մի բան չկարողացան փարատել, մեղմել  
 նրա վախի տանջանքները:

Նրա ետևից ուրևականի պէս սողում էր վախի ուր-  
 ևականը՝ հեգնանքի անվերջ ժպիտը դէմքին: Նրա վախից  
 չուած աչքերին այլևս քուն չեկաւ, և ահա մի օր խելա-  
 կորոյս դուրս պրծաւ փողոց, իրեն կրծող գաղտնիքը մէ-  
 կին ասելու:

Նա մօտենում էր անցնող դարձողին, երդւեցնում  
 նրան ամենասուրբ բանով, որ համր չմնայ գերեզմանի պէս,  
 երբ լսեն նրա անունը, որի գլուխը երեք հարիւր ոսկի է  
 գնահատուած, և քրքջալով առաջ էր վազում, ամենքին ասում:

Նրան բռնեցին, բայց ուշ էր արդէն. գաղտնիքը ա-  
 զատեց իր կապանքը և թռաւ, հասաւ բռնակալին:

Մանչաց գազանն ու հրամայեց՝ ուր էլ որ լինի գլու-  
 նեն ու բերեն, որ իր աչքերի առաջ լեզուն դուրս պոկեն,  
 ձեռները կտրեն, աչքերը հանեն և անգղներին կերա-  
 կուր ձգեն:

Լուռ լացին բանաստեղծի վաղաժամ մահը:

Երգը լռեց: Բոլորը վախենում էին այդ երգից:

Միմիայն նա էր, նա էր, որ չէր վախենում:

Մազերն ու ցնցոտիները հողմերին տուած, ինչպէս մի  
 կենդանի բողոք, որ ծնւել է այդ շարատանջ ժողովուրդի  
 դարաւոր տառապանքների մի հառաչանքից — խելագար  
 թևեր առած թռչում էր տանիքից տանիք, գիւղից գիւղ,  
 սար, ձոր. ամբողջ երկիրը ոտի տակ էր տուել: Հողմե-  
 րին յանձնուած, հողմի արագութեամբ, նա մերթ այստեղ  
 էր, մերթ այնտեղ: Նրա քրքիջը հնչում էր գիշերւայ  
 խաւարի մէջ, օրը ցերեկով, ամեն տեղ, ամեն ժամ և ա-



մեն մէկի կրծքի տակ վառում էր վրէժի հրդեհը: Երկրի բոլոր ծայրերում հնչում էր խելագար աղջկայ երգը:

Մերթ քրքշում էր վայրի անմիտ ծիծաղով, մերթ լալիս դառնագին, մատներով հողը քանդում և գլխին ցանում ու երգում մեռած երգչի արգելած երգը:

Ամենքը ճանաչում էին նրան և լալիս էին, լսելով նրա ամիտ քրքիշը ու բոլորի սրտերը մղկտում էր, տեսնելով իրենց սիրած բանաստեղծի սիրած աղջկան այդ դրուժեան մէջ. անիծում էին բռնակալին, և վրէժը ինչպէս թունաւոր օձ վեր էր բարձրացնում իր գլուխը ու բարակ թունալից լեզուները դուրս հանած գալարւում էին, վշշում և սպասում յարմար առիթի, որ շանթեն բռնակալի դաժան սիրտը:

Պայթեց փոթորիկը:

Անգէն ժողովուրդը թագնւել էր թաւուտ անտառներում, անմատչելի լեռներում, քարանձաւներում:

Նապաստակները գլուխ առել, փախել էին այդ աւերմունքի երկրից, ուր ամեն բան սրի ու հրի ճարակ էր դարձել, ամեն մի բուռ հող արիւնով շաղախւել: Թռչուններ չկային. բոլորը թռան այդ անիծւած երկրից, որի գետերը արիւնով էին ներկւած, որի օդը արիւն էր հոտում, որտեղ անթաղ դիակներ էին նեխւում և հրդեհի բոցերը լուսաւորում գազանացած մարդկանց դէմքերը:

Միմիայն գիշատիչ թռչուններն էին ոստոստում գարշահոտ դիակների շուրջը և բորենին իր արիւնաթաթախ դունչը անվախ ցոյց էր տալիս անմարդաբնակ, ամայի գիւղերում. շները, որոնք կարողացել էին կտրել կապանքները ու փախչել, ոտների մէջ քարշ տալով շղթաները, գիշերները ունում էին իրենց տէրերի ածխացած դիակ-



ների վրայ և քաղցից ու վախից կատաղած՝ թաթերով փորում դեռ տաք մոխիրը ու քամուն տալիս:

Օր ու գիշեր զէնքի ու կատաղած մարդ-գազանի ոռնոցն էր լսում: Ամբողջ երկիրը տնքում էր: Հրճում էր դժոխային քրքիշով մարդ-գազանը:

Ամբողջ երկիրը մի նեխած փոս էր, որտեղից գարշահատութիւն էր խնկարկում երկնքի երեսին:

Լեռան բարձունքին, ուր երբեմն թափւած էին բանաստեղծի անթաղ ոսկորները, գիշերւայ խաւարի միջից թնդում էր բարձրաձայն ապստամբ ժողովրդի, ազատութեան յանդուգն երգը և խելագար աղջկայ արիւն պաղեցնող քրքիշը:

Իսկ ցածում, ինչպէս վայրագ ամեհի գազան, մռնչում էր դահիճների ոհմակը և զայրոյթից թաթերն էր կրծում:

Անմատչելի լեռան գագաթին արծւի նման բոյն են դրել այդ ժողովրդի անվեհեր զաւակները: Մահը այլևս սարսափելի չէ նրանց համար:

Մի անգամ նա թափ է տւել իր թևերը և կամ այդ բարձունքից կը գահվիժւի դէպի անդունդը, չուզենալով այլ ևս ստրուկ ապրել, կամ ազատութեան երգը ազատ կը հնչի ազատ դաշտերում:

ՄԻՔ. ՄԱՆՈՒԷԼԵԱՆ





# ՍԱՅԵԱԹ-ՆՈՎԱՅԻ ՎՐԱՑԵՐԷՆ ԵՐԳԵՐԻՑ

## Թարգմանչի կողմից

Այս երգերը ես թարգմանել եմ վրաց բանաստեղծ Գրիշա-  
շվիլու աշխատասիրութեամբ 1918 թ. լոյս տեսած Սայեաթ Նո-  
վայի վրացերէն նրգերի ժողովածուից, ուր աշխատասիրողը կա-  
րողացել է աշուղի երգերից հաւաքել միայն 28 կտոր:

Այն պատկերաւորութիւնները, գեղեցիկ և հրքեմն յանդուգն  
համեմատութիւնները, ածականների այն իւրայատուկ և անսպա-  
ռելի շտեմարանը, տարօրինակ, բայց դուրեկան ոճը, քաղցրահըն-  
չիւն և վարպետօրէն հիւսւած յանգերը, որոնք իրենց ճոխութեամբ  
ապշեցնում են Սայեաթ-Նովայի հայերէն «խաղերի» մէջ, վրացե-  
րէնում հանդէս են գալիս աւելի նւաստ չափով:

Սակայն դրանով չի կորչում մեր սիրելի աշուղի վրացերէն  
«ասած» երգերի արժէքը. նրանց մէջ էլ, ամեն մի տողում, ամեն  
բառի մէջ հանդէս է գալիս տաղանդաւոր երգչի ոյժն ու կորովը.  
այնտեղ էլ ամեն խօսքի մէջ Սայեաթ-Նովան զգացնել է տալիս  
րեն:

Նկատի ունենալով այդ ժողովածուի արժէքը հայ գրականու-  
թեան համար, ես ձեռնարկեցի նրա երգերի թարգմանութիւնը,  
որով դիւրութիւն տւած կը լինեմ հայ գրասէրներին՝ ծանօթանա-  
լու բանաստեղծի օտար լեզուով գրած երգերին:

Սկզբում որոշել էի ամենայն հարազատութեամբ և բառացի  
վերածել այդ երգերը հայերէնի, բայց գործը ցոյց տւեց, որ բա-  
ռացի թարգմանութեան դէպքում աչքաթող են արւում յանգերն  
ու վանկերը, որոնց տուժելը մեծ վիշտ կը պատճառէր Սայեաթ-  
Նովային և մեծ հարւած կը լինէր նրա աշուղական ոգու համար,  
մանաւանդ որ նպատակ էի դրել թարգմանել երգչի իւրայատուկ  
ոճով ու լեզուով:

Ուստի թարգմանութեան ժամանակ անհրաժեշտ համարեցի



որոշ բառեր (զլխաւորապէս ածականներ) աւելացնել կամ պակասեցնել, համաձայնեցնելով տողի իմաստին, քան թէ յանգերին մնասել, մանաւանդ որ ինքը Սայեաթ-Նովան էլ յաճախ իմաստը զոհում է տողերի վերջաւորութիւններին:

Հնարաւորութեան սահմաններում ես աշխատել եմ աշուղական ձևերը պահել խաղերի մէջ (կրկնակի յանգ), բայց որոշ դէպքերում ցանկութիւնս տեղի է տւել անկարելիութեան և ակամայից մի փոքր շեղել եմ:

Սեփական հայեցողութեամբ մտցրած բառերը ես վերցրել եմ էլի իր, աշուղի բառապաշարից, ինչպէս և առհասարակ թարգմանութեան համար համարեա բոլոր բառերը, դարձւածքները, ոճերը քաղել եմ աշուղի հայերէն գրքից:

Երբեմն վրացերէնում պատահել են բառեր կամ ոճեր, որոնց նմանը չեմ գտել հայերէն Սայեաթ-Նովայի մէջ. այդպիսի դէպքերում օգնութեան է հասել ինձ Թիֆլիսի բարբառը, կամ Հախվերդեանի «Սայեաթ-Նովային» կցած Թիֆլիսի բարբառի քերականութիւնը:

## ԵՐԳ Ա.

Ի՞նչ կուլի եար մէ գամ մայինց միր տուն գաս,  
Վունցօր դամար<sup>1)</sup> միր կտրեմէն գիվեր գաս,  
Ծիծեռնակի պէս դռնեմէն դուս գնաս.

Ձիմ ուզում վուր անմեղ տիղը ման կուգաս,  
Բարկ<sup>2)</sup> էրեսըդ ամեն եադի շանց կուտաս:

Ամեն ծէգին ծագող արիւ ըլիմ իս,  
Ձիր հայեաթում տնկած մի ծառ ըլիմ իս.  
Կացնով մի տայ, պէտք գուքամ, թո՛ղ ըլիմ իս  
Եար, քու դրան հարիվանը ըլիմ իս,  
Բլքամ<sup>3)</sup> մէ ջէր<sup>4)</sup> ձիր տան նման միր տուն գաս:

1) Լուսնեակ, 2) Լուս, վայլուն, 3) Գուցէ, 4) Մի անգամ:



Մարթ ձեռնեմէդ շունչը բերնին չի մնայ,  
 Ջիւ ուզում, վուր վրէս քեզնից պարտք մնայ.  
 Ինձ դադիւր ըսկի էլ քիզ չի մնայ,  
 Եար, դիդարըդ<sup>5)</sup> անց կու կենայ չի մնայ,  
 Աստղի նման թէկուզ<sup>6)</sup> երգինք բարձրանաս:

Սայեաթ-Նովա, զար<sup>7)</sup> ու զարբաբի<sup>8)</sup> վրէն,  
 Խալաթի պէս գցէ ուսերի վրէն,  
 Վայ թէ մէքաշ փուտը դընի<sup>9)</sup> ջադիմէն<sup>10)</sup>  
 Ճուրդ կու դառնամ չիւ հեռանայ դռնէմէն,  
 Հողի նման ինձ տրորիս անց կենաս:

### ԵՐԳ Բ.

Էշխեմէդ քու դուլն<sup>1)</sup> իմ դարի, էլ եադ նօքարն ի՞նչ իս  
 անում,  
 Իմ թահար<sup>2)</sup> քիզ ծվ կու սիրէ, բէբափա<sup>3)</sup> խարն<sup>4)</sup> ի՞նչ  
 իս անում:

Հնդու թաքավուրի տախտն իս՝ հին դիբայի նհալավուր<sup>5)</sup>  
 էրնէզ քի մօդ գըթընւողին, — նազ ծուցըդ լիքը մըշկավուր<sup>6)</sup>.  
 Օսկէ տախտակնիրն սազում է մարմարիլօյի կօշկավուր<sup>7)</sup>.  
 Պուճուր բիրթ իս, սիրեկան եար, գուղի դուռն ի՞նչ իս  
 անում:

Բանցր սար իս, ձուկով ծածկած վըրէդ մանիշակըն լիքն է .  
 Շիմշադի<sup>8)</sup> ծառ, նախշած ունքըդ անտառի պէս  
 թանձրացիլ է .

<sup>5)</sup> Գեղեցկութիւն, <sup>6)</sup> Նոյնիսկ, եթէ, <sup>7)</sup> Դիպակ, <sup>8)</sup> Կերպաս, <sup>9)</sup> Չըհաւանել  
<sup>10)</sup> Տոհմ, ցեղ:

<sup>1)</sup> Սարուկ, <sup>2)</sup> Նման, պէս, <sup>3)</sup> Անհաւատարիմ, <sup>4)</sup> Ճիճու, որ ծծում է  
 վարթի սիրտը, <sup>5)</sup> Դօշակ, <sup>6)</sup> Հնդկաստանի բոյս, որի պտուղները հիւթը անու-  
 շահոտ է, <sup>7)</sup> Դղեակ, <sup>8)</sup> Մառի տեսակը:



Թիբաթվի<sup>9)</sup> բաղ ու բախչայ իս, բուլբուլը վրէժ երգում է.  
Կոկոր<sup>10)</sup> վարթ իս հենց նուր բացված խարի պէս դոստն  
ի՞նչ իս անում:

Ա՛րի, ազիզ, էս աշխրքում մէկըսմէկուց ձեռ չքաշինք.  
Ծուցիդ անուշահուտ ուհանն թաքուն իս ու դու  
բաժանինք.  
Էրնէկ կուլի վուր իս ու դու մէ օթախում մենակ ըլինք.  
Լսէ, Սայեաթ-Նովի խուսքը, բացարած<sup>11)</sup> ջառն<sup>12)</sup> ի՞նչ իս  
անում:

### ԵՐԳ Գ.

Գանա էնէնց սօված էի վուր ուտելու համա էկա—  
Քիզ իդ սօյբաթ<sup>1)</sup> էի ուզում, մօդդ էդու համա էկա.  
Ուզում իմ քի մօդ լուսացնիմ՝ ես գիշերու համա էկա.  
Մոռացայ, չիմ կանում ասի... ինչօր բանի համա էկա:

Դուն թաքավուրական թագն իս՝ նաչար<sup>2)</sup> գլուխս  
վունչիչումը.  
Դիախ, գուքվիլ-գարթարվիլ իս դիբայումը, ատլասումը.  
Դուն տաշած բրօլէ<sup>3)</sup> տախտակ իս, գար սանդալի<sup>4)</sup>  
փանջարումը<sup>5)</sup>.  
Էրէսըդ օսկէ հալիլա, քի մօդ ջամու<sup>6)</sup> համա էկա:

Էնդու համա թանդ հախ ունիս՝ դիպակ իս, ալ գարբաբ  
ու գար.

Խօրասանի շրքար փօլադ, Հնդըստանի հին դալամբար.

<sup>9)</sup> Յունիս (վրացերէն), <sup>10)</sup> Կոկոն, <sup>11)</sup> Կազմ ու պատրաստ, <sup>12)</sup> Զօրք:

<sup>1)</sup> Սիրային խօսակցութիւն. <sup>2)</sup> Դժբախտ, <sup>3)</sup> Բիւրեղեայ, <sup>4)</sup> Ծառի մէ  
տեսակը Հնդկաստանում, որի փայտից պատրաստում է ազնիւ տեսակի կարա-  
սիք, <sup>5)</sup> Պատուհան, <sup>6)</sup> Հայելու լաւ տեսակի ապակի:



Հեռու տիղանց սովդագար իմ՝ դու Մարանդի գուքած  
բազար.

Զար-զարբաբի հախը չունիմ, քի մօդ խամի<sup>7)</sup> համա էկա:

Իմ աչքի լուս, պարտք դի վրէս—շահի<sup>8)</sup> տիղըն լիգուս  
կուտամ.

Ազիզ գլուխս բարաթի տիղ, մէջլիսներու<sup>9)</sup> սափէն<sup>10)</sup>  
կուտամ.

Համաշա քու դուռը գուքամ, գըլուխս քիզ մատաղ կուտամ.

Ան սպանի, ան ումբըրս բախշի՝ քի մօդ էդու համա էկա:

Համան<sup>11)</sup> աշխարքըն մօդ ըլի՝ գովքիդ անիլն չի ըլի.

Ի՞նչ Հընդստան, ի՞նչ Փռանգստան քու դումանը<sup>12)</sup> վուրդի  
կուլի.

էս խիղճ, բէշար<sup>13)</sup> Սայեաթ-Նովէն ամենի խղճալուն կուլի՝

Վիր կացայ Հալաբն անցկացայ, Ուրումէլու համա էկա:

### ԵՐԳ Դ.

Ի՞նչ զարբաբ իմ, իս ինչ զար իմ, ի՞նչ ատլաս իմ, գիդիս  
գանան.

Վարթ-մանիշակն ինձմէն հասրաթ<sup>1)</sup>, ի՞նչ քամի իմ, գիդիս  
գանան.

Սազը համաշա ձեռիս է, իս նօքար իմ՝ գիդիս գանան.

Ծնուղքըդ մալում ին արէ<sup>2)</sup>, ինքըդ կի չը գիդիս գանան.

Բաս վարավուդ<sup>3)</sup> չիս արէ դուն, բաս վունչիչ չը գիդիս  
գանան:

Հիմի արի թարիփ անիմ<sup>4)</sup> աշխըրքումը վունց ման էկայ.

<sup>7)</sup> Սպիտակ չներկած, չասեղնագործած գործածք, <sup>8)</sup> Տոկոս, <sup>9)</sup> Խնձոյք, <sup>10)</sup> Ուրախութիւն, խրախճանք, <sup>11)</sup> Ամբողջ, <sup>12)</sup> Նմանը, համեմատը, <sup>13)</sup> Դժբախտ:

<sup>1)</sup> Կարօտ, <sup>2)</sup> Մալում անել—նկատել (սլը.), <sup>3)</sup> Նկատել (վրացեր.), <sup>4)</sup> Պատմել:



Լէյլու նման եարիս կորցրի՝ Մէջլուամի պէս իս ման էկայ.  
Բըլբուլ իմ՝ վարթին պըտուեցի, անտառումն դիվեր էկայ  
Վարթի նշանը չըգթայ դիփ անմիղ տիղն ման էկայ.  
Շանց տըւի արիվ էրէսըս, իս էրած իմ, գիղիս գաննա:

էս իմ սըրտի դառը լեղին իմաց տւի Իրանէթին.  
Արիվիլքին, արիվմուտին, թաքավուրին, ազգին փիրին <sup>5)</sup>.  
էստու աւել ինչ զօռ ունիմ, կուսպանիմ ինձ հուրիս  
կուղքին.

էսքան էլ իլթիմազ <sup>6)</sup> կուլի, ավտա, դէղի մինուճարին,  
Հալեցիր հալ ու մաշ արիլը — իս շաքար իմ, գիղիս գաննա:

Աշունքվա վուխտն հասիլ է, էլ իս ինչի յիդ կու մնամ  
էտէդ քու վարթն ասոււմ է՝ կու մեռնիմ, ան սաղ կու մնամ.  
Ինձ համա վուր լեղի չըլիս — շատ էրգէն ումբըր <sup>7)</sup>  
կուներնամ.

Անգան արն, մատաղ իմ քիդ, էս գիշեր քի մօդ կու մնամ.  
Շուտ-շուտ կօսիս. «վի կաց գնն», իս դօնաղ իմ, գիղիս  
գաննա:

Սայեաթ-Նովէս գանգատավուր, մէ սուր նիտ չիմ կանոււմ  
ճարի.

Ուզոււմ իմ վուր սիրտս խուցիմ ու մի թուր չիմ կանոււմ  
ճարի.

Ծուցիդ գօզալ շուխտ նըռների թաքուստըն չիմ կանոււմ  
ճարի.

Ռւֆ, ցաւում է գլուխըս, սիրտըս ու մէ դիդ չիմ կանոււմ  
ճարի.

Բէրում իմ գարէ ծածկոցը — հանաքչի իմ, գիղիս գաննա:

<sup>5)</sup> Ծեր, գլխաւոր, <sup>6)</sup> Աղաչանք, աղերսանք, <sup>7)</sup> Կեանք:



## ԵՐԳ Ե.

Եանր, սրտեմէս չիմ խնայի հօքիս քիզ ամա.

Սաղ աշխրբի մալն<sup>1)</sup> ու փուղը, ազիզ, քիզ ամա.

Հախով արած ճուրտն իմ, դուլն իմ մէջլիս՝ քիզ ամա.

Դաղեցիր եանր, էրած, անհալ, անտիս քիզ ամա.

Ամառ, ձրմիռ տված ունիմ հօքիս քիզ ամա:

Քու ջամալը<sup>2)</sup> լաւն է, գօզալ, քաշած<sup>3)</sup> սըրփէմէն.

Քարգա<sup>4)</sup> կարելումն անցկացար<sup>5)</sup> ուստաքարէմէն<sup>6)</sup>.

Ջան, իշվում իս<sup>7)</sup> դուն համաշա սաղ աշխարքէմէն.

Քունըս փախչում է գիշիրը իմ թաց աչքէմէն

Վառ էշխէմէդ ջունուն<sup>8)</sup> էլաւ հօքիս քիզ ամա:

Մթնում պայծառ լուս իս տալի—փարոսի նման.

Սազում է զարէ շուրիդդ՝ զարբաքի նման.

Բօլօրվիլ<sup>9)</sup> իս լաւ իրիգվայ լուսնակի նման.

Սիրունոց մէջ նամուսավուր չկայ քիզ նման.

Գօված խաղեր կօծիմ, կօսիմ, հուրիս, քիզ ամա:

Սիրեկան եար, Մաջնունիդ հիդ ինչի խոօվ կացար.

Օվ դիդից քիզ, վուր խելքէմէն էտէնց շըշմեցար.

Վայ, իմ օսկէ անգին սըհաթ, ինչի փըշացար.

Սայեաթ-Նովի համա վունցօր վարթը բացվեցար.

Բլթուլ սարից դիվեր գուքայ՝ մայիս, քիզ ամա:

1) Կարողութիւնը, 2) Կերպարանք, 3) Նկարած, 4) Ձեռագործ, 5) Գերազանցեցիր, 6) Վարպետ, մեծ, 7) Յիշուում ես, 8) Խելքամաղ, 9) Լցւել ես, կողորւել ես:



## ԵՐԳ Զ.

էս հանդի սուտ, ըսկի չէի իմացել,  
Եկայ տեսայ—դուռը բաց 'ի գիդացել:

Սուրմի<sup>1)</sup> համա ուզում իս օսկէ միւրն<sup>2)</sup>  
Քաթիբայիդ—Հայիջանի<sup>3)</sup> լալ<sup>4)</sup> դիւրն<sup>5)</sup>.  
Անուշ հուտդ հէնց ա՛ միխակն ու հիւրն.  
Ո՞վ էր տեսի էս վուխտըն քու քընիւրն.  
Էրագոււմըդ, եւր, ուր էիր գնացել:

Իս ալ ճիճու, իմ բաբաթը<sup>6)</sup> անգին ա.  
Սերկեիլ իմ, շարթըն<sup>7)</sup> ծուցըդ ինձ բինա.  
Խուփի նման ծածկի, ջանըս տաքանա.  
Մանիշակ իմ, տաքութէնիդ չիմ դիմնա.  
Քի վարթ, ինձ կի կօնա<sup>8)</sup> էիր գիդացել:

Էրէխու պէս էդ ինչ ժին ու ժանգ<sup>9)</sup> ունիս.  
Գէմու նման ծօլի մէջըն լանգ<sup>10)</sup> ունիս  
Ինձ քնեցրու՛ թրիաք<sup>11)</sup> ունիս, բանգ<sup>12)</sup> ունիս.  
Սայեաթ-Նովէմէն իփրօ<sup>13)</sup> շատ յանգ ունիս.  
Դու զար բաղդադ<sup>14)</sup>—ինձ դուլ էիր գիդացել:

1) Անուշահոտ ներկ յօնքերի համար, 2) Խողովակ, 3) Թանկագին մեաադ-  
ների հայրենիքը (Պարսկաս.), 4) Թանկագին ակն, 5) Կոճակ, 6) Տեսակը, 7) Ան-  
հալ մեղր, 8) Ծաղկեփուռն, 9) Քմահաճոյք, 10) Սրելու մի բան (իսկ թէ այստեղ  
ինչ մտքով է գործածուում պարզ չէ), 11) Քնացնելու միջոց (խաշխաշ), 12) Խլա-  
քաֆօրմա, 13) Աւելի, 14) Մետաքսէ թաշկինակ:



## ԵՐԳ Է.

Բազի մարթ կայ ջլիս անպիտք ու անգոր՝  
 Ղօչաղ մարթու ուժն ու դօռը կուփըտնի<sup>1)</sup>.  
 Հարցնիս՝ ջըբում ժանգոտ դանակ էլ չունի.  
 Խօրասանի փօլադ թուրըն կուփըտնի:

Շատ մարթ էլ կայ՝ գուրկ է, չունէ մի բինա<sup>2)</sup>  
 կումըթնեցնի, սաղ օրը տուն չի գնայ.  
 Կօսէ՝ խուրմէն ու կաղինը մի գին ա.  
 Բաղը կեհա՝ հասած բալին կուփըտնի:

Մարթ կայ ծօվը կումըտանի նաւի պէս.  
 Գուրդը կուղբին կու էրէփնայ սիվի պէս.  
 Մարթ կայ անհալ դուսն է ննգած խիղճ, անտես.  
 Թէ տուն մտաւ՝ Ռոստոմ Չալին կուփըտնի:

Չորանն ինչ կօնէ ալմաս, ջավայիր.  
 Թաք<sup>3)</sup> համաշա նա ունենայ նուր պանիր.  
 Գլխի տակ քար, վուտին թագա տըրեխնիր.  
 Բէքթաբէգի քիրման շալըն կուփըտնի:

Խուզը ծառին վունց կանա դի՛ վեր գնա.  
 Նաքազ<sup>4)</sup> մարթը աշխըրքեմէն դուս գնա.  
 Սայեաթ-Նովէն վուր մէջլիսում տուն գնա.  
 Չօղ<sup>5)</sup> է սիրում, դալմաղալը կուփըտնի:

<sup>1)</sup> Չըհաւանել, <sup>2)</sup> Տեղ, տուն, <sup>3)</sup> Միայն թէ, <sup>4)</sup> Անպէտք տմարդի <sup>5)</sup> Բէք:



## ԵՐԳ Ը.


Ձիւրը վիկալ, վաղ մարթութիւն չիմ ուզում.  
 Սշխրթումը մասխարութիւն չիմ ուզում,  
 Վաղ խուսկի ասիլը բութիւն<sup>1)</sup>, չիմ ուզում,  
 Բափա<sup>2)</sup> իմ քիզ. խայանութիւն<sup>3)</sup> չիմ ուզում,  
 Իս մէ խիղճ մարթ, թավադութիւն չիմ ուզում:

Արի արինըս մի վիթի դուն թասով,  
 Եւր, արած իմ լուս սուրաթիդ թանգ հախով  
 Մօղըդ գնլքամ Իրանէթի ես ծէսով,  
 Պահի քի մօդ ինձ ատլասով ու խասով  
 Սիվ դէիւրէն, քօբէն<sup>4)</sup>, դութիւն չիմ ուզում:

Ազիզ, խուսկս սրտիդ աւտալուն ըլի.  
 Ղումաշ<sup>5)</sup> դէյրիդ փէշն իմ բրբնելուն ըլի.  
 Գլուխըս ոտիդ տակին շաղ տալուն ըլի.  
 Բաղըդ՝ բախչիս կուղքին շինելուն ըլի.  
 Մէշտիդ դօբա<sup>6)</sup>, բաժանութիւն չիմ ուզում:

Անց է կացել վուխտըդ, անխ, Սայեաթ-Նովա,  
 Էլ ինչ կօնիս «անխ ու վանխ» Սայեաթ-Նովա,  
 Համան կօսին «չորցած բաղ», Սայեաթ-Նովա,  
 Ո՛ւր իս գնում, եկ միւր թաղը Սայեաթ-Նովա  
 Աղն ու հացըդ, ախպէրութիւն չիմ ուզում:

Թարգմ. Դր. Գրիգորեան



<sup>1)</sup> Սիր ահար, <sup>2)</sup> Հաւատարիմ, <sup>3)</sup> Անհաւտարմութիւն, դաւաճանութիւն,  
<sup>4)</sup> Շրջագոգեստի փէշի ժապաւէնը, <sup>5)</sup> Թանկազին գործածք. <sup>6)</sup> Ցանկապատ  
 Գրակ. - Գեղարւ. Ալմանախ



## ԱՐԵՒԵԼՔ

## 1.

Կը քայլես օրօր-շօրօր, թեթևոտ եղնիկ ես դու.  
 Մայիսի վարդի նման, հովի պէս մեղմիկ ես դու.  
 Չորս գիշեր մէկ տեղ էինք, Գիւլիստանն ինչեր տեսաւ...  
 Այս առտուն յոգնած մի քիչ, քչիկ մի դեղնիկ ես դու:

## 2.

Թէ մարդկանց դիւան նստեմ՝ ինձ դայլան ու բարձ կուտան.  
 Ընկերներս ամենք մէկէն քո մասին ինձ հարց կուտան.  
 Աշուղներ գովքըդ կերգեն, ջաննաթի փերին ես դու,  
 Կը կարծեն եարըդ ես եմ՝ ինձ պատիւ ու վարձ կուտան:


## 3.

Քեզմէ զատ երկրի վըրայ գեղանի փերի չկայ,  
 Մարմարէ մարմնիդ վըրայ ոչ մի բան թերի չկայ,  
 Ողջ մարդկանց ճամբուդ վըրայ կոխ կուտաս, անփոյթ  
 կերթաս,  
 Ոչ մի մարդ ինձի նըման նազանքիդ գերի չկայ:

## 4.

Քո կուրծքը ճերմակ կաթ է, անուշ սեր սառած վըրան,  
 Մի ջուխտակ վախկոտ հաւքեր կը դողան թառած վըրան.  
 Մօտեցայ սառած սերին, որ մի քիչ համտես ընեմ,  
 Անսիրտ ես, խնձկ աղջիկ, պինդ քօղ ես առած վըրան:

Ազատ-Վշտունի





# „ԽՐՈՆԻ ԿԵՑՐԸ

## I.

«Մի գրող, որին ոչ ոք չի ճանաչում և...»:

Ահա այսպիսի տապանագիր ունի նրա գերեզմանաքարը. էլ ուրիշ ոչ մի խօսք, ոչ մի բառ և ոչ մի թիւ չէք կարող գտնել նրա անշուք շիրիմաքարի վրայ: Ուրիշ, սովորական մահկանացուների պէս չէ նրա գերեզմանաքարը, որի վրայ կարդաք մեռածի ծննդեան և մահւան թւականը, նրա անունն ու ազգանունը, նրա պաշտօնն ու գործերը և կամ թէ՛ ինչ հիւանդութիւնով ու պատահարով է մեռել: Չէ, իզուր էք այդպիսի յիմարութիւններ որոնում նրա գերեզմանաքարի վրայ: Որ կողմն էլ դարձնէք նրա տապանաքարը, ինչպէս էլ որ շրջէք, միայն ու միայն կը կարդաք հետևեալ խօսքերը. «Մի գրող, որին ոչ ոք չի ճանաչում և...»:

Կարիք չկայ նրա անունն ու ազգանունը գրի առնել, որովհետև հաւատացած եմ, որ ձեզանից և ոչ մէկը լսած չի լինի նրա անունը, բայց եթէ շատ էք փափագում լսել, ես կասեմ. դրանով ոչինչ չեմ կորցնի:

Նրան կոչում են Խաչիկ Խաչիկեան: Նա միջահասակ, կլոր դէմքով, լայն ճակատով, բարի և միամիտ արտայայտութեամբ մի ծերուկ էր: Նրա գլխի մազերը ամբողջապէս ճերմակել էին, իսկ ճաղատութիւնը պատկառանք էր ազգում մարդուս: Նա շատ ժլատ էր, որովհետև ամուրի էր: Նա արդէն թեքւել էր դէպի արևմուտք, իսկ



նրա կէսօրը անաղմուկ, միալար և անարդիւնք էր անցել: Առանձնութեան մէջ նա յաճախ յիշում էր իր անպտուղ օրերը, բայց արդէն ուշ էր, շատ ուշ...

Նա մեռաւ ուղիղ յիսուն և մէկ տարեկան հասակում և ոչինչ չթողեց իր ետևից, ոչ յիշատակ, ոչ ժառանգ և ոչ էլ հարստութիւն:

Նրա կեանքի պատմութիւնը շատ անպաճոյճ է. նա ինքն էլ էր այդ խոստովանւում և ոչ ոքից չէր թագցնում: Նա միաժամանակ մտադիր էր իր կեանքի պատմութիւնը գրի առնելու, սակայն ձեզ հաւատացնում եմ, որ նա մեռաւ առանց մի տող գրելու:

Երբ Խաչիկ Խաչիկեանը վերջացրեց միջնակարգ դըպրոցը՝ արդէն քսան և մէկ տարեկան էր. այդքան ուշ աւարտելու միակ պատճառը չքաւորութիւնն էր:

Ամեն ամբան, երբ գաւառական քաղցած վարժապետներն ու վարժուհիները հեղեղում էին քաղաքի յայտնի հրապարակներն ու փողոցները և շարունակ գանգատում իրենց անշնորհակալ պաշտօնից, Խաչիկ Խաչիկեանի դէմքը մռայլում և յուսահատութիւնը ծիծաղում էր նրա վախկոտութեան վրայ. հենց այդ պատճառով էլ նա որոշել էր հեռու մնալ գաւառից ու վարժապետութիւնից:

Ճիշտ է. քաղաքում ապրելը գերադասելի է գաւառից, բայց որ համապատասխան գործ չես կարող ձարել, ի՞նչ պիտի անես. քաղաքում ապրելու համար կամ գործակատար պէտք է լինես կամ հաշւապահ և կամ թէ վաճառական, իսկ Խաչիկ Խաչիկեանը ոչ էս էր, ոչ էն: Որովհետև Խաչիկեանը վճռել էր անպայման քաղաքում ապրել, դրա համար էլ առանց ժամանակ կորցնելու սկսեց յաճախել հաշւապահական կուրսեր և մի փառաւոր օր դարձաւ հաշւապահ:

Սակայն ինչպէս մեզանից շատ շատերը, այնպէս էլ նա բախտաւոր աստղի տակ ծնւողներից չէր. նա շատ, դէս



ընկաւ, դէն ընկաւ, բազմաթիւ վաճառականների ու գործարանատէրերի դռները մաշեց, բայց ոչինչ դուրս չեկաւ, և Խաչիկեանը մնաց անգործ: Այդքան թափառումներից յետոյ միայն մի տեղ նրան պաշտօն տւին, սակայն երբ իմացան, որ նա իտալական եղանակով հաշւապահութիւն չգիտէ, իսկոյն դուրս արին:

Այդքան անյաջողութիւնները նրան չէին կարող վրհատեցնել, քանի որ նա վճռել էր անպայման քաղաքում ապրել:

Մի առաւօտ, նա ծոյլ-ծոյլ վեր ելաւ անկողնից, չըկամութեամբ լացւեց, տանտիրուհու ինքնաեռից թէյի համար տաք ջուր վերցրեց, միւս օրւանից մնացած հաց ու պանիրը բերաւ սեղանի վրայ, վերցրեց առաւօտեան նոր ստացւած լրագիրը՝ սկսեց կարդալ ու նախաճաշել միաժամանակ:

Չնայած, որ նա քաղաքական այս ու այն հոսանքին չէր պատկանում, բայց այն լրագիրը, որին բաժանորդագրւել էր՝ համարւում էր ձախակողմեան կուսակցութեան կիսապաշտօնական օրգան. եթէ Խաչիկեանը փող և պաշտօն ունենար՝ աջակողմեան օրգանին էլ կը բաժանորդագրւէր, որովհետև սիրում էր բանակուիւնները կարդալ: Լրագիրը նրա համար այն էր, ինչ որ գինին հարբեցողի՝ իսկ ծխախոտը ծխողի համար. առանց լրագրի ընթերցանութեան նրա նախաճաշը անհամ էր անցնում: Երկուշաբթի և տօների յաջորդ օրերը, երբ թերթերը լոյս չէին տեսնում, ստիպւած էր հիւն, փոշոտւած, լրագրի համարներ կարդալ և այդ նրա համար շատ դժւար էր: Այդպիսի օրերին նա անւանում էր «անանկութեան և անպտուղ օրեր»:

Լրագրի բաժիններից Խաչիկեանին շատ էին դուր գալիս Լրատուն, Ոստիկանականը, Դատաստանականը և յայտարարութիւնները: Այս չորս «կարևոր» բաժիններից



զատ, նա միւս բաժինները վրայ շատ թեթև աչքով էր նայում, իսկ առաջնորդողն ու «Գալառական կեանքը» երբէք չէր կարդում. «Գալառական կեանք» խորագիրը կարդալիս՝ նրան թւում էր, թէ իրեն զօրով տանում են վարժապետութեան և սոված են թողնում:

Այդ առաւօտը, երբ Լրատուն, Ոստիկանական և Դադաստանական բաժինները կարդալուց յետոյ անցաւ յայտարարութիւններին, թերթի հենց առաջին երեսի վրայ գեղեցիկ, աչքի ընկնող շրջանակի մէջ նա կարդաց այսպիսի մի յայտարարութիւն.

«Թերթիս գրասենեակի համար հարկաւոր է մի փորձած կառավարիչ, որ պէտք է ծանօթ լինի իտալական եղանակով հաշւապահութեանը»:

Կարդալով յայտարարութիւնը՝ թերթը նրա ձեռքից ընկաւ, որովհետև «իտալական եղանակով» բառերը խոշոր տառերով էին շարւած: Մի քանի րոպէ տևող ապշութիւնից յետոյ, նա ինքն իրեն հաւաքեց և սկսեց խելագարի պէս ձեռքով-ոտքով շարժումներ անել և ինքն իրեն խօսել. նա գիւտ անողի պէս յանկարծ մեխւեց յատակին՝ աչքերը ուղիղ մի կէտի յառած: Այդ դրութեան մէջ երկար չմնաց. նա հագաւ վերարկուն, դրեց անգլիական կոտրն ընկած վաճառականի գլխարկը և վերցնելով սեղանի փոքրիկ հայելին՝ սկսեց ուշի-ուշով դիտել իր դէմքը: Շատ քնելուց նրա աչքերը ուռել էին և դէմքը բութ արտայայտութիւն ունէր. շրթունքների վրայ մնացած հացի և պանրի փշրանքները սրբեց, աջ ձեռքով ուղղեց մաշած և կեղտոտ փողկապը և, դէմքին մի քանի ծամածոութիւններ անելով, հայելին վայր դրեց ու դուռը կամաց բանալով գողի նման դուրս սողաց:

Խաչիկեանը այնքան էր տարւել «ընդունել-չընդունելու» հարցով, որ չէր զգում, թէ ոտքերը ինչպէս է փոխում և ո՞ր փողոցն է հասել: Այդպիսի անըջային դրու-



եանթ մէջ՝ նա գլուխը ամուր խփեց հեռագրասիւնին և սթափւեց: Նա իսկոյն նայեց ետ ու առաջ՝ տեսնելու համար, թէ իրեն ոչ ոք չնկատեց և երբ տեսաւ, որ քաղաքապահ ոստիկանը ծիծաղում է, ինքն էլ ծիծաղեց:

— Երբեմն ինձ էլ է այդպիսի բաներ պատահել, — ասաց ոստիկանը, — բայց ես երբէք գլուխս սիւներին չեմ խփել, այլ ուղիղ մարդկանց կրծքին. անցեալ օրը քիթ ու բերանս շիփ-շիտակ խփեցի մի կնոջ ծծերի մէջ տեղը. ես ներողութիւն խնդրեցի, բայց նա դէմքը խոժոռեց ու անցաւ:

— Բախտաւոր մարդ էք, — պատասխանեց Խաչիկ Խաչիկեանը և շփելով ճակատը շարունակեց ճամբան: Հասնելով խմբագրատան առաջ՝ նա կանգ առաւ, մի անգամ ևս ձևեց-չափեց իր ասելիքը, սերտեց քաղաքավարութեան ձևերը և երբ ամեն բանով իրեն պատրաստ զգաց՝ աստիճաններով բարձրացաւ:

Խմբագրատան սանդուխի կեղտոտ աստիճաններն անգամ նրան բարի, ազնիւ և մարդասէր էին թւում. նրան մի բան վատ թւաց, որ խմբագրատանը դռնապահ չկար, որից կարելի լինէր նախօրօք տեղեկութիւններ հաւաքել այն մարդու բնաւորութեան մասին, որին ինքը պիտի ներկայանար և այն մասին, թէ առհասարակ ի՞նչպէս է խմբագրատան կարգ-կանոն ու սովորութիւնները:

Չուզելով երկար սպասել, նա գողավարի դուռը բացաւ, ներս մտաւ ու կանգնեց նախասենեակում դրւած հագուստի կախարանի մօտ, մի ըռպէի չափ սպասեց... Բայց այն կասկածը, որ կարող են գրպանահատ կարծել՝ նրան հրեց դէպի դիմացի դուռը ու նա ակամայ ներս մտաւ: Այնտեղ, ուր նա մտաւ, փոքրիկ, հազիւ երկու սեղան պարտակող սենեակ էր: Սեղանի առաջ նստած էր փայլուն ճակատով, ալեխառն մազերով, մօտ քառասունընէնգ տա-



րեկան մի պարոն, որ և՛ ծխում էր, և՛ սրբագրում: Նա այնքան էր տարած աշխատանքով, որ երբէք զլուխը չբարձրացրեց ներս մտնողին տեսնելու համար:

— Էս ա՛ պրծայ, — ասաց նա, ներս մտնողին գրաշար կարծելով և սրբագրութիւնը շարունակելով:

«Մեր գիւղում աղջիկ շատ են փախցնում. համարեա Աստուծոյ օր աղջիկ են փախցնում, նամանաւանդ երիտասարդները աղջիկները իրենց կամքովն են փախչում»:

Այս տողերը կարդալիս սրբագրիչը մի քանի անգամ զլուխը շարժեց, բերանը չփչփացրեց և ինքն իրեն ասաց.

— Այսպիսի թղթակցութիւն կը գրեն. այսպէս հայերէն կը լինի. սա ի՞նչ խայտառակութիւն է. սրա համար է, որ թերթը միշտ ուշանում է: Այս ասելով, սրբագրիչը գրչի մի քանի հարւածով անդամահատեց թղթակցութիւնը և այսպէս գրեց.

#### «Գաւառական կեանք»

«Մեր գիւղը կովկասի ամենայետրնկած գիւղերից է. ունի 67 տուն. բացի ինձանից, բոլորն էլ անգրագէտ են. երբ ես գիւղից բացակայում եմ՝ խեղճ գիւղացիները իրենց նամակները հարեան գիւղումն են կարդալ տալիս: Այսպիսի լուսաւոր դարում մեր գիւղը դեռ գալրոց չունի»:

— Այս էլ գնաց, — ասաց սրբագրիչը, մի քանի անգամ կարդալով իր գրած թղթակցութիւնը:

Մի կողմ դնելով «Գաւառական կեանք»-ի սրբագրութիւնը, նա վերցրեց առաջնորդողը:

Խաչիկեանը արագիլի նման անձայն, անծպտուն դեռ կանգնել էր. նա շատ գոհ էր զգում, որ սրբագրիչը իրեն դուրս չի անում:

Սրբագրիչը սկսեց կարդալ առաջնորդողը.

«Ուրագանի նման կանցնեն մեր կեանքի դուալիզմն ու



դիսսօնանսը և մեր կեանքի սաղրանքի պանորամաները կընկնեն իրենց պիրամիդի բարձրութիւնից, իսկ կեանքի էւօլիւցիան անյեղիօրէն առաջ կընթանայ»:

Այս տողերը կարգալիս սրբագրիչը մերթ խմբագրի ձեռագրին էր նայում, մերթ սբագրում. եւրոպական բոլոր բառերը մի քանի անգամ էր համեմատում, որ չլինի թէ որևէ սխալ սպրնի, որովհետև նա լաւ գիտէր, որ դա ոչ գաւտուական թղթակցութիւն է և ոչ էլ խորհակա:

— Ըհը, պրծայ, — ասաց նա, գրիչը վայր դնելով և կարծեցեալ գրաշարին նայելով: — Ի՞նչ էք կամենում պարոն, — ասաց նա զարմանքից աչքերը շոյելով, — ներեցէք որ ձեզ սպասեցնել տւի, կարծելով թէ մեր գրաշարն էք:

— Ո՛չինչ, ո՛չինչ, — պատասխանեց Խաչիկեանը, — խնդրում եմ դուք էլ ներողամիտ լինէք, որ ձեզ անհանգրստացնում եմ. ես ուզում էի ձեզ հետ երկար խօսել:

— Բայց ինչի՞ մասին, — հարցրեց սրբագրիչը:

— Դուք այսօր յայտարարել էիք, որ ձեզ կառա...

— Կառավարչի պաշտօնի մասին հա՞, — ընդմիջեց սրբագրիչը:

— Այո՛, այո՛. ես եկել եմ այդ մասին խօսելու, — պատասխանեց Խաչիկ Խաչիկեանը:

— Այդ մասին դիմեցէք գրասենակ և հրատարակչի հետ խօսեցէք, որովհետև դա նրա գործն է, — ասաց սրբագրիչը՝ գլուխը քորելով և յօրանջելով:

— Ո՞րն է գրասենեակը:

— Աջ թևի վրայ:

Խաչիկեանը խոր գլուխ տուեց, նորից մի քանի անգամ ներողութիւն խնդրեց և մատի ծայրերի վրայ քայլելով, դուրս եկաւ ու դուռը ծածկեց: Նա չմտաւ գրասենեակ, այլ շնչարգել հազիւ իրեն փողոց գցեց և կանգնեց խմբագրատան դիմացի ծառի մօտ: Բաւական եր-



կար սպասելուց յետոյ, որոշեց տուն վերադառնալ, սակայն այդ որոշումը չիրագործեց, որովհետև սրբագրչի սիրալիր վերաբերմունքը նրան ընդունելու յոյս էր ներշնչում:

Մինչ Խաչիկեանը այսպիսի տատանման մէջ էր, եկաւ խմբագրատան ծառան և համարձակօրէն ներս մտաւ: «Սա անպայման խմբագրատան ծառայողներէց կը լինի» — անցաւ Խաչիկեանի մտքով և բարձր բղաւեց.

— Է՛, պարոն, ներողութիւն, մի՛ ըրալէ:

— Ի՞նչ է, — ասաց ծառան կանգնելով սանդուխի կէսին:

— Դուք խմբագրատանն էք ծառայում:

— Էստեղ եմ ծառայում, բնա:

— Ի՞նչ գործ էք անում, — հարցրեց Խաչիկեանը մեղմ և սիրալիր ժպիտով:

— Ի՞նչ էք ուզում որ, բաժանորդ էք ուզում գրել:

— Ո՛չ:

— Բաս ի՞նչ:

— Թերթում կարդացի, որ ձեզ կառավարիչ է հարկաւոր:

— Յետոյ ի՞նչ:

— Ես կառավարիչ եղել եմ, — ստեց Խաչիկեանը:

Այդ լսելով, ծառան նայեց Խաչիկեանի կօշիկներին, որոնք ներկի երես շտեմնելով իսպառ ճերմակել էին, դիտեց նրա մաշկած գրպաններով և օձիքով վերարկուն, մի հայեացք ձգեց նրա գլխարկին և իր մտքում նրան համեմատութեան դնելով իրենց ակնոցաւոր և վերջին տարազով հագնւած կառավարչի հետ՝ ասաց.

— Դու էդ գործը կարող ես անել որ:

— Կարող եմ անել, — պատասխանեց Խաչիկեանը աղերսական տոնով, միաժամանակ հաւատացած լինելով, որ իր ընդունել-չընդունելու հարցը դրանից էլ է կախւած:



- Ֆրանսերէն գիտե՞ս որ, — հարցրեց ծառան:
- Ո՛չ, մի՞թէ հարկաւոր է ֆրանսերէն գիտնալ:
- Բաս ասու՛մ ես կարող եմ անել. մեր կառավարիչը համ ֆրանսերէն գիտէր, համ ռուսերէն, համ էլ գերմաներէն: Ափսո՛ս, նա շատ լաւ մարդ էր:
- Իսկ ինչո՞ւ դուրս արին:
- Դուրս արի՛ն. ո՞վ դուրս արաւ որ, նա ամսական 75 ռուբլի ռոճիկ էր ստանում, յետոյ ասաց, որ շինեն 100, չաւելացրին, նա էլ չմնաց: Է՛յ, ափսո՛ս, ափսո՛ս, — կրկնեց ծառան, — նա շատ լաւ մարդ էր. խմբագրատանը ինչ որ անում էինք, ձէն չէր հանում. մի անգամ ինձ չոռ չի ասել, բո՛ս, էդպէս կառավարիչ կը լինեն:
- Խաչիկեանը ուզում էր ասել, որ ինքը լաւ կառավարիչ կը լինի և ոչ մի ձայն չի հանի, ինչ որ կատարելի խմբագրատանը, բայց ամաչելով այդ մտքից՝ հարցրեց.
- Այդ գործի մասին ո՞ւմ կարող եմ դիմել:
- Մեր աղային. էլ ո՞ւմ կարող ես տեսնել որ, գործը նրանից է կախւած. նա որ ուզենայ՝ ինձ էլ կը վռնդի, խմբագրին էլ, բայց նա քեզ չի ընդունի, չէ, էդ կօշիկներով չես կարող ներս մտնել:
- Աղան այժմ խմբագրատանն է, — հարցրեց Խաչիկեանը:
- Նա էսպէս շուտ կը գո՞յ որ, նա կը գայ, է, ժամը 11-ին, 12-ին:
- Իսկ մինչև ե՞րբ կը մնայ խմբագրատանը:
- Էդ էլ բան եղա՛ւ. ինչքան ուզեց, էնքան կը մնայ. նրա կամքով չի՞:
- Մտաւորապէս եմ ասում:
- Ի՞ր մնայ մինչև ժամը երկուսը, երեքը, էդպէս:
- Ներեցէք որ ձեզ նեղութիւն եմ պատճառում, — ասաց Խաչիկեանը, — ի՞նչ տեսակ մարդ է ձեր աղան:
- Է՛, ես խօ չեմ կարող ասել, մարդ է էլի՞, կը



գաս կը տեսնես. ես հիմա գործ ունեմ, —ասաց ծառան և բարձրացաւ աստիճաններով:

Հենց որ ծառան գնաց, Սաշիկեանը նայեց իր վերարկուին, շալւարին և ապա դուրս եկաւ խմբագրատան բակից ու դիմեց կօշիկներ սրբողին:

Ուղիղ ժամը 12-ին նա խմբագրատան նոյն կեղտոտ աստիճաններով բարձրանում էր վեր: Այս անգամ նա սրահում չսպասեց, այլ բաց արաւ աջ թևի վրայ գտնւած սենեակի դուռը և ներս մտաւ:

Այստեղ դէմ առ դէմ նստել էին երկու պարոն, որոնք, կռացած գրասեղանների վրայ, խորասուզւած գրում էին: Սաշիկեանի բարևին նրանք չպատասխանեցին և այդ բանը շատ վատ ազդեց նրան: Դրանցից տարիքոտը, որ նստել էր մեծ գրասեղանի առաջ՝ քարտուղարն էր, իսկ երիտասարդը՝ փոխ-խմբագիր կամ աւագ աշխատակից. նրանց լուրջ և խոժոռ դէմքերը սարսափ էին ազդում Սաշիկեանին, և նա այն տպաւորութիւնն ստացաւ, որ իրենից առաջ այդ երկու պարոնները կուել էին և իրար մի լաւ ծեծել: Սաշիկեանը ընդունւելու յոյսը կտրեց և ուզում էր դուրս գնալ, բայց ամաչում էր. նա երկար սպասեց և մտածում էր այն մասին, թէ ի՞նչպէս սկսի՝ «ներեցէք պարոններ», թէ՛ «յարգելի հրատարակիչ և խմբագիր» ասի:

Մինչ Սաշիկեանը մտածում էր այդ մասին, երիտասարդը գլուխը բարձրացրեց և դիմելով քարտուղարին ասաց.

— Կարծեմ կովկասեան ազգաբնակչութեան մասին իմ կազմած ստատիստիկան յուլիս ամսին է տպւած, չէ:

— Չեմ յիշում, — պատասխանեց քարտուղարը, — առանց գլուխը բարձրացնելու, — բայց մի բան գիտեմ, որ տաճկահայերը ստատիստիկա չեն սիրում:

Դարձեալ տիրեց լուռութիւն: Սաշիկեանը իր ներկայութիւնը զգացնել տալու համար սկսեց դիտմամբ հազալ



և կոկորդը մաքրել: Քարտուղարը մի բոպէ ընդհատեց իր աշխատանքը, գրպանից հանեց ծխախոտը, ցուցամատով և բթամատով յարդարեց պապիրոսը, վառեց լուցկին ու սկսեց ծխել և ռնգածակերից ծուխը դուրս թողնել: Խաչիկեանը այդ բոլորը ուշադրութեամբ դիտում էր, երբ քարտուղարի հայեացքը հանդիպեց նրա հայեացքին:

— Ո՞ւմն էք սպասում, պարոն, — հարցրեց քարտուղարը:

— Ներեցէք, պարոն հրատարակիչ, — դողալով ասաց Խաչիկեանը, — ես կարդալով ձեր թեր:..

— Հրատարակչի՞ն էք ուզում տեսնել. խնդրեմ, դիմեցէք գրասենեակը, ձեզ ցոյց կը տան, — ընդմիջեց քարտուղարը և առանց լսել ցանկանալու գլուխը խոնարհեց գրասենեանի վրայ ու դարձեալ սկսեց աշխատել:

Խաչիկեանը այդտեղից դուրս գալով, միջանցքում հանդիպեց ծառային, որ մատուցարանով թէյ էր տանում գրասենեակ:

— Աղան եկե՞լ է, — հարցրեց Խաչիկեանը:

— Եկել է, բնա, ի՞նչ է, ուզում ես տեսնե՞լ:

— Ի հարկէ, ի հարկէ, խնդրեմ իմացնէք:

— Էս բոպէին:

Խաչիկեանի սիրտը սկսեց բաբախել. նրան թւում էր, որ անպիտան ծառան իրեն բամբասում է հրատարակչի առաջ, խորհուրդ է տալիս, որ իրեն չընդունեն: «Եթէ ինձ չընդունեցին՝ դրա միակ պատճառը իմ կեղտոտ արտաքինն է», — մտածում էր նա և մտքում հայհոյում ծառային, որ այդքան ուշանում է: Վերջապէս ծառան երևաց և ձեռքով դրական նշան արաւ. Խաչիկեանը հետևեց նրան, բայց ծառան նրան կանգնեցնելով ասաց.

— Վերարկուդ հանի:

Խաչիկեանը հնազանդեց և ապա հետևեց ծառային:



## II.

Այն սենեակը, որտեղ աշխատում էր թերթի հրատարակիչը, երեք դուռ ունէր, երկու պատուհան և ամբողջ խմբագրատան մէջ միակ սենեակն էր, որի յատակը զարդարւած էր մի մեծ գորգով: Սենեակի մի դուռը բացւում էր սրահում, միւսը՝ գրասենեակում, իսկ երրորդը՝ քարտուղարի և աւագ աշխատակցի սենեակում, որտեղից կարելի էր անցնել խմբագրի սենեակը, որի դուռը միշտ փակ էր և ընդունելութիւններն արգելւած: Որովհետև իրենք մտնում և հրատարակչին խանգարում էին, դրահամար էլ հրատարակիչը փակել էր սրահում և քարտուղարի սենեակում բացւած դռները: Այսպիսով, հրատարակչին տեսնել ցանկացողները ստիպւած էին գրասենեակով անցնել, իսկ գրասենեակը մի մեծ դահլիճ էր, որ ոչ փոստի էր նման, ոչ տպարանի, ոչ դեղատան և ոչ էլ մաքսատան, այլ պարզապէս մի մեծ սենեակ, ուր ումանք խօսում էին, ուրիշները ծիծաղում, շատերը վիճում, իսկ փոքրամասնութիւնը նստած աշխատում էր:

Ծառայի առաջնորդութեամբ Պաշիկեանը մտաւ հրատարակչի սենեակը. հրատարակիչը նստած գրում էր և Պաշիկեանի բարևին չպատասխանեց:

Թէև հրատարակիչը վաթսուներկու-վաթսուներկու հինգ ձմեռ էր տեսել, բայց դեռ առողջ էր և կենդանի ինչպէս քսան տարեկան երիտասարդ. նա գեղեցիկ էր և պարթև. նրա արծաթաթել մազերն ու թաւ յօնքերը վեհութիւն էին արտայայտում. նա բարձրահասակ էր ու թիք, ճակատը լայն էր ու բաց, իսկ նրա բնաւորութեան մէջ խրոխտութիւն և համարձակութիւն կար. և այդ առաջ էր եկել այն բանից, որ նա հարուստ էր, ունևոր. թէ ինչպէս էր նա ընկել աղքատ գրողների և ժուրնալիստների շրջանը, այդ պատմութիւնը Պաշիկեանին սկի չէր էլ հետաքրքրում:



-- Ի՞նչ էք ուզում, — հարցրեց հրատարակիչը:

Խաչիկեանը պահ մի լռեց և մի բանի անգամ թուրքը կուլ տալով ասաց.

— Ձեր թերթում կարդացի, որ գրասենեակի կառավարիչ է հարկաւոր. ես կարող եմ այդ պաշտօնը կատարել:

— Ո՞րտեղ էք ծառայել:

Խաչիկեանը մի անծանօթ վաճառականի անուն տւեց և ապա շարունակեց.

— Ես այդ պաշտօնը կը կատարեմ քիչ վարձատրութեամբ և հաւատարմութեամբ:

«Քիչ վարձատրութեամբ» խօսքերը հրատարակչին շատ դուր եկան:

-- Հաշւապահութիւն գիտէ՞ք:

— Այո:

— Իտալական եղանակով:

— Դժբաղդաբար ո՛չ:

— Ի՞նչ դպրոց էք աւարտել:

— Միջնակարգ:

— Իսկ ինչո՞ւ վարժապետութիւն չէք անում:

— Երեխաներ դաստիարակելու մէջ ինձ թոյլ եմ զգում:

— Հաշւապահ կամ կառավարիչ լինելը վարժապետութիւնից էլ դժւար է, — ասաց հրատարակիչը՝ բարձրաձայն ծիծաղելով:

Տիրեց լռութիւն:

— Էլ ուրիշ ի՞նչ պաշտօն՞ կարող էք կատարել:

— Ամեն բան յանձն կառնեմ, միայն թէ պաշտօն լինի:

— Բանկի գիրեկտորութիւն յանձն կառնէ՞ք, — ասաց հրատարակիչը, այս անգամ ծիծաղելով և ոտքի կանգնելով:



— Վատ պաշտօն չէ, — նոյնպէս ծիծաղելով պատասխանեց Խաչիկեանը, որ մի քիչ համարձակութիւն էր ստացել:

— Շատ լաւ, սպասեցէք, ես ձեզ մի պաշտօն գրտնեմ: Այս ասելով հրատարակիչը դիմեց դէպի խմբագրի սենեակը:

Խաչիկեանը յաղթանակ տանող զօրականի նման ձեռքերը ծալեց կրծքին և սկսեց մտածել. նա իրեն և՛ վատ էր զգում, և լաւ:

— Գիտէ՞ք ինչ, կառավարիչը արդէն վարձւած է, իսկ դուք ուշացել էք, — ասաց հրատարակիչը, — ես խմբագրի հետ խօսեցի ձեր մասին. մեր խրոնիկեօրը զինւորագրութեան պատճառով գնում է, այնպէս որ, եթէ յարմար էք գտնում և եթէ կարող էք, այդ պաշտօնը կատարել՝ յանձն առէք: Վարձատրութիւնը ի հարկէ...

— Ո՛չ, ո՛չ, այդ մասին մի խօսէք, — ընդմիջեց Խաչիկեանը, — ինչ որ էլ տաք՝ ես գոհ եմ, որովհետև սիրում եմ ծառայել ազգիս և մարդկութեան:

Հրատարակիչը Խաչիկեանին հաւանեց միայն նրա համար, որ Խաչիկեանը Ֆինանսական ժողովարութիւնն ունէր, այսինքն քչով գոհացող էր:

— Հնա՛, դէ որ էդպէս է, — շարունակեց հրատարակիչը, — վաղը այս ժամին կը ներկայանաք խմբագրին. նա ձեզ հետ կը խօսի և ձեզ կը փորձի: Այժմ ազատ էք:

Խաչիկեանը մի քանի անգամ շնորհակալ եղաւ և խոր գլուխ տալով դուրս եկաւ:

Ուրախութիւնից նրա ստքերը գետին չէին առնում. նա թէև քայլում էր փողոցում, բայց նրա գլուխը դեռ հրատարակչի սենեակումն էր: Փողոցի առարկաները, որ առաջ նրա վրայ վատ էին ազդում, այժմ լաւացել և սիրելի տպաւորութիւն էին թողնում. ձերմակ գոգնոցով և երկայն



մահակով դռնապահները, որ նրա մէջ կոպտութեան զգացմունք էին առաջ բերում, այժմ մեղմ, քաղաքավարի և կրթւած էին թւում, մի խօսքով, ամեն ինչ նրան նոր, քաղցր և հաճելի էր երևում:

— Վաղը խմբագիրը ինձ պիտի փորձի, բայց ի՞նչպէս և ի՞նչ կերպով պիտի փորձի, — մտածում էր նա ու ոչ մի դրական եզրակացութեան գալ չէր կարող: Այսպէս մտածելով, Սաշիկեանը առանց ճաշելու վերադարձաւ իր սենեակը և առանց հանւելու ձգւեց իր փայտէ մահճակալի վրայ, աչքերը փակեց ու սկսեց վերլիշել այն բոլորը, ինչ որ կատարւել էր այդ օրը: Սաշիկեանը քնեց ու ընկաւ երազային լայն և ընդարձակ աշխարհը: Նա զարթնեց երեկոյեան ժամը 7-ին, ճիշտ այն պահին, որ պահին նա սովոր էր զարթնել: Թէ ի՞նչ երազներ տեսաւ Սաշիկ Սաշիկեանը, այդ մասին նա ոչ ոքի ոչինչ չի ասել, այսօրանը պարզ է միայն, որ երբ զարթնեց, ի սկոյն վեր թռաւ տեղից, հաւաքեց իր ստացած լրագրերի բոլոր հին ու նոր համարները և սկսեց ուշի-ուշով կարդալ «Լրատուն»:

Սաշիկեանը անդամահատում էր լուրերը, նորից էր միացնում, նորից քանդում, ուշադիր գննում էր, թէ ի՞նչպէս և ի՞նչ ձևով է գրւել այս կամ այն միջադէպը, նախադասութիւնները կարճ են, թէ երկար, լուրերի մէջ միտումաւորութիւն կայ, թէ՞ ոչ, այս և նման մանրամասնութիւններով վերջացրեց բոլոր համարների «Լրատուն» և «Ոստիկանական» բաժինների ընթերցանութիւնը: Այդ անելուց յետոյ, նա սկսեց ինքն իրեն լուրեր հնարել, գրել, ջնջել, նորից կազմել և այդպէս անվերջ:

Հետևեալ օրը, ճիշտ որոշեալ ժամանակին, Սաշիկ Սաշիկեանը խմբագրատան կեղտոտ սանդուխով կրկին բարձրանում էր. երբեմն նրա մէջ չար նախազգացումներ էին ծնւում, երբեմն էլ տատանւող հաւատքը յոյսի ջահով



լուսնալուսնում էր նրա միամիտ և մռայլ սիրտը. նա համոզ-  
 ւած էր, որ յաջողութիւնը կախւած էր խմբագրի մի  
 խօսքից, նրա դրական մի շարժումից, իսկ խմբագիրը  
 բարի և ներող կը լինէր դէպի Խաչիկեանը, այդ նրա հա-  
 մար հանելուկ էր: Ամենավատ մտապատկերը, որ որսոր-  
 դի պէս հալածում էր նրա նապաստակի սիրտը, դա քար-  
 տուղարի և փոխ-խմբագրի մռայլ, խոժոռ և անհիւրըն-  
 կալ դէմքերն էին:

— Եթէ դրանք այդպէս են, — մտածում էր նա, — ա-  
 պա խմբագիրը ի՞նչպէս պէտք է լինի: Այստեղ Խաչիկեանը  
 կանգնում էր, որովհետև քանի հեռուն էր գնում, այն-  
 քան սարսափը պատում էր նրան:

Խմբագիրներին նա պատկերացնում էր այսպէս. քը-  
 չախօս, խստապահանջ, ծանրաբարոյ, ճաղատագլուխ, մօ-  
 ղուքով և կնճռոտ ճակատով: Այն խմբագիրը, որին պիտի  
 ներկայանար Խաչիկ Խաչիկեանը, այդ բարեմասնութիւն-  
 ներով օժտւած մէկն էր. միայն մի բանում նրա դրու-  
 թիւնը ճիշտ չէր, որ վերջինս ակնոցաւոր էր և ենթա-  
 ճակատը գուրկ էր կնճիռներից:

Խաչիկեանը զգուշութեամբ դուռը ծեծեց և ականջ  
 դրեց խմբագրի «համեցէք»-ին:

— Մտէք, — լսւեց խմբագրի ձայնը:

Խաչիկեանը ներս մտաւ և երկիւղածութեամբ կանգ-  
 նեց խմբագրի առջև:

— Մի բոպէ սպասեցէք, խնդրեմ, — ասաց խմբագիրը  
 և սկսեց կարգալ իր նոր գրած առաջնորդողի վերջին պար-  
 բերութիւնը, որ դուրս չէր եկել այն, ինչ որ մտածել էր:

«Եւ վերջապէս մեր հակառակորդները թող լաւ իմա-  
 նան, որ Ազգային իդէալը և կեանքի էւօլիւցիան կօնա-  
 րաստներ են: Հենց օրինակ վերցնենք մեզ. ի՞նչ ենք  
 մենք և ո՞ւր ենք գնում... Սակայն թողնենք այդ, քանի



որ այժմ չի կարելի այդ խնդիրները պարզաբանել: Միայն մի բան կասենք մեր հակառակորդներին, որ նրանք գրչակներ են, հրապարակախօսական գաճաճներ, որոնք եթէ «ընկնեն ցեխը, ցեխը կը կեղտոտեն»:

Վերջացնելով առաջնորդողի ընթերցումը, խմբագիրը ուզում էր ստորագրել, բայց մտաբերելով, որ դա յօդուած չէ՝ գրիչը ձգեց սեղանի վրայ և երկու ձեռքով աչքերը տրորեց:

— Հա՛, ես մոռացայ, — ասաց խմբագիրը, նայելով Խաչիկեանին, — ի՞նչ էիք ուզում ասել:

— Երէկ հրատարակիչը իմ մասին ձեզ խօսել է, — պատասխանեց Խաչիկեանը հազիւ լսելի ձայնով:

— Այդ պարոնը դուք էք, հա՛:

— Այո՛, ես եմ:

— Է՛, ոուսերէն գիտէք:

— Այո՛, գիտեմ:

— Հայերէնում ի՞նչպէս էք:

— Լաւ եմ:

— Եւրոպական ուրիշ լեզուներ գիտէք:

— Ո՛չ:

— Խրոնիկեօրը մի քիչ աչքաբաց պէտք է լինի, բայց դուք, ինչպէս տեսնում եմ, շատ էք ամաչկոտ ու խամ:

— Ո՛չինչ, կը վարժւեմ. դա սովորութիւնից է կախուած:

— Երբեիցէ այդ պաշտօնը կատարել էք:

— Ո՛չ, առաջին անգամն է:

— Ա՛յ, տեսնո՞ւմ էք. մարդ մի քիչ ծանօթ պէտք է լինի գործին, որ ազգը շտուժի դրանից:

— Ի սէր ազգութեան ես կաշխատեմ պաշտօնս լաւ կատարել. խօսմ ազգին թշնամի չեմ որ:

— Դէ լաւ, օրինակ մի լուր կազմէք տեսնենք, — ասաց խմբագիրը, երթնեկելով:



— Ի՞նչ նիւթի մասին, — ասաց Խաչիկեանը քննութիւն տւող տաս տարեկան մանուկի պէս դողալով:

— Եթէ ես նիւթ տամ, էլ ձեզ ի՞նչ կը մնայ:

— Գրեմ, թէ բերանացի ասեմ:

— Ի հարկէ պէտք է գրել, — ասաց խմբագիրը. — խընդրում եմ գրեցէք պարզ, խոշոր և ընթեռնելի, որ գրաշարները հեշտութեամբ շարեն:

Խաչիկեանը դողալով նստեց խմբագրի սեղանի առաջ, վերցրեց գրիչն ու սկսեց գրել.

«Ինչպէս յայտնի է, մեր տաղանդաւոր խմբագիրը դատի տակ էր «Մենք և նրանք» վերտառութեամբ առաջնորդողի համար. երէկ, հոկտեմբերի 6-ին, առաւօտեան ժամը 9-ից սկսած, զինւորական շրջանային դատարանում քննւում էր նրա գործը: Նրան պաշտպանում էին երգւետլ հաւատարմատարներ Գերասիմ Թադէոսեանը և Մատթէոս Պարտիզպանեանը, իսկ մեղադրում էր դատախազ Իվան Եակովլևիչ Բօնդերէնկօն: Դատը տևեց մինչև ցերեկւայ ժամը 4-ը և դատարանը տևեց հետևեալ վճիռը. «Փակել թերթը և խմբագրին ենթարկել 3000 ռուբլի տուգանքի, իսկ չվճարելու դէպքում՝ երեք ամիս բերդարգելութեան»:

— Կեցցէ՛ք, — ասաց խմբագիրը, — շատ լաւ է, շատ զոհ եմ, բայց պէտք է իմանալ, որ դա վերաբերում է «Դատաստանական» բաժնին, այդ չի կարելի «Խրոնիկայում» զետեղել. կը ծիծաղեն մեզ վրայ:

Դա առաջին յաղթանակն էր, որ Խաչիկեանը տարաւ. այդ բանից յետոյ նա համարձակութիւն ստացաւ և սրբելով քրտինքը սկսեց դարձեալ գրել.

«Երէկ, ցերեկւայ ժամը մօտ երեքին, մեր աւագ աշխատակից Գէորգ Մուրզեանը, խմբագրատնից դուրս գալով, ընկաւ № 45 աւտոմոբիլի տակ և ուղեղի ցնցում ստանալով մեռաւ: Նրա դիակը տարւած է քաղաքային



անատոմիական բաժանմունքը: Թաղման հանդէսի մասին կը յայտարարուի առանձին: Մեր շնորհալի աշխատակիցը թողնում է մի կին, երկու երեխայ և մի պառաւ մայր»:

— Չէ չէ, այդ չեղաւ, — ասաց խմբագիրը՝ ձեռքը բարձրացնելով, — վերջին երկու տողերը միանգամայն աւելորդ են և վատ հայերէն. դուք գրում էք թէ՛ «թողնում է մի կին, երկու երեխայ և մի պառաւ մայր»: Այդ դուրս է գալիս, որ մէկը կարող է թողնել մի քանի կին և մի քանի մայր: Բայց լաւ, ընդունենք, որ այդ էլ ճիշտ է, այդ լուրն էլ յաջող է, սակայն չէ՞ որ դա նոյնպէս չի վերաբերում խրոնիկային. դա «Ոստիկանական» բաժնի վրաբերեալ նիւթ է. մենք հօ չէ՞նք կարող թերթը դարձնել շիլափլաւ. ամեն մի նիւթ իր բաժինն ունի, իր տեղն ունի. տեսնո՞ւմ էք, մարդ պէտք է ծանօթ լինի գործին, — վերջացրեց խմբագիրը:

Նկատողութիւնը խիստ էր. Խաչիկեանը լողում էր քրտինքի մէջ և նրան թւում էր, որ ամեն ինչ վերջացած է, քննութիւնից կտրւած:

— Ապա փորձեցէք իսկական խրոնիկայի լուր գրել, — ասաց խմբագիրը մեղմացած:

Խաչիկեանը անգիր արած լուրերից մէկը մտաբերեց ու գրեց.

«Չնայած որ կառքերի սակագինը աւելացւած է, բայց անդգամ կառապանները սահմանւած սակագնով չեն գործում, այլ պահանջում են այնքան, որքան նրանց քէֆն է ուզում. սակագին չիմացողներին ուղղակի կողոպտում են: Անցեալ գիշեր, քաղաքագլուխը դումայի նիստից տուն վերադառնալով, կառապանը նրան շճանաչելով, սահմանւած սակագնից աւել է վերցրել. կառապանի վրայ արձանագրութիւն է կազմւած՝ նրան պատասխանատուութեան ենթարկելու համար»:

— Այո, այո, հենց այդ է, որ կայ. դա իսկական լուր



է, որը միայն կարելի է գետեղել խրոնիկայում, — ասաց խմբագիրը, — բայց մի փոքրիկ նկատողութիւն. առհասարակ ընդունւած է, որ խրոնիկան թերթի ոչ տենդենցիօզ բաժինն է, որտեղից ոչ մէկին չի կարելի հայհոյել, թէկուզ քարերը տրաքւեն. խրոնիկա ասածդ օրւայ չոր ու ցամաք պատմութիւնն է, որ պէտք է ուղղակի արձանագրել. դուք գրում էք. «անզգամ կառապաններ». դա երբէք թոյլատրելի չէ, որովհետև խրոնիկան ոչ «Մամուլ» է և ոչ էլ հրատարակախօսական յօդւած, այլ խրոնիկան՝ խրոնիկա է: Ուրեմն այդ մէկ, երկրորդը այն է, որ պէտք է աշխատէք որքան կարելի է կարճ, կտրուկ և հետաքրքրական գրել և «Լրատուի» բաժնում ոչ մէկին չհայհոյել, հասկացա՞ք. վաղւանից սկսեցէք աշխատել. ես յոյս ունեմ, որ հրատարակչին իմ առաջ ամօթով չէք անի: Հա՛, մոռացայ ասելու, որ ես վաղը երեք օրով մեկնում եմ Բագու՝ այնտեղի գրական-հասարակական գործիչների հետ մի քանի հրատապ խնդիրների մասին խորհրդակցելու համար:

### III.

Այն օրից, երբ Խաչիկեանը ընդունւեց, խմբագիրը նրա համար դարձաւ ամեն ինչ. նա երկիւղածութեամբ և պատկառանքով էր վերաբերւում դէպի խմբագիրը և, նրա իւրաքանչիւր խօսքը ընդունում էր որպէս պատգամ: Խաչիկեանի խմբագիրը բարձրագոյն կրթութիւն ունէր և բացի այդ, նա ոտնձգութիւններ էր անում զանազան գիտութիւնների սահմանները:

Նա եւրոպական լեզուներ գիտէր այնպէս, ինչպէս իր մայրենի լեզուն և դրանով Խաչիկեանը պարծենում էր լրատուների առաջ, երբ խօսք էր լինում խմբագիրների մասին:



Պաշիկեանի խմբագիրը երկու «խոշոր» պակասութիւն ունէր. մէկ այն էր, որ նա անծանօթի վրայ գոռոզ, հպարտ և ինքնահաւան տպաւորութիւն էր թողնում՝ այն ինչ ինքը բարի, պարզ և մեղմ մարդ էր՝ իսկ միւսն այն, որ նա իր առաջնորդողները յաճախ վերջացնում էր եւրոպական բառերով և հենց այդ պատճառով էլ Պաշիկեանը չէր կարդում:

Պաշիկեանը խրոնիկեօրի պաշտօնը ստանձնելով, կարծում էր, որ դա մարդկութեան և հասարակութեան համար է անում. բայց երբ ամեն բան սովորեց, երբ խմբագրատան ամեն մի գաղտնիք նրա համար այլևս գաղտնիք չէր, նա զգաց, որ ինքը միմիայն ծառայում է ուճիկ ստանալու համար և ուրիշ ոչինչ: Այդ պաշտօնը կամաց-կամաց սկսեց Պաշիկեանին գրաւել. նա օրւայ կէսը թափառում էր, և, որպէս մամուլի ներկայացուցիչ՝ հիմնարկութիւնների, հաստատութիւնների ու հասարակական բոլոր ընկերութիւնների դռները բաց էին նրա առջև:

Տեղն եկած ժամանակ Պաշիկեանը իր պաշտօնով պարծենում էր, սակայն ինչպէս ամեն մի գործ, այնպէս էլ Պաշիկեանի պաշտօնն ունէր իր վատ կողմը: Օրինակ, նա չէր սիրում, երբ իրեն կոչում էին «խրոնիկեօր» կամ «խրոնիկեօր Պաշիկ Պաշիկեան», և այդ բանը պատճառաբանում էր նրանով, որ ինքը առհասարակ «խ» տառը չի սիրում և յետոյ «խ»-ով են սկսւում խարդախ, խլամ, խոզ, խաւարամիտ, խայտառակ, խրտւիլակ և խաչագող բառերը: Նա սիրում էր, որ իրեն կանչէին «րեպարտեօր», որ աւելի մեղմ, փափուկ և գեղեցիկ է հնչում և կամ «մամուլի ներկայացուցիչ», որ նրան աւելի էր դուր գալիս: Սակայն նրան մխիթարում էր մի հանգամանք, որ «խմբագիր» բառն էլ «խ»-ով է սկսւում:

— Խմբագիր և խրոնիկեօր, ահա երկու հակառակ բեւեռներ, — ասում էր նա վիճելիս, — ահա երկու հսկայ սիւ-



ներ, որոնց վրայ հիմնւած է լրագրութիւնը. եթէ խմբագիրը շէնքի առաստաղն է, խրոնիկեօրը շէնքի յատակն է, իսկ մի շէնք առանց առաստաղի և յատակի չի կարող լինել:

Պաշիկեանի մէջ ճիշտ է, փառասիրութիւնն այնքան էլ մեծագլուխ չէր, բայց, դէ, նա էլ մարդ էր. էլի փառասիրութիւնից մի բան կունենար: Նրան տանելի էր, երբ թերթի լուրջ աշխատակիցները և խմբագիրը իրենց յօդւածների տակ ստորագրում էին, բայց նա չէր կարող հանդուրժել, երբ մի գալառական թղթակից իր լուրերից մէկի չափ փոքրիկ թղթակցութեան տակ՝ իսկոյն կոխում էր իր ստորագրութիւնը, իսկ ինքը, որ արժանաւոր մըրցակից էր խմբագրին և ամեն օր սիւնակներ էր լեցնում, մի անգամ նմուշի համար իր ստորագրութիւնը տպւած չէր տեսած: Այս մանր բաները շատ տխուր եզրակացութեան էին բերում Պաշիկեանին, բայց ստիպւած էր տանել այդ բոլորը, որովհետև այդպէս է պահանջում խրոնիկան: Ասենք, նա այդ մտքին այնքան էլ անհաշտ չէր, որովհետև նոյն դրութեան մէջ էին և՛ սրբագրիչը, և՛ քարտուղարը:

Բեպարտեօր Պաշիկ Պաշիկեանը ամուրի էր և երբէք մտադրութիւն չունէր ամուսնանալու, որովհետև շատ կասկածոտ էր: Նա ամուսնական կեանքին նայում էր այնպէս, ինչպէս կատուն շան, իսկ մուկը՝ կատուի վրայ:

Ապրելով խմբագրատան փոքրիկ սենեակներից մէկում, նա իրեն ազատ էր զգում կանացի զանազան բամբասանքներից և երիտասարդական այն շրջաններից, որոնք այնքան զրաւիչ են երևում հեռուից և այնքան զզւելի՛ մօտիկից:

Միշտ մենակ էր նա, միշտ մենակ ու ինքնամփոփ:

Նրա կեանքի միօրինակութիւնը խախտւում էր



միայն այն ժամանակ, երբ տարին մի անգամ խմբագիրները փոխւում էին, սակայն այդ տեղատուութիւնն ու մակընթացութիւնը կարճատե էր լինում, նա շուտով էր ընտելանում բոլորին և նրա կեանքը նորից մտնում էր իր սովորական հունը:

Չնայած որ Խաչիկեանը իր պաշտօնի մասին խոշոր կարծիք չուներ, բայց հասարակութիւնը նրան մէկ աչքով չէր նայում. վերջապէս նա մամուլի ներկայացուցիչ էր, ամեն տեղ պատուով էր ընդունւում. պաշտօնական հիմնարկութիւններն ու ընկերութիւնները նրան ընդունում էին սիրով և հաղորդում հարկաւոր լուրերը: Առանձնապէս նրան հաճոյք էր պատճառում այն, երբ նա քաղաքային դումայի նիստերին ներկայ էր լինում և բազմում կանաչ, մեծ սեղանի շուրջը, որտեղ անխուսափելիօրէն նստած էին լինում զանազան լեզուներով հրատարակող լրագիրների և կուսակցական շրջանների խորհիկեօրները:

Ինչպէս նրա կոլեգաների, նոյնպէս և իր մօտ, անպակաս էր լինում թուղթն ու մատիտը:

Թէև իր պաշտօնը պահանջում էր անկողմնակալ կերպով գրի առնել իրաւասունների և քաղաքային վարչութեան անգամների ճառերը, բայց նա յաճախ աչառ էր լինում. - երկար տեղ էր տալիս այն իրաւասունների ճառերին, որոնք յատկապէս կանգ էին առնում կարագի, գետնախնձորի և պանրի սակագները իջեցնելու վրայ, որովհետև այդ երեք տեսակի կենսամթերքները նրա ամենօրեայ ուտելիքներն էին:

Պատահում էին օրեր, երբ լուրերի ճգնաժամ էր լինում. այս պարագան երևան է բերում ամեն մի խորհինիկեօրի փորձառութիւնն ու հմտութիւնը, իսկ Խաչիկեանը վերջին յատկութիւններով օժտւած լինելով, կրիզիսը յաջողութեամբ էր անց կացնում: Օրինակ, նա ոստիկանատնից լուրեր շատանալով՝ գրում էր.



«Ինչպէս յայտնի է, սրանից շաբաթներ առաջ, գողութիւններն ու այդ հողի վրայ եղած սպանութիւնները խրոնիկական բնոյթ էին կրում, սակայն վերջերս կարծես թէ դադարել են՝ շնորհիւ այն բանի, որ ոստիկանութիւնը խիստ միջոցներ է ձեռք առել: Այդ միտիթարական երևոյթը նկատուում է նաև կրկնուող ինքնասպանութիւնների մասին»:

Փողոցով անցնելիս, եթէ երկու վաճառական խօսելիս տեսնէր, գրում էր.

«Վերջերս վաճառականները մտահոգւած են այն բանի համար, որ Ռուսաստանից սպասուում է մեծ քանակութեամբ մանուֆակտուրա և Հիւսիսային Կովկասից հրակայական քանակութեամբ կենսամթերք. շնորհիւ այդ բանի՝ վերոյիշեալ ապրանքների և կենսամթերքների գները զգալի կերպով իջել են»:

Իր ընդարտեօրական երեսունևհինգ երկար ու ձիգ տարւայ գործունէութեան ընթացքում երկու մարդու չկարողացաւ տանել. առաջինը քարտուղարն էր, որ անխրնայ կրճատում իր նրա տւած լուրերը, իսկ երկրորդը՝ գրաշարապետը, որը թերթը ուշ լոյս ընծայելու յանցանքը գցում էր խրոնիկօրի վրայ, մի յանցանք, որից նա միշտ խուսափել էր և որից երբէք չէր կարողացել ազատուել: Իր լրագրական ձանձրալի, տարտամ ու անհրապոյր աշխատանքի մէջ՝ նա ունէր ոգևորութեան և լիրիկական ժամեր. այդ պատահում էր այն ժամանակ, երբ մի գլորող, մի հասարակական գործիչ և լրագրող էր մեռնում. նա հաճոյքով և ոգևորութեամբ էր նկարագրում մեռնողի յուղարկաւորութիւնն ու թաղումը, և նրա յօգւածները շարունակ վերջանում էին հետևեալ տողերով. «Մինչև երբ հայ հասարակութիւնը անտարբերութեամբ պիտի թողնի, որ իր ժրաշան մշակները մեռնեն չքաւորութեան մէջ». կամ թէ՛

«Գնահ, մեռի՛ր, արի սիրեմ»:



## IV.

Մի օր, ամպամած մի տխուր օր, երբ լրացել էր նրա կեանքի ուղիղ յիսուն և վեց ձմեռը, երբ նրա գլխի մազերը սպիտակել էին այնպէս, ինչպէս ձիւնապատ լեռները, երբ նրա երակներում արիւնի տեղ ջուր էր հոսում, Խաչիկեանը պառկեց ու էլ վեր չկացաւ...


Երբ նա զգաց, որ ինքը պատրաստուում է թողնել այս անհիւրընկալ աշխարհը, իր վերջին ուժերը հաւաքեց, վերցրեց իր կեանքի անբաժան ընկեր թուղթն ու մատիտը և վերջին անգամ իր հայեացքը գցելով անպաճոյճ սենեակի ծանօթ առարկաներին, գրեց՝

«Մի գրող, որին ոչ ոք չի ճանաչում և...»:

Խաչիկ Խաչիկեանը գուցէ դեռ շատ բան ունէր ասելու, բայց վայրկենական մահը վերջակէտ դրեց և՛ նրա կեանքին, և՛ նրա ասելիքին, ու ծերունին մեռաւ մատիտը մատներին մէջ, թուղթը ձեռքի տակ և ճերմակ գլուխը սեղանի վրայ:

Հետևեալ օրը, լուրերի բաժնիդամ, խմբագրութեան կողմից, յայտարարւած էր ի գիտութիւն ընթերցողներին, որ իրենցից անկախ պատճառով լուրերը չստացւեցին և խնդրում են, որ ներողամիտ լինեն այդ փոքրիկ անպատեհութեան համար:

Ռ է Ն





# ԳՈՅՆԵՐԻ ԳԻՐՔ

## 1.

Ես ունեմ մի կարօտ անյագուրդ  
Ես գիտեմ մի աղջիկ քաղցրաշուրթ,  
Ինքը՝ ալ, հոգին՝ ալ, հագինն՝ ալ,  
Ալ այտին — լալի մէջ — մի սև խալ:

Ամեն օր առաւօտ-իրիկուն,  
Դէմքն՝ անլաց, կուրծքը՝ բաց, կօշիկն՝ ալ,  
Դուրս է գնում, ետ գալիս իրենց տուն —  
Վզին՝ լալ, ուսին՝ շալ, շալը՝ ալ:

Քայլերից քարերը կարմրել,  
Օդն ու ջուր, հոդն էլ է դարձել ալ,  
Ալերից աչերս կուրացել՝  
Տեսնում եմ — միայն ալ, շալ ու խալ:

Ալ արևն է քաղում քաղցրատօթ,  
Ամպն է դէմն իջել լուռ աղօթքի.  
Լալ աղջիկն ինձանից հեռ ու մօտ,  
Ու հոգիս կարօտ է Ֆալ խօսքի:

## 2.

Մուգ-կապոյտ շրջագգեստ դու ունիս,  
Մուգ-կապոյտ մի թիկնոց, մի գլխարկ.



Մուգ-կապոյտ պատրանքի թռչունիս  
Գերել է քաղցրամուկ թո աշխարք:

Մուգ-կապոյտ ամպեր են բարձրացել,  
Մուգ-կապոյտ շամբերն են երերում.  
Մուգ-կապոյտ պատկերդ թանձրացել՝  
Լնդում է կարօտիս ջրերում:

Յոյս ու լոյս, բոյր ու բոց, բանն անգամ =  
Քո գոյնի են դարձել՝ մուգ-կապոյտ.  
Ես որ կամ՝ չգիտեմ — ե՞ս եմ՝ կամ,  
Թէ՛ ես էլ քո սուտերն եմ՝ մուգ-կապոյտ:

## 3.

Հորիզոնն իմ աչքին բաց դեղին է դարձել,  
Իր շողերն է հիւսում արևի հայեացքին.  
Դեղնուկիւնն իմ հոգուն համբոյրով հարւածել՝  
Ինձ գերին է դարձրել իր դեղին հիացքին:

Բրինձի դեղին արտն է հասուն ծփծփում,  
Դեղնաթոյր օդի մէջ նարինջներ, կինամոն.  
Ծառների ոստերին իր լոյսերն է կապում  
Թռչնաքայլ հէյշայի դեղնաւուն կիմոնոն:

Դեղնի բոյրն է լցրել իմ անցեալն ու ներկան,  
Ու գալիքն աչերիս բեռնացել դեղնանինջ՝  
Ես գտել եմ այսօր իմ դեղին աղջկան,  
Որ արևն է կրում զգետներում իր նարինջ:



## 4.

Երեք ծաղիկ ես տեսայ—  
 Երեք աղջիկ անփեսայ —,  
 Կարմիր, կապոյտ, դեղնագոյն՝  
 Երեք ծաղիկ—երեք գոյն:

Մէկն ալ կարմիր մի մեխակ,  
 Տոլուն աչերն աստղացիր,  
 Կուրծքն անառիկ մի դդեակ՝  
 Քաղտնիքներով հեշտալիր:

Երկրորդն՝ ասես արևառ  
 Դեղնատերև ըրիզանթեմ,  
 Որ կարօտից գինեհար՝  
 Ծունկ էր իջել ինքն իր դէմ:

Երրորդն... երրորդն էլ՝ կապոյտ,  
 Նման ծաղկին խաշխաշի,  
 Օգին տւել գոյն ու գութ՝  
 Քօղն էր գցել մշուշի:

Եւ երեք գոյն—երեք կոյս  
 Հոգուս դռանն ուս-ուսի՝  
 Կարմիր, կապոյտ, դեղնալոյս—  
 Զանն են վառում իմ յոյսի:



## 5.

Զմբուխտի դառ ծածկոցն ուսերիդ՝  
 Լոկ պատրանք է ուզում դարձնի քեզ.  
 Քունն իջի, փաթաթել փէշերիդ,  
 Չեռքերդ ննջում են թոչնի պէս:

Թաւ մազերդ ասես թուխ լուսամփոփ,  
 Ոստի պէս՝ ոտքերդ են դալարիկ.  
 Հայեացքներն աչերիդ քաղցրածոպ՝  
 Աստղերի փայլն ունին խոլորիկ:

Քո կանանչն է դարկել երկնքին.  
 Գոհ ճաճանչն ընկել դանշտ, ձոր ու լեռ.  
 Կանաչի թև՝ հագել իմ հոգին՝  
 Թռչում է՝ կանաչով ծանրաբեռն:

Ու դադար չկայ իմ ճախրանքին  
 Բոյրերում, բոցերում այս անանց,  
 Եւ իջնում, ծալուում է իմ կրծքին՝  
 Յաւերժի լայն թևը բաց-կանանչ:

\*  
 \* \*

Արևակիր աչերդ խաժ, նշաձև՝  
 Փայլերն ունին ինքնաօրօր Հինդոսի.  
 Չեռքերդ՝ երկար, նուրբ մատներով լուսաթև՝  
 Հպման կարօտ ծաղկո՞ւնք են սուրբ լոտոսի:



Մաղերդ՝ ասես հալած ոսկու մի ջրվէժ՝  
 Կեանքիս վըրայ լոյսն են դեղին ծաւարում.  
 Սրբութեան շողն իջել գլխիդ գահավէժ,  
 Ու սաքիդ տակ շանթւանձ սիրտս է թաւարում:

### Գ Ն Ա Ց Ք Ո Ւ Մ

Օձաձիգ գնացքը ձիգ թռչում է շտապ,  
 Մղիչներն ակնարկու գարկում են ծանփ.  
 Վագոններն ընկել են ձիարշաւ, չանփ.  
 — Օձաձիգ, գնացքը ձիգ թռչում է շտապ:

Կուպէում մնացել ենք դու և ես, տես...  
 Ես էլ ինձ չեմ յիշում, այլ միայն քեզ.  
 Գուռը՝ փակ, լուսամուտն աղօտ ու հեզ,  
 Կուպէում մենակ դու և մէկ էլ... ես:

Ու գնացքն առել թե, թռչում է շտապ,  
 Իմ և քո հարսանքի գարկում են ծանփ.  
 Զահէլներն ընկել են ձիարշաւ, չանփ.  
 — Օձաձիգ գնացքը ձիգ՝ թռչում է շտապ:

Արշաւիր Խոնդկարեան





### Յ Ո Ւ Շ Ե Ր

(«Գեղարձուցիք» sbsrից)

Ա.

Հայրենիքումս հեռաժառանգ արդեօք կան,  
Մնում են դեռ ընկերներն իմ մանկական,  
Արդեօք հիմա չի խոսպանել այն սիրուն՝  
Իմ և նրանց շինած բօստանն ու առուն:

Ահ, այն գետակն, ուր բոբիկ ու կամացուկ  
Ջուրը մտած բռնում էինք մանրիկ ձուկ,  
Կանաչ ափում մերոնք նստած լւացքի՝  
Ճշում էին ինձ, թէ «մեղք են, ցած ձգի»...

Կամ ցորենի ոսկի բեռներն, որ բերում,  
Ծփծփալով փռում էին կալերում,  
Սայլի հետքով, տնակների արանքում,  
Գետին թափած հասկերն էինք հաւաքում:

Հայրենիքումս հեռաժառանգ արդեօք կան,  
Մնում են դեռ ընկերներն իմ մանկական...

Բ.

Մտքի, կրքի բար քաղաքում կիզում եմ ես,  
Ուր լոկ նիւթն է տէրը կեանքի, ջիղն է անմեռ.  
Այս երկիրը շատ է անձուկ, օտար է մեզ, —  
Մայրիկ, ինչո՞ւ, ինչո՞ւ թողիր վաթանը մեր:

Նեղ երթիկով այն սևապատ տունը ցածրիկ,  
Սիւների տակ կճուճներով կաթ ու մածուն,  
Ուր՝ մոռացած չար ու չարկամ, յաւուր չարիք,  
Միշտ գոհ ու լի՝ օրհնում էինք մեր Աստծուն:



Քուրսու չորս կողմ փուլած թաղիք ու անկողին,  
Մէջը սուղլած ինձ սիրելի մանուկ դէմքեր,  
Երկար, երկար նայում էինք լուսնի շողին,  
Մեզ փարում էր հէքիաթական մի նուրբ պատկեր...

Դէպի հեռո՛ւ, հեռու օջախն իմ հարազատ,  
Տանում է ինձ հիմա մտքիս վաղբը թեթև.—  
Մայրիկ, ինչո՞ւ, ինչո՞ւ թողիր այն կեանքն ազատ  
Ու թաղեցիր եօթը ճամբի, սարի ետև...

Վ.

Հեռու նեւուած բաղդով կոյր,  
Կարօտ եմ քեզ, հօրաքոյր,—  
Ո՞ղջ ես հիմա՝ չըզիտեմ,  
Կասկածս ինչո՞վ փարատեմ:

Արդեօք կանցնե՞ն մահահոտ  
Օրերն այս մութ ու ահոտ,  
Որ դամ նորից ես քեզ հիւր,  
Իմ հեզ, իմ լաւ հօրաքոյր...

Նորից վազեն կառքիս մօտ  
Երեխաներ կիսամօթ,—  
Բոլորդ ելած իմ առաջ,  
Ես ջերմ սրտով ձեզ փարած:

Բերկրանքը ձեր առաջին,  
Շրթունքս հպած քո աջին,  
Ճակտիս կնքւած տաք համբոյր,  
Չան, իմ լալկան հօրաքոյր...

Բայց զնում ենք մենք հիմա,  
Ես էլ, դո՛ւ էլ, դէպի մահ՝  
Բաժան, կարօտ, հօրաքոյր,  
Հեռու նեւուած բաղդով կոյր:

Պահարէ





## ԱՆԱՆՈՒՆ ԱՂՋԻԿ

Ա.

Չեմ յիշում, երբ և որտեղ ենք հանդիպել իրար,  
բայց ես քեզ եմ ճանաչում, դու՛ ինձ:

Ոչ անունդ գիտեմ, ոչ ով լինելդ:

Բայց գիտեմ ճերմակ ժապաւէնով պատած՝ գորշ  
գլխարկով մի աղջիկ, որի անվերջ ու հանդարտ ժպիտը  
կեանք է պարզեում ինձ. գիտեմ մի աղջիկ, որի ժպտից  
փոսիկներ են ստեղծում այտերին, դէմքին արև ու լոյս  
են տալիս աստղ աչերը:

Անանուն աղջիկ, երբ դու ինձ հանդիպեցիր՝ արևի  
ճառագայթները ջերմացան, սրտիս լարերին դարունն իբ  
երգն յօրինեց:

Անծանօթ աղջիկ, երբ տեսնում եմ քեզ, թւում է  
հովտաշուշանի բուրմունքը կտրում է ինձ գետնից:

Չգիտեմ հասկանում ես, հոգիդ զգում է մէջս եղած  
փոթորիկը, ցրտահար տերևի նման դողում է նրա հա-  
մար. բայց երբ սիրտս յոգնում ու նիրհ է գալիս վրաս,  
գիտե՞ս արդեօք ինչ է պատահում ինձ, — դու մտնում ես  
աչքերիս մէջ և խանգարում քունս:



Թէ ո՛վ ես դու, չգիտեմ, բայց գիտեմ այն, որ իմ մենութեան ժամերին միշտ ինձ հետ ես լինում:

Ծիծաղ աղջիկ, ես այժմ շատ եմ փափագում մենութիւնը նրա համար, որ դամ քեզ մօտ ու խորհեմ քո մասին, քո ժպտի մասին, իմ անանուն ծաղկի մասին:

Ամեն պահին, արևածագից մինչև մայրամուտ, ուզում եմ կտրուել ամեն բանից, որ տեսնեմ քեզ, որ սրտիս երգով քուն բերեմ աչերիդ, որ քնած էլ տեսնեմ քո անսպառ ժպտը:

Այդպէս եմ ուզում նրա համար, որ կարողանամ քեզ վերածել երգի, սիրտդ ներդաշնակել սրտիս. որ աստուածային լարերի վրայ հիւսւի աշխարհն արբեցնող իմ և քո երգը:

Բարի աղջիկ, թէև դու ինձ չես ճանաչում, բայց գիտես, որ ես ու դու սնւում ենք մի հողի պտղով, ծարաւը յագեցնում մի գետի ջրից, կեանք ենք ստանում մի արևից. էլ ինչո՞ւ ես դու ինձնից փախչում...

Դու գիտես, որ ամենքը նայում են քեզ ինչպէս շատերին ու անցնում, բայց ինչո՞ւ չգիտես, որ երբ ես եմ քեզ հանդիպում, մնում եմ կանգնած ու չեմ հեռանում, մինչև որ մի շարածճի ծիծաղ նետում ու գնում ես ինձնից...

Անծանօթ եղիր, հոգ չէ, միայն թէ գիտենամ, որ շուրթերդ ուզում են ինձ հաղորդել ձմրանը Մայիս բերող խօսքը, — որ այսօրւայ սառնամանիքների մէջ դարունը եռայ կրծքիս տակ...

Բ.

Այսօր երբ նորից ծերացաւ մեր քաղաքն ու ճերմակեց ամեն բան՝ սաստկացաւ ցուրտը:

Ես էլ թեժացրի վառարանիս կրակն ու սենեակիս տաքութիւնից թմրեցի և մտածեցի, մտածեցի քո մասին:

Երբ տեսնել ուզեցի քո տունը, սրբեցի ապակիներ-



ըի դուրսըն ու տեսայ քեզ՝ գլխաբաց. դու ընկերուհուդ հետ թեանցուկ ճեմում էիր քո պատշգամբի տակ, գետը ծածկող սառոյցի վրայ:

Մէկ էլ ձեր զրոյցը փոխուեց չարաճճի գնդախաղի:

Այնպէս չէի ուզում, որ քո մատները դիպչեն ձիւնին. չէ որ կը թրջուեն, կը մրսեն:

Ձէ որ ձմեռ է:

Թւում է՝ դու այդ չես զգում ու անհոգօրէն վերցնում ես աչերդ խտտացնող ձիւնն ու զարկում ընկերուհուդ:

Հապա քո ծիծաղը...

Քո ծիծաղը ցնցում էր էութիւնս, թունդ հանում սիրտս:

Իսկ երբ դու անվախ վազվզում ես սառոյցի վրայ՝ ես վախենում եմ. վախենում եմ, որ յանկարծ սառոյցը ճաքի...

Հաւատա՛, ձիւն աղջիկ, երբ դու ձնագունդ ես շինում, իմ ձեռքերն են մրսում:

Շուտ, շուտ գնա քո դղեակը, որ տաք սենեակում ես ցուրտ չզգամ...

#### Գ.

Ինձ ինչ, որ ձերմակել է ամեն բան, միայն թէ թող յաւիտեան սև մնան քո փունջ վարսերը:

Ի՞նչ էլ գիտես՝ ես էլ, որ այսօրւայ սառոյցը կը հալչի, գետն էլի իր ճամբով կերթայ, պղտոր ջուրը գուլալ կը դառնայ, բայց գիտե՛ս, եթէ դու սառչես, սիրտդ պաղի՝ էլ չի ջերմանայ՝ թէկուզ աշխարհով մէկ մոմ վառւի քո առջև...



## Գ.

Դու գիտես, որ իմ սենեակը քո տան դիմացն է. մեզ բաժանում է մեր քաղաքի միջով հոսող վարար գետը:

Գիտես և այն, որ մի քիչ վերև կամուրջ կայ. եթէ ուզենաս գալ ինձ մօտ, Աստուած վկայ, գետը չի խանգարի...

## Ե.

Երբ լուր առայ, որ դու մեկնելու ես քո հայրենիքը՝ տխրեցի:

Իսկ այսօր իմացայ, որ էլ չես գնալու, որովհետեւ քո հայրենիքի մարդիկ գազազել ու արճիճ են մխում իրար կուրծք: Քո հայրենիքում արիւն ու աւեր կայ հիմա:

Եւ այսօր ուրախութիւնից օրհնում եմ քո հայրենիքի այն մարդկանց, որոնց հրացանների ճարճատիւնը չը թողեց, որ դու գնաս մեր քաղաքից:

## Զ.

Մենք գտնւում էինք մի շէնքում, ուր կար նւագ, երգ, պար, ծաղիկ, քէֆ. վայելքի համար կար ամեն բան, բայց չկար իմ և քո սրտի հաղորդակցութիւնը:

Ես կամեցայ իմ ծաղկանոցից բերած ծաղկով զարդարել քո կուրծքը:

Այդպէս էլ եղաւ:

Դու չիմացար, ի հարկէ, որ կուրծքդ զարդարող ծաղիկներն իմն էին:

Դու չգիտէիր, որ ժպտիդ իշխող աչերիդ փայլը ծակում էր սիրտս:



Զարմանում եմ, թէ ինչո՞ւ չէիր տեսնում ինձ, որ միշտ շուրջդ էի պտոյտդ ալիս:

Մի՞թէ չէիր զգում, որ երբ դու ծիծաղում էիր, սիրտըս էլ իր ծիծաղն էր փռում երեսիս...

\*  
\* \*

Այնտեղ կար պոստախաղ: Ես քեզ գրեցի.

«Ա՛խ, քո ժպիտը...»:

Երբ նամակս բացիր ու կարդալով անցար մտտովս՝ օդը թարմացաւ:

Իսկ երբ թնդաց քո պարեղանակը՝ դու մի քանի պլատոյտ արիր ու կանգնած մի տեղում օրօրւեցիր: Երբ կիսախուփ աչերդ ուղղեցիր նազանքով շարժող մատներիդ, ինձ տարար եթերը:

Բայց երբ դու պարզ դիտող հանդիսականների շարքը կիսեցիր ու գնացիր, հազարամոմեայ լապտերների լոյսն աղօտացաւ ինձ համար, երզն ու նւազն էլ խինդ չտւին իմ սրտին:

\*  
\* \*

Երբ հանդէսը ցրւեց՝ վերադարձին տեսայ, որ էլի կուրծքդ զարդարում էր շուկայից չգնած իմ ծաղիկը:

Բարի աղջիկ, թէև այսօր ձմեռ է, բայց երբ դու գաս իմ ծաղկանոցը՝ քո ոտները ձիւնի փոխարէն ծաղիկներ կը տրորեն, յաւէտ կը հալչի պարտիզիս ձիւնը, մայիան իր գորգը կը փռի այնտեղ:

Ե՛կ, որ այդպէս լինի:

է.

Տրտից կարմրել էին այտերդ, երբ դուռը բացիր ու գործով մտար իմ աշխատանոցը:



Խենթ քայլերով մօտեցար գրասեղանիս և դրիր գլրկիդ ծաղիկներն խուրձը:

Ինչպէս միշտ, այնպէս էլ այժմ՝ ծիծաղն էր խաղում քո դէմքին:

Երբ համարձակեցի քեզնից ծաղիկ խնդրել ինձ համար, դու մերժեցիր:

— Ծաղիկներս տէր ունեն, — ասիր:

Քեզ էլ ոչինչ չասի: Ձէ՞ որ ծաղիկներդ տէր ունէին:

Հաւատ՛, չա՛ր աղջիկ, եթէ իմանայի, որ դու մի օր կը գաս իմ աշխատանոցը, իմ պարտէզի բոլոր ծաղիկները կը բերէի և կը փռէի քո ճամբին...

Բայց՝

«Ծաղիկներս տէր ունեն»:

Ձեմ մոռանում. իսկ դու չմոռանաս.

— Իմ ծաղիկները տէր չունեն...

\*  
\*  
\*

Երբ գնացիր՝ սեղանիս վրայ մնաց մի ծաղիկ:

Չգիտեմ մոռացա՞ր, թէ՞ այդպէս կամեցար, բայց զիտեմ, որ քո թողած ծաղիկն այսօր էլ դարդարում է իմ գիրքը, բոյրով օծում նրա թերթերը:

Այս չորացած ծաղիկը քեզ շատ անգամ է բերել իմ աչքերի առջև:

Դու ոչինչ չգիտես, բայց ես գիտեմ, որ իմ ծաղկահոցը փթթել ու գարունն է բուրում այնտեղ:

Ժլատ աղջիկ, երբ դու գաս քո կարօտով հիւսած իմ պարտէզը՝ բարի աչերդ կը տեսնեն նրան, սիրտդ կը զգայ, որ իմ պարտէզը դրախտ է դարձել...

Գնւթ արա՛, այ աղջիկ, մեր դռնով անցնելիս ոտդ դիր իմ պարտէզը...



## Ը.

Ես էլ էի տրամալայի սպասում՝ դու էլ:  
Ձեռքիդ մանուշակները շուրջդ բոյր էին փռում ու սիրտս Մայիսով ծածկում:

Եթէ դու այդքան սիրում ես ծաղիկ, ապա ինչո՞ւ մի օր իմ ծաղկանոցը չես գալիս:

Եկաւ ինձ տուն տանող վագոնը, բայց չնստեցի:  
Ի՞նչպէս կարող էի քեզ մենակ թողնել ու գնալ:  
Բայց երբ քեզ տուն տանող վագոնն եկաւ... դու ցատկեցիր ու նստեցիր:

Իսկ երբ վագոնը քեզ տարաւ, արևի ճառագայթները պաղեցին, սիրտս տխրեց ու ինքս ինձ հարցրի.

— Ինչո՞ւ նրա վարժուների մէջ չարութիւն կայ...


## Թ.

Երբ իմացայ, որ իմ և քո սրտի մէջ բարեկամութիւն կայ, աշխարհը ծիծաղով լցւեց:

Այդօրւանից պարտէզս փթթեց ու բոյրն առնողի կեանքը դրախտի փոխեց: Այդօրւանից պարտէզիս շատրրւանը մարգարտէ ցօղ էր ցանում ծառի ու ծաղկի վրայ:

Քո ցանկութեամբ իմ պարտէզի աւազանում կարապ էլ լողաց: Դեղձանիկները սուլոցով ու դայլայլով իմ պարտէզը անմահութեամբ օծեցին, բայց դու դարձեալ չեկար:

— Հաւատա՛, լաւ աղջիկ, հէքեաթը քեզնով է գեղեցիկ:



Եղաւ, որ մի օր դու ճերմակի փոխարէն սև հագար, դէմքդ թախժոտ դարձաւ, ժպիտդ մարեց ու վիշտդ քեզ մեր քաղաքից հեռացրեց:

Իսկ այդօրւանից տխրութիւնն ինձ ընկեր դարձաւ նրա համար, որ երկինք աչերիդ արցունք երևաց ու ծիծաղը դադարեց պարել քո դէմքին:



Այդօրւանից մեր քաղաքում տխրեց ամեն բան. անգամ արևը ծագում ու մայր էր մտնում անձիծաղ, իսկ գիշերները սև էին՝ սգի...

— Հաւատա՛, այ աղջիկ, մեր քաղաքը քեզնով էր գեղեցիկ...

Թէ որքան ժամանակ է դու չկաս՝ չգիտեմ, բայց այսօր երբ մտայ պարտէզս՝ տխրեցի:

Գունաթափ տերևները ծածկել էին հողը, չորացել էին վարդի ծառերը, կանաչը խանձել էր, աւազանի ջուրը նեխւել—կարապի թողած փետուրները երեսին, ծառերի ճիւղերը սպանւած թռչունի պէս թևաթափ էին եղել, դեղձանիկները չկային...

— Հաւատա՛, այ աղջիկ, թէ պարտէզ, թէ ծաղիկ քեզնով են գեղեցիկ:

\*  
\*  
\*


Այժմ պարտէզս ամայի, դուռս փակ թափառում եմ քաղաքից-քաղաք, լինում ամենուր ու չեմ գտնում ինձ անհունը տանող հայեացքդ երբէք...

— Հաւատա՛, լա՛ւ աղջիկ, թափառումներս քեզնով են գեղեցիկ:

Ես գիտեմ, որ աշխարհում ապրում է մի աղջիկ, որ իմ երջանկութիւնը պահում է իր մէջ, իր աչերի, սրտի ու ժպտի մէջ:

Իսկ դու չգիտես, որ միևնոյն երկնքի տակ քեզ որոնում է մի տղայ, որ սէրը սրտով շալակած, մինչև օրս էլ թափառում է քեզ գտնելու, քեզնով արևը տեսնելու համար:

— Հաւատա՛, այ աղջիկ, աշխարհ ու Աստուած քեզնով են գեղեցիկ:





\* \* \*

Աշխարհից հեռու, անծանօթ վայրում,  
Անձաւի միջին մաքուր մոմի պէս  
Մի ձիւնէ ծաղիկ պլպլում է հեզ  
Գիշերւայ կիսին և անուշ խորհում:

Քնքուշ երազող ծաղիկը մաքուր  
Քո հոգին է, քոյր...

Իբրև պապակած մի փոշոտ ճամբորդ,  
Մեղսոտ աշխարհի ափերով անցնում,  
Մեղքի բեռի տակ բեկւած ու ցաւոտ,  
Ոտերիս ափին շուշան եմ հագնում,  
Որ սուրբ անձաւիդ շէմքում չոքեմ ես  
Ու աղօթեմ քեզ:

\* \* \*

Դղեակիդ գմբէթն ամպերին հասած,  
Բիւրեղ սրահում երազում ես դեռ.  
Էլբրուսը քո դէմ ճակատը պարզած,  
Քո շուրջը պարտէզ, բոյր, կարկաշ,  
Թիթեռ...







ՄԱՅՐԵՆԻ ԵՐԳԵՐ

Հ Ր Ա Ի Է Ր

Հուսոյ դուռներն կը բացւին երդիքէն վեր, դաշտին վրայ.  
Արևու շող, շնու կաթիր,  
Մեռնիմ շողիդ նախընծայ...

Օրրանին մէջ արթընցան լաճուս աչեր պըճըլտուն.  
Շէնքած թոնիրդ՝ հարս, վառիր,  
Մեռնիմ թորւանդ բոցերուն...

Աքլորները կանչել են թառին վրայ գոմերուն,  
Հօտանդ տղաս, շնու գարթիր,  
Մեռնիմ չանիդ ուժերուն...

Աղջիկները թըրվուն՝ ջուրի գացին մութլուսուն.  
Եղնիկ-աղջիկս, շնու վազիր,  
Մեռնիմ բոպիկ ստներուն...

Ախոսին մէջ զըրնգանց... Մարալին գանգն է զընգան.  
Սարւոր գաւակս, արձըկիր,  
Մեռնիմ գանգին ձայներուն...

Ոսկի, ոսկի ցաներ է ոսկի Արև չորս բոլոր.  
Հող, առ ուժերըս կըրկին,  
Մեռնիմ Ուժիդ դարաւոր...

Վէսպեր



\* \* \*

Պայծառ գիշեր էր, մի սիրուն գիշեր,  
 Պատմում էի քեզ ոսկի հեքիաթներ...  
 Լճակը՝ խաղաղ, լճակը՝ կապոյտ,  
 Աստղերի ցուլքով ժպտում էր անփոյթ . .

Պարտէզը՝ յամբ էր, թփերը՝ գունատ,  
 Յօրանջում էին ծաղկունքը քնատ...  
 Սիրտս սրտիդ դէմ չունէր մի յանցանք.  
 Անցեալը՝ յուշ էր ու ներկան՝ պատրանք...

Զքնաղ գիշեր էր, մի անուշ գիշեր,  
 Պատմում էի քեզ ոսկի հեքիաթներ...

### ՀԱՆԴԻՊՈՒՄ

Հանդիպում ես ինձ ու ժպտում անփոյթ,  
 Օ, սրբան պանդ ես ու սրբան անդուլթ.  
 Դու չես հասկանում, որ իմ հուր սրտում,  
 Սիրոյդ սերմանած շուշանն է փթթում...

Կախարդ հայեացքով որսում ես հողիս,  
 Յանցում շողազարդ արեւը կեանքիս.  
 Մանկան պէս ասես ոչինչ չես զգում,  
 Յանցանքդ անմեղ հաճոյք է թւում...



Մի խենթ ակնթարթ տարւած երազում,  
 Համբոյրիս գինով արբել ես ուզում.  
 Քնքուշ ու յստակ յոյզերս պայծառ՝  
 Դու գոհ ես բերում հաճոյքիդ համար...

Ու չես հասկանում, որ իմ հուր սրտում,  
 Սիրոյդ սերմանած շուշանն է փթթում.  
 Հանդիպում ես ինձ ու ժպտում անփոյթ,  
 Օ, որքան պանջ սո ու որքան անգուլթ...

### ԱՆՑԵԱԼԻ ՅՈՒՇԵՐԻՑ

Այն վանդ էր, աւանդ, որ արժը ջինջ  
 Զերմ ու քնքշօրէն գուրգուրում էր ինձ.  
 Այն վանդ էր, որ ես ծաղիկների հետ  
 Վայելում էի կեանքը սիրաւէտ...

Ժպիտն հաճոյք էր, քաղցրայոյզ պատրանք,  
 Թեթև ակնարկն ինձ՝ բերում էր թովչանք.  
 Աշխարհն ինձ համար դիւթանք էր ու երգ,  
 Սիրտս չէր թախծում, չէր լալիս բեկբեկ...

Հողիս աստղերի գիրկն էր սաւառնում,  
 Անբիծ աղօթքով շողերին գգւում.  
 Դալար ու թաւիշ ափերին փրփուր,  
 Դօղանջում էին երազներս հուր...

...Այն վանդ էր, աւանդ, ամեն ինչ անցաւ,  
 Կեանքիս գարունը՝ անխօս դալկացաւ.  
 Ոսկի օրերիս յոյսերը կարմիր,  
 Ցաւի բեռի տակ, եղան ցան ու ցիր...

Վարսենիկ Աղասեան



# ԱՐՁԱՆԱԳՐՈՒԹԻՒՆ ԱՐՏԱԿԱՐԳ ԺՈՂՈՎԻ

(Քարտուղար Քարհանեանի թղթերից)

Այս տարւայ դեկտեմբեր ամսի 4-ին կայացաւ Ընկերութեան անդամների արտակարգ ընդհանուր ժողովը: Ընկերութեան վարչութեան նախագահն պ. Նաւումեանը ժողովը բանալով ընդգծեց հայ ժողովրդի ներկայ տագնապալից և օրհասական դրութիւնը և առաջարկեց մի նախագահ ընտրել ընդհանուր ժողովը կառավարելու համար: «Մեր ներկայ օրհասական դրութիւնը, — ասաց պ. Նաւումեանը, — հրատապ լուծումն է պահանջում»:

Ժողովի նախագահ ընտրւեց փաստաբան Ներսէս Մարգարեանը 27 ձայնով ընդդէմ 21-ի, ձեռնպահութեամբ 9 հոգու: Իսկ քարտուղար ընտրւեց երիտասարդ բանաստեղծ Արմենակ Քարհանեանը միաձայն:

Պարոն նախագահը, ընտրւելուց յետոյ, շնորհակալութիւն յայտնելով՝ հետևեալ ճառն ասաց.

«Սորապէս շնորհակալ եմ ինձ արւած այս բարձր պատւի համար: Այսպիսի մի ժամանակ, երբ մեր երկիրը գտնւում է Դամոկլեան սրի տակ՝ ես առաւել ևս կարիք եմ զգում և իմ ամենասեպուհ պարտքս եմ համարում կրկին ու կրկին շնորհակալութիւնս յայտնել յարգոյ ժողովականներիդ: Ինձ նախագահ ընտրելով՝ դուք նոյնն է թէ մի բացարձակ վստահութիւն ընծայեցիք ինձ այնպիսի մի պատմական վայրկեանին, պարոններ, երբ վճռում է մեր բազմատանջ ժողովրդի լինել-չլինելու գերագոյն խնդիրը... դուք, այո, վստահութիւն էք յայտնում



ինձ. ուստի և՛ վերստին ընդունէք, խնդրեմ, իմ անկեղծ շնորհակալութիւնը...

Սրանով բացւած եմ համարում մեր ընկերութեան այս արտակարգ ժողովը: Ջերմագինս ողջունում եմ ձեր ներկայութիւնը: Պարոններ! այսպիսի մի ժամանակ, երբ հայ բազմաչարչար ժողովրդի ապագան յղի է անակնկալներով, այսպիսի մի ժամանակ, — այն պարոններ — ձեզանից պիտի պահանջել խիստ լրջմիտ, կարելի է ասել՝ խիստ աչալուրջ և անձնէք վերաբերմունք դէպի մեր հասարակական պարտականութիւնները... Ուստի և՛ անցնենք գործի: Մենք ամենքս մեր հարազատ ժողովրդի հարազատ զաւակներն ենք և խորապէս զգում ենք նրա դառն ցաւերը:

Չեմ ուզում երկարացնել, քանի որ հարցը պարզ է բոլորիս համար: Մաղթում եմ ձեզ եռանդ և յաջողութիւն, որպէսզի մեր այս արտակարգ ժողովը կարողանայ արդարացնել այն յոյսերը, որ մեզ վրայ է դրել մեր բազմատանջ ժողովուրդը: Արտակարգ հանգամանքներում հրաւիրւած այս արտակարգ ընդհանուր ժողովը՝ արտակարգ գործ պիտի կատարի... Սա իմ խորին համոզմունքն է, որը -- ես հաւատացած եմ — անպայման նաև ձեր ամենքիդ համոզմունքն է:

Ժողովը համարում եմ բացւած»:

Այս հակիրճ ճառից յետոյ, պարոն նախագահը բացատրեց ժողովականներին այն կոնկրետ նպատակները, որոնց շուտափոյթ իրագործման համար հրաւիրւել էր արտակարգ ժողովը: Այնուհետև սկսեցին վիճաբանութիւնները, որոնք հետզհետէ ծաւալւեցին:

Առաջինը ձայն խնդրեց ուսուցիչ Գասպար Բաղամեանը՝ բողոքելով, որ ընկերութեան վարչութիւնը կանխապէս օրակարգ չէր կազմել: «Ես սպասում էի, — ասաց



նա, — որ մեր յարգոյ վարչութիւնը, որ հրաւիրել է ահա այս ժողովը... — Ես սպասում էի, որ մեր առաջ, ահա այստեղ, դրւած կը լինեն բոլոր այն խնդիրները, որոնց լուծման համար մենք կանչել ենք ահա այստեղ: Յարգոյ վարչութիւնը զանց է առել, որ բոլոր կուլտուրական երկրներումն է ընդունւած՝ որպէս հիմք կանոնաւոր և արդիւնաւէտ ժողովավարութեան: Ուրիշ խօսքով ասած՝ չկայ օրակարգ, որպէսզի մենք ի վիճակի լինենք սկսելու ահա այստեղ մի կանոնաւոր և արդիւնաւէտ աշխատանք»:

Նախագահ. — Բայց հօ ես արդէն բացատրեցի այն կոնկրետ խնդիրները...

Բաղամեան (շարունակելով). — Ներեցէք. ձեր բերանացի բացատրութիւնները, բացի այն՝ որ պակասաւոր էին, նաև ուշացած են: Բոլոր պարլամենտական երկրներում ընդունւած է, որ ժողով հրաւիրողները...

Նախագահ (զանգահարելով). — Պարզ է, պ. Բաղամեան, ձեր նկատողութիւնը: Ուստի և...

Բաղամեան. — Թո՛ղ տւէք: Թո՛ղ տւէք միտքս աւարտեմ: Ես լիակատար իրաւունք ունեմ օգտւելու խօսքի ազատութեան իրաւունքից: Ես ահա այստեղ շօշափում եմ ժողովավարական մի կարևոր հարց, որ կարգինալ նշանակութիւն ունի: Ուրիշ խօսքով ասած՝ օրակարգի անհրաժեշտութիւնը, օրակարգ: Ժողովականների ուշադրութիւնն եմ հրաւիրում այս կարևոր հանգամանքի վրայ: Օրակարգ չի կազմւել նախապէս: Դա նշանակում է այս, որ մեր ընկերութեան յարգոյ վարչութիւնը իր կոչման բարձրութեան վրայ չի կանգնած: Դա ասլացոյց է նրա կատարելապէս անձեռնհաս լինելուն: Եւ ես կարծում եմ, որ նախ քան ներկայ մոմենտին անցնելը կարևոր է քրննել յարգոյ վարչութեան գործունէութիւնը, որը չի դիմանայ ոչ մի կրիտիկայի:

Սարգիս Զախարեան (տեղից). — Որպէս ժողովական-



ներից մէկը, ես գտնուամ եմ պարոնի անտեղի յարձակումները վարչութեան հասցէին...

Բաղամեան (բարձր). — Վարչութիւնը կատարելապէս անձեռնհաս է: Ահա՛ ձեզ ապացոյց...

Նախապահ (զանգահարելով). — Ձերմագինս խնդրում եմ, պարոններ, չխօսել վարչութեան ձեռնհասութեան կամ անձեռնհասութեան մասին: Այսպիսի մի ժամանակ, երբ մեր ժողովրդի գոյութիւնն է վտանգւած, այսպիսի մի ժամանակ, երբ մեր արիւնարբու թշնամին...

Բաղամեան. — Օրակարգը, պարոն նախագահ, օրակարգը: (Նստում է):

Նախագահ. — Լիովին համաձայն եմ ձեզ հետ, պարոն Բաղամեան. պարզ է, ձեր նկատողութիւնը... (զանգահարելով) Պ. Զաքարեան, նստեցէք խնդրեմ. և խընդրում եմ նախ ձայն խնդրել ինձանից և ըստ այնմ խօսել: Ապա թէ ոչ անկարգութիւն կը մտցնէք ժողովի մէջ (զանգահարում է): Ուստի և՛ ո՞վ է ուզում ձայն խնդրել և խօսել օրակարգի մասին:

Բաղամեան (վեր կենալով). — Ես զարմանում եմ, պ. նախագահ. ինչպէ՞ս կարելի է խօսել օրակարգի մասին, քանի որ դեռ ևս օրակարգ չկայ մեր առաջ՝ շնորհիւ վարչութեան անձեռնհասութեան: Կարևոր է նախ կազմել օրակարգը: Այդ նպատակով՝ ես անհրաժեշտ եմ գտնում, որ մի փոքր ընդմիջում արւի:

Բաղամեանի առաջարկը առիթ եղաւ թեր ու դէմ կարծիքների: Քառորդ ժամից աւելի տևող վիճաբանութիւններից յետոյ, ձայների ճնշող մեծամասնութեամբ որոշւում է ընդմիջում անել՝ օրակարգը շուտափոյթ կազմելու և ժողովին ներկայացնելու նպատակով: Այդ որոշումն անցնելուց յետոյ, նախագահը հարց տւեց, թէ «քանի՞ ըսպէ ընդմիջում անենք»: Այս հարցի շուրջն ևս տեղի ունեցան բուռն վիճաբանութիւններ: Բաղամեանը առա-



Չարկում է քսան ընդամենը: Բայց ժողովականներին շատերը չեն համաձայնում, այլ առաջարկում են՝ մի քանիսը՝ տասը ընդամենը, մի քանիսն էլ՝ տասնուհինգ: Եղան նաև այնպիսիները, որոնք անհրաժեշտ էին համարում երկարացնել ընդամենը առնուհնդ կէս ժամով:

Ժողովականներին մէկն էլ, լրագրող Նարեկեանը, հարցին տալիս է այլ լուսաբանութիւն: «Նման խնդիրներին, —ասաց նա,— գործնական-պրաքտիքական նպատակայարմարութեան տեսակէտիցն է՝ որ հարկաւոր է մօտենալ: Այսինքն, ոչ թէ օրակարգը մշակելու պրոցեսը պէտք է յարմարեցնել ընդամենին, ժամերին և արշին այդպէս, այլ բոլորովին հակառակը պէտք է անել, այսինքն՝ ընդամենը ու ժամերը, նոյն իսկ, եթէ կամենաք, օրերը՝ պէտք է յարմարեցնել օրակարգը լիակատարօրէն մշակելու սկզբունք-պրինցիպին: Անշուշտ, ես չեմ ուզում ասած լինել՝ իբրև թէ օրակարգը մշակելու համար՝ մենք օրեր կամ թէ նոյն իսկ ժամեր վատնենք: Ոչ, ես այդ տեսակ ենթադրութիւն անելու բնաւ միտք չունեմ:

Նախագահ. — Դուք ի՞նչ էք առաջարկում:

Նարեկեան. — Առաջարկութիւնս... այո, ես ուզում եմ ասած լինել, որ գործնական-պրաքտիքական նպատակայարմարութեան տեսակէտից՝ բոլորովին աւելորդ է այս կամ այն ժամանակամիջոցը որոշել օրակարգի մշակութեան աշխատանքների համար...

Բաղամեան (տեղից). — Քսան, քսան ընդամենը: Քէտարկեցէք, պ. նախագահ, առաջարկս քէտարկեցէք, ժամանակ մի կորցնէք:

Նախագահը բոլոր առաջարկները ամփոփելով՝ նրանցից միայն երեքն է քէտարկութեան դնում, իւրաքանչիւրն առանձին. — «Երեք առաջարկ: Առաջինը... խնդրում եմ, պարոններ, ուշադրութիւն: Առաջին առաջարկը. — ընդամենը անել տասը ընդամենը...»



Բաղամեան. — Նախ իմ, նախ իմ առաջարկը, այսինքն քսան, քսան ըոպէ:

Նախագահ՝ (զանգահարելով). — Մի խանգարէք խընդրեմ: Երկրորդ առաջարկը...

Բաղամեան. — Ժամանակ մի կորցնէք, պ. նախագահ: (Ոտքի ելնելով) Ամենից առաջ քսան ըոպէն քւէարկութեան դրէք. և եթէ ձայների մեծամասնութեամբ ընդունուի իմ առաջարկը, ապա ուրեմն բոլոր միւս առաջարկները կը կորցնեն իրանց ուղղոն-դէտրը: Սա ժողովավարական տարրական ճշմարտութիւն է: (Նստում է):

Նախագահը (ուզում է շարունակել):

Պետրոսեան. — Շարունակէք, շարունակէք, պ. նախագահ, զուր ժամավաճառ ենք լինում:

Նախագահ (զանգահարելով). — Մի խանգարէք խընդրեմ, պարոններ... խնդրեմ: Ես ինքս շատ լաւ եմ իմանում, թէ ինչպէս է հարկաւոր այս կամ այն հարցը ձևակերպել... Ով որ համաձայն է ընդմիջում անել ոչ աւել քան քսան ըոպէով՝ խնդրում եմ ձեռք բարձրացնել:

Ուսուցիչ Բաղամեանը և ժողովականներից հինգ հոգի ձեռք են բարձրացնում:

Ժողովական Չումարեանը, որ տասը ըոպէի կողմնակից էր, նկատում է. «Սխալ էք անում, պ. նախագահ, լաւ սկսել էիք, էլ ինչո՞ւ փոխեցիք հարցադրութեան ընթացքն ու հերթը: Ես որպէս կողմնակից տասը ըոպէի՝ ցանկալի է, որ դուք ձեր արդէն սկսած ձևով առաջ տանէք գործը: Իսկ այդպէս, ինչպէս դուք փոխում էք ընթացքն ու հերթը, չի կարելի, որովհետև դուք՝ որպէս նախագահ՝ ձեզ վրայ պատասխանատուութիւն է ընկնում:

Բաղամեան — Ժողովավարական ամենատարրական և

. . . . .  
 . . . . .  
 . . . . .



(Արձանագրութեան 5-րդ, 6-րդ, 7-րդ և 8-րդ երեսները պակասում են Քարհանեանի թղթերի մէջ: Երևի դուրս ընկել՝ կորել են: Ուստի մենք բաց ենք թողնում Բաղամեանի խօսքերի և յաջորդ միւս վիճաբանութիւնների շարունակութիւնը՝ մինչև 9-րդ երեսը, որը սկսւում է այսպէս. — ...«ներկայացնելով օրակարգը»:

Ընդմիջումից յետոյ ժողովը վերսկսեց ժամի 11-ից տասը ընդէ անց:

Պարոն նախագահը բարձրաձայն կարդում է օրակարգը, որը կազմւել էր հետևեալ կերպով.

1. Ընկերութեան վարչութեան զեկուցում:
2. Ներկայ մոմենտը և ընկերութեան անելիքը:
3. Ընկերութեան կանոնադրութեան 7-րդ, 10-րդ և 16-րդ կէտերի փոփոխութեան խնդիր:
4. Ընկերութեան նախագահի և ընկերութեան վարչութեան նախագահի փոխ-յարաբերութեան և փոխադարձ իրաւունքների կօմպետենցիայի խնդիր (առաջարկութիւն ընկերութեան անդամ Տելեմաք Բաղամեանի):

##### 5. Ընթացիկ հարցեր:

«Այս է մեր այսօրւայ ժողովի օրակարգը», — ասաց պ. նախագահը և երկրորդ անգամ կարդալով օրակարգի բոլոր հինգ կէտերը՝ աւելացրեց. — «Այս օրակարգը համապատասխանում է մեր ժողովրդի այժմեան կարիքներին: Խորապէս համոզւած եմ, որ այսպիսի մի ժամանակ, երբ արտաքին թշնամին սպառնում է ոչնչացնել մեզ՝ մենք աչալուրջ կերպով կը վերաբերւենք այս հարցերին: Բաղամեան (վեր է կենում). — Ես առաջարկում եմ...

Նախագահ. — Նախ ձայն խնդրեցէք:

Բաղամեան. — Չայն եմ խնդրում:

Նախագահ. — Խօսքը պատկանում է պ. Բաղամեանին:

Բաղամեան. — Ես առաջարկում եմ՝ ահա այս օրակար-



գի կէտերի յաջորդականութիւնը փոփոխութեան ենթարկել: 4-րդ կէտը, որ իմ առաջարկութեան հիման վրայ է մտցւել օրակարգի մէջ, «ընկերութեան նախագահի և ընկերութեան վարչութեան նախագահի փոխ-յարաբերութեան և փոխագարձ իրաւունքների կօմպետենցիայի խնդիր».— ահա այս 4-րդ կէտը կարևոր է դարձնել առաջին, առաջնագոյն կէտ, ուրիշ խօսքով ասած, «վարչութեան զեկուցումը» կէտի փոխարէն, որը դրւած է ամենից առաջ, կարևոր է դնել «ընկերութեան նախագահի և ընկերութեան վարչութեան նախագահի փոխ-յարաբերութեան և այլն», այսինքն իմ առաջարկութիւնը:

Ժողովականների միջից լաւում են ձայներ, թէ «օրակարգը լաւ է կազմւած, ոչ մի փոփոխութիւն հարկաւոր չէ»:

Ի լրումն իր արած վերջին առաջարկի, ուսուցիչ Բադամեանը ասում է, որ «իմ առաջարկած փոփոխութիւնը սերտ կերպով կապւած է մեր ներկայ ազգային-սոցիալական դրութեան հետ, որովհետև մեր ընկերութեան այժմեան վարչութեան նախագահը, որ ահա գտնւում է այստեղ՝ չի կարողանում ըմբռնել, որ...

Նախագահը խիստ և մի քանի անգամ զանգահարում է՝ յայտարարելով, որ ինքը թոյլ չի տայ վիրաւորել անհատների: Ժողովականներից մի քանիսը բողոքում են պ. Բադամեանի խօսքերի դէմ և նախագահը քէտարկութեան է դնում հարցը: Ձայների մեծամասնութեամբ որոշւում է անփոփոխ թողնել օրակարգի հինգ կէտերի յաջորդականութիւնը:

Դրանից յետոյ ընկերութեան վարչութեան նախագահ Տ. Աբրահամեանը մի ընդարձակ գրաւոր զեկուցում է կարդում: Չեկուցումը լսելուց յետոյ ժողովն անցնում է «ներկայ մոմենտը և ընկերութեան անելիքը» կէտին:



Սկսուած է կարծիքների և հայեացքների փոխանակութիւն: Բայց ժամանակը ուշ լինելու պատճառով, ժողովի շարունակութիւնը յետաձգուած է յաջորդ օրւան:

«Խնդրում եմ, պարոններ, —ասաց նախագահը՝ ժողովը փակած յայտարարելով, — խնդրում եմ բոլորիդ վաղը երեկոյեան ժամի ճիշտ 7<sup>1</sup>/<sub>2</sub>-ին անպատճառ ներկայ գտնւել: Հարկաւոր է լուրջ վերաբերւել գործին»:

Ժողովը վերջացաւ գիշերւայ ժամի մօտաւորապէս 1-ին:

Վ. ՎԱԼՍԳԻՆ





„ԱՆՄԱՆԱԽԻ“ ԱՇԽԱՏԱԿԻՑՆԵՐԸ

(ՇԱՐԺ ՄԻՔ. ՄԱԶՄԱՆԵԱՆԻ)



ՍՏ. ԶՕՐԵԱՆ



Մ. ԷՓՐԻԿ







### ԿԱԲԱՐԷԻ ՊԱՐՈՒՇԻ

Օ՛, ես քեզի շատ եմ դիտեր  
 Խորհրդաւոր, խորհրդազուրկ պարի աղջիկ.  
 Տեսեր եմ քեզ մեղքի, թախծի խելառ թիթեռ՝  
 Կաբարէի պարուհի...  
 Կընստիս դուն ծունկըդ ծնկանդ  
 Երկար, երկար.  
 Ու մոռացման երազանքին հիւր կերթաս:  
 Ու երբ յանկարծ կը զարնէ  
 Միւզիքային ծնծղան,  
 Դուն ալ դուն չես,  
 Դուն ալ ան չես.  
 Կելլաս վազով ինձ կը կանչես.  
 Դէմքըդ տապ-գոլ, աչքերըդ հոլ-ր  
 Ու միտերըդ ինքնազլուխ կը պարեն:  
 Ու ձեռքըդ երբ կերկարես,  
 Չը գիտես թէ ինձ ալ քեզ հետ  
 Խելառութեան կըտանիս.  
 Ջիղերուս մէջ կենսատենչ  
 Խարոյկները կը հրդեհես,  
 Մինչև շունչըդ վերջին  
 Կը պարես, կը պարես, կը պարես դուն  
 Միւզիքային արբեցուցիչ վազքին տակ,  
 Մինչև անոր հնչիւնները կը հալին:



Հնչիւնները շունչիդ հետ  
 Ու շուրթերէդ ան, շիկնած  
 Սա բառերը կը սորանյ.  
 «Ա՛հ, ի՛նչ աղւոր, ի՛նչ լաւ է սա,  
 Ի՛նձ ալ, քեզ ալ մոռցանյ, մոռցանյ. .»

### ՃԵՐՄԱԿ ՎԱԼՍԸ

Ինչո՞ւ ես հագել էի ամպոտ շորերըդ,  
 Որ փրփո՞ւր, փրփո՞ւր կը թւիս.  
 Կը լողաս լոյսին տակ անձրևող՝  
 Կարապի պէս, կարապի պէս ըսպիտակ:

Գիշերը քուկինդ է, թևաւոր թագուհի,  
 Պարերով արբեցիր, պըտըտիր, պըտըտիր,  
 Երազներս առ քու թևին տակ պարուրէ,  
 Ի՛մ խելքի ու մտքի բանալի...

Սուրալով մորթոտէ միտքըս հիւանդոտ,  
 Գլխապտոյտ դարձրո՞ւ տիեզերքը քեզ հետ.  
 Կապտաչեայ երազներըս խնկահոտ  
 Չօնէ, արծաթ թևերով ի՛մ կարապ գիշերւայ:

Դէ փոէ ճերմակ փէշերդ թաւիշեայ,  
 Դուն մեծ ծով անձնու՞նդ ու անվերջ յոյզերու,  
 Անբասիր, ամփոփիր լուսակաթ քու գրկում  
 Բիւր փրփուր խելայեղ հաճոյքի.




Որպէս ծով հեղեղի՛ր կարկաչով  
 Դահլիճին կամարներն անժպիտ  
 Ու փռէ՛ քու խելառ վալ՛սով  
 Արբեցո՛ւմ, արբեցո՛ւմ, արբեցո՛ւմ...

Ոտիդ տակ ըսպիտակ մարմարն է.  
 Դէ, պարէ, պարուրէ երազներս անուժ,  
 Քու ծոցում կապո՛յտ երազներ լեցուն,  
 Դէ, սուրս.

Ոտիդ տակ ըսպիտանկ հոգիս կը լողայ...

Արտ. Յարոյեան





\* \* \*

Աղօթք չունի յոգնած հոգիս այս ուշ պահուն,  
Այս ուշ պահուն խօսքեր չունին շուրթերս անգոյն.  
— Ողջը տւի, ողջը տւի քո լոյս հոգուն  
Ու աչքերիդ, ծով աչքերիդ ծովից անհուն:

— Ո՞րտեղից ուր հանդիպեցիր օրերիս ուշ,  
Ո՞րտեղից ուր տարածեցիր հմայքդ անծայր,  
Ո՞րտեղից ուր ճառագայթեց հոգիդ պայծառ,  
Հոգիդ պայծառ, հայեացքդ լոյս, սիրտդ անյուշ...

Իր Ասածոյ հետ խորհուրդ չունի հոգիս հիմա.  
Զրոյց չունի իր սրտի հետ մենութեան մէջ.  
— Ոսկեզօծւեց այսօր քեզնով կրկին մի էջ  
Իմ օրերիս պատմութեան մէջ... ու կրմնայ  
Անջնջելի անունը քո որպէս կնիք հոգուս վրայ,  
Որպէս փականք սրտիս վրայ խոստումը քո.  
— Ո՞րտեղից ուր էս լուսազարդ երկնի ներքոյ  
Շղթայեցին մեզ իրարու—երկրի վրայ:

Լէյլի





Մեր քեռի Սիմօնը շատ չքաւոր մարդ էր, այնքան չքաւոր, որ շատ օր հաց չէր ունենում տանը և կինն ըստիպւած գարի էր խաշում երեխաներին կերակրելու, իսկ աղջկերքն իրենց գլուխը պահելու համար գնում էին հարեանների մարգերը քաղհանելու կամ ունևորների բարձերի համար փետուր էին քաշում ձմեռները:

Ես այս բոլորը լաւ յիշում եմ, որովհետև այդ մամանակները տասը տարեկան մի տղայ էի և շուտ-շուտ գնում էի նրանց տուն: Չնայած իր այս չքաւորութեան, քեռի Սիմօնը սակայն տարւայ մեծ մասը անգործ էր մընում և առհասարակ այն կարծիքի էր, որ Աստուած իր ստեղծածին պարտաւոր է պահել, ինչպէս թռչուններին: Լինելով տատիս եղբայրը՝ նա գրեթէ ամեն օր գալիս էր մեր տուն գրուցելու, մանաւանդ ձմրան երկար երեկոներին: Դա մի բարձրահասակ մարդ էր՝ երկար ձեռներով ու երկարուն ոտներով և կոկորդից դուրս ցցւած մի ոսկորով, որ կարծես բկում մնացած հաւի գլուխ լինէր: Իսկ երեսի և գլխի ալեխառն մազերն ինձ միշտ յիշեցնում էին նապաստակի մորթի. այնպէս դժւար էր ջոկել նրանց սեն ու սպիտակն իրարից: Եւ ընդհանրապէս՝ մեր քեռի Սիմօնը մի իսկական գիւղացի էր—նահապետականօրէն աւանդապահ ու սրտաբաց: Կարծես հիմա էլ տեսնում եմ, թէ ինչպէս սև մորթենին գլխին, սև չիբուխն ատամների արանքին, բանում է մեր տան դուռը և շէմքում կանգնում:

— Բարի օր ձեզ, — ասում է հանդիսաւոր ձայնով,



և մի առժամանակ կանգ առնելով՝ հայեացքը պտտում  
տան մէջ:

— Աստուծո՛ւ բարին, քեռի Սիմօն:

— Ի՞նչ ունէք ուտելու:

Մերօնք տալիս են կերակրի անուշը. — թանով ապուր  
կամ բրնձով շորւա:

— Դէ, մի աման բերէք տեսնեմ:

— Համեցիր, քեռի Սիմօն:

Եւ քեռի Սիմօնն ինչպէս իր տանը նստում է եղած  
կերակուրն ուտելու, վրան չկաթեցնելու համար գդալի  
տակ հացի մի կտոր բռնելով: Ու կշտանալուց յետոյ սկը-  
սում է պատմել, թէ ի՞նչ երազ է տեսել գիշերը:

Այսպէս էր քեռի Սիմօնը. գրեթէ ամեն գիշեր նա  
երազ էր տեսնում. ու նրա երազները լինում էին առա-  
ւելապէս այն մասին, թէ ինչպէս Աստուած, սրբերը ներ-  
կայանում են իրեն և ասում, թէ անտառի այս-ինչ տե-  
ղում գանձ կայ թագնւած — մթ պղինձ ոսկի՝ խուփն երե-  
սին — ու խորհուրդ են տալիս հանելու. «Ե՛լ, Սիմօն, գնա  
հանիր, — ասում է Աստուած. — գնա, բաւական է խեղճ  
ապրես»:

— Կսպէս է հրամայում Տէրը, — վերջացնում էր  
ամեն անգամ քեռի Սիմօնն աստուածավախ ձայնով, երե-  
սը խաչակնքելով:

Տաստ, որ մի բարի, միաժամանակ և շատ յամառ  
կին էր, երբէք չէր հաւատում եղբօր երազներին, կըշ-  
տամբելով, որ նա երեխայ ժամանակ էլ փողոցներում  
պտտում էր փող գտնելու յոյսով, բայց բնաւ չէր գըտ-  
նում: Ու բուրբից վերջը տաստ յիշեցնում էր նրան եօթ  
րուբլի պարտքը, որ տալու էր իրեն: Իսկ ինչ վերաբե-  
րում է մօրս, նա՛ ամենայն բարեպաշտութեամբ ունկըն-  
դրելով քեռի Սիմօնին՝ երկիւղով խաչ էր քաշում երե-



սին ու հետաքրքրուում, թէ ինչ տեսակ մարդ է Ասուած, ինչպէս են երևում սրբերը և ինչ կայ առհասարակ նրանց վրան ու հագին:

— Սրբերը, — խաչակնքում էր երեսը քեռի Սիմօնը, — մեռնեմ նրանց զօրքին. նրանք երևում են ալ-կարմիր հագած, շատ ժամանակ՝ ձի նստած... Իսկ Ասուած — երեսս ոտքի տակը — գալիս է սիպտակ շորերով: Ծէր, ալևոր մարդ է, — ասում էր նա երկիւղալից խանդադատանքով. — բամբակի պէս սիպտակ մազեր ունի: Էնքան բարի է, էնքան քաղցր ձէն ունի, որ երբ խօսում է՝ ուզում ես միշտ լսել: Ասում է. «որդի», գնա՛ ու հանիր, գնա՛ ու հանիր»:

— Հէ՛ջ բան էլ չես հանի, — նկատում էր տառս ձեռք անյուշալի թափ տալով և երեսը եղբօրից շրջելով:

— Կը հանեմ, Հերիքնազ, կը հանեմ. կը հանեմ ու քո օխտը մանէթը կը տամ. գլխից կը տամ. աղջկերանցս էլ մարդու կը տամ, տուն էլ կը շինեմ... — յայտարարում էր քեռի Սիմօնը հանդիսաւորապէս և մի առ մի օրինակներ թւում, թէ որտեղ ինչ թագնւած գանձեր են հանւել. — Լօրուտում, ասում են, մինը մի կճուճ ոսկի է գտել արտը վարելիս ու հիմի յայտնի հարուստ է: Իսեղում մի ռանձպար մարդ, ասում են, արծաթէ ամաններ է գտել հողում, երրորդը՝ գութանի սարք: Իսկ ես ինչո՞ւ չեմ կարող գտնել. ուրեմն սո՞ւտ է ասում Ասուած: Կը հանեմ, Հերիքնազ, կը հանեմ. կինս էլ չի հաւատում քեզ պէս, բայց կը հանեմ, կը տեսնես, — կրկնում էր քեռի Սիմօնը. — միայն թէ մի հաւատարիմ օգնական ունենամ...

Այս ասելով՝ նայում էր հօրս. իսկապէս նա ուզում էր, որ այդ օգնականը լինի անպայման հայրս, որին և շարունակ առաջարկում էր գնալ գանձը միասին հանելու: Մենակ չէր ուզում, որովհետև, իր ասելով, միայնակ դըժլար կը լինէր. ուրիշի էլ չէր կամենում ընկերացնել, որով-



հետև՝ ո՛ւմ կարելի էր վստահել հիմա... Հայրս թէև, իբրև հին գիւղացի, մասամբ հաւատում էր քեռի Սիմօնի երազներին, բայց, չգիտեմ ինչո՞ւ, միշտ խուսափում էր նրա առաջարկից, ասելով թէ՛ դժւար է գտնել, տեղը հաստատ յայտնի շէ, և ուրիշ բաներ: Եւ քեռի Սիմօնը նրա մերժումներից դժգոհ՝ հեռանում էր ամեն անգամ միևնոյն խօսքերը կրկնելով.

— Դէ, դու գիտես: Ասում եմ մի բանի տէր էլ դու դառնաս...

Բայց հօրս յամառութիւնը, վերջապէս, կոտրւեց մի օր, երբ քեռի Սիմօնն անչափ ուրախ, խնդութիւնից ասես խելագար, նետուեց մեր տուն և յայտարարեց, թէ գանձի իսկական տեղը գտել է արդէն: Դա անտառի մէջ է, աւերակ եկեղեցու մօտ, մի մեծ հաճարենու տակ:

— Պիտէք, — սկսեց նա խանդաղատալից եղանակով, երկար ձեռները գլխից վեր բռնած. — նշանց տուեց Տէրն Ինքը, Տէրն Ինքը Իրա ձեռով: Եկաւ ու ասում է բարկացած. «Ինչի՞ չես գնում ասածս հանում. դու Ինձ չե՞ս ուզում լսել. ես քու աչքերը կը հանեմ» — ասում է: Բայց Իրա աչքերը բարի, բարի են... «Տէր, ասում եմ, տեղը չգիտեմ»: «Չգիտես, ասում է, արի ցոյց տամ»... Ու ձեռքս բռնած տարաւ կանգնեցրեց մի մեծ հաճարի ծառի մօտ ու ասում է. «Հէնց սրա տակ է որ կայ»... Ու ինքը գնաց, գնաց. չտեսայ էլ ո՛ւր գնաց...

Մի առժամանակ Սիմօնը մնաց գոհութեան լուսաշող ժպիտը դէմքին և ասլա դարձաւ հօրս.

— Հը՛, հիմի ի՞նչ կասես... Ես, ասեմք, մենակ էլ կերթամ, բայց լաւ կըլի, որ դու էլ ըլես. երեխի տէր ես, թող մի բան էլ քեզ ընկնի: Իրա համար, յոյս ունեմ, Տէրն ինձ չի պատժի. շատ-շատ՝ իմ քրոջ տղէն է, կասեմ:

Հայրս ծիծաղեց: Դա նշան էր, որ տրամադրութիւնը լաւ է: Եւ իսկապէս, չգիտեմ, քեռի Սիմօնի հանդիսաւոր



պատմութեան ազդեցութեան տակ, թէ՛ մօրս յորդորների հետևանքով, նա համաձայնութիւն տւեց քեռի Սիմօնին ընկերանալու: Որոշւեց հետևեալ օրն իսկ մի զոյգ աղաւնի զոհաբերել մեծ հաճարենու տակ և երեկոյեան, երբ մութը լաւ կը մթնի, գնալ հանելու:

Այդպէս էլ արին:

\* \* \*

Ինչ երջանիկ երեկոյ էր այդ երեկոն...

Ինչ յոյսեր, ինչ երազներ էին սաւառնում մեր փոքրիկ խրճիթում: Ինչեր չպիտի անենք, եթէ մեր ձեռն ընկնի այդ մի կաթսայ ոսկին. էլ նոր տուն, էլ նոր շորեր... ցոյց կը տանք այն ժամանակ բոլոր հարուստներին... Քեռի Սիմօնն ուրախութիւնից շարունակ կատակում էր տատիս հետ. «Ճակատիդ ոսկի պըտի շարեմ, ոսկի». իսկ տատս կրկնում էր միալար. «Քու ոսկին ինձ պէտքը չի, իմ օխտը մանէթը տուր»:

Վերջապէս, երբ մութը լաւ մթնեց և ոտքը խաղաղւեց գիւղում, քեռի Սիմօնն ու հայրս՝ բահ ու քլունգ վերցրած՝ դուրս եկան տնից: Քեռի Սիմօնը ոսկու համար տանում էր իւղի մի տիկ, կաթսան ծանր լինելու դէպքում կէսը նրա մէջ լցնելու նպատակով: Մենք արթուն մնացինք սպասելու:

Երկւոր, շատ երկար տևեց այդ սպասումը: Եւ որքան երկարում էր ժամանակը, այնքան աւելի յոյսերով լցւում էր մեր սիրտը. ուրեմն մի բան գտել են, որ ուշանում են... երևի շատ խորն է թաղւած... անպայման մի բան գտել են...

Չգիտեմ, քանիերորդ անգամն էինք կրկնում այս մտքերը, երբ դուռը թակեցին յանկարծ: Հայրս էր... բայց դատարկ ձեռներով: Ինչո՞ւ, մի՞թէ ոչինչ չկար, քեռին ո՞ւր



է հապա — հարցերի տարափ էր, որ տեղում էին հօրս գըլխին: Իսկ տատս, հօրս տեսնելով այդպէս, գլուխը շարժեց քմծիծաղով: — Ես էդպէս էլ գիտէի, որ ոչինչ չի ըլի. — յայտարարեց նա: — Գիտէի էլի...

Բայց տատս զուր էր շտապում: Հայրս եկել էր լինգի: Նրա պատմածից երևաց, որ բանդել հասել էին մի սալաքարի, որը սակայն չեն կարողանում շրջել, ուստի եկել է լինգը տանելու այդ քարը շրջելու, և ինձ վերցնելու, որ պահակի դեր կատարեմ: Ո՛վ գիտի, կարող է պատահել մարդիկ գան և իրենք զբաղւած՝ չնկատեն:

— Որ սալ կայ, ուրեմն պղինձն էլ գրա տակ կըլի, — ասաւ մայրս:

Հայրս էլ այդպէս էր կարծում, և ամբողջ ճանապարհին շուկով կրկնում էր, թէ այդ սալի տակ անպատճառ մի բան պիտի լինի... Ժամանակը գիշերւայ կիսից անց էր. աշնանային խոնաւ մութը սարսափ էր բերում իմ վախուկ հոգուն. ճանապարհի շուրջը երևացող թփերը թւում էին ինձ դարան մտած գազաններ, ծառերը՝ աւազակներ ու վարդապետներ, իսկ մասրենիները՝ պար բռնած սատանաներ: Չնայած այս բոլորին, մի բան այնուամենայնիւ ինձ դիւթում, քաշում էր դէպի մութ, խըշշացող անտառը, ուր, թւում էր թէ, քեռի Սիմօնն արդէն հանած պիտի լինի ոսկին... Բայց մենք նրան գտանք տակաւին փոսի մէջ. սաստիկ հեռւմ և քրտինքը սրբում էր շուտ-շուտ: Մեզ տեսնելով՝ նա գլուխն աւելի բարձրացրեց փոսի մէջ:

— Եկէք, եկէք. սայլը ժաժ եմ քցել, — գրեթէ բացականչեց նա ականյայտնի մի հրճւանքով:

Փոսը բաւական խոր էր. քեռի Սիմօնի գօտկաստեղից էլ բարձր: Անտառային փխրուն հողը կիսուել էր նրա երկու կողմը և սեին էր տալիս գորշ շրջապատի մէջ: Հայրըս խկոյն լինգը ձեռին մտաւ փոսը, և այնուհետև սկըս-



«Եց մի ծանր աշխատանք՝ տնքոցով ու մկանուկներին լա-  
րումով: Աստծուն օգնութեան կանչելով՝ ուսերնին դնում  
էին նրանք լինգի տակ և ջանում սալը շրջել, երբեմն ա-  
կանջնին սրելով, թէ չի՞ լաւում արդեօք մի ոտնաձայն:  
Ոչինչ չկար: Ես ամենայն աչալըջութեամբ կատարում էի  
իմ պաշտօնը, բայց ոչինչ չէի նկատում: Տերևներն էին  
միայն թափւում աշնան անտառում, որ ահի մի դողով  
բռնւած, ասես, ինչ-որ շնջում էր շարունակ խո՛ւլ ու խո՛ր  
մի ձայնով, որ աւելի նման էր հառաչանքի: Թւում էր  
երբեմն, թէ անթիւ մարդիկ՝ աչքերնին չորս արած՝ գաղ-  
տագողի նայում են մեզ ծառերի ետևից, որ ոսկին դուրս  
գալուն պէս յարձակւեն յափշտակելու:

Երկար, շատ երկար տևեց աշխատանքը փոսում. և  
բազմաթիւ փորձերից յետոյ, վերջապէս, յաջողւեց սալը  
շրջել: Բայց այն, ինչ որ սպասում էինք՝ չկար, աւանդ:  
Ոսկու փոխարէն դուրս եկան մեռելի ոսկորներ... Այդ  
տեսնելով՝ հայրս վրդովւած դուրս եկաւ փոսից, իսկ քե-  
ռի Սիմօնը մի առժամանակ մտածմունքի մէջ ընկաւ:

— Է՛, ինչպէս երևում է, սխալւել ենք, — ասաւ նա  
քիչ յետոյ. — հաճարի էն կողքը քանդելու տեղակ՝ էս կող-  
քի՛ն ենք քանդել. հիմի եմ յիշում, որ էն կողքը պըտի  
քանդէինք:

Հայրս աւելի վրդովւած հաւաքեց բահն ու լինգը և  
կանչեց ինձ:

— Ո՞ւր...

— Տուն, — եղաւ հօրս պատասխանը:

— Կաց հլա, այ մարդ. կսոց, մի էն կողքը քանդենք...

— Դու հանի քեզ ըլի, — ասաւ հայրս վերջին անգամ,  
և մենք ճանապարհ ընկանք:

Մեր ետևից քեռի Սիմօնը ցածր ձայնով մի քանի  
անգամ կանչեց, խնդրեց դառնալ, բայց հայրս մնաց ան-  
դրրդւելի. ետ անգամ չնայեց:



Տուն հասանք երկրորդ աքլորականչին՝ հիասթափ-  
ւած ու տրտում...

\* \* \*

Հետևեալ օրն առաւօտեան հենց նոր նստել էինք թէ-  
յի, քեռի Սիմօնն եկաւ՝ դարձեալ ուրախ տրամադրու-  
թեան մէջ:

— Չէի ասում, — սկսեց նա շէմքից. — էդպէս էլ կայ-  
մենք սխալւել ենք: Գիշերն աչքս կպցրի թէ չէ՝ նորից  
երևաց նա (քեռի Սիմօնը խաչակնքեց երեսը): Ասում է՝  
«ինչո՞ւ ծառի աջ կողքը քանդեցիր. գնահ, ասում է, ձախ  
կողքը քանդիր»:

— Դէ գնահ քանդիր էլի, — ասաւ հայրս դժգոհ հան-  
դարտութեամբ. — Ինձ ինչո՞ւ ես ասում որ:

— Խի, բա դու գալիս չե՞ս:

— Չէ:

Խի՞ որ:

— Էնպէս...

Քեռի Սիմօնը լուռ, դժգոհ հայեացքով չափեց հօրս  
ոտից-գլուխ և արագ շրջեց դէպի դուռը:

— Դէ մեղքն ու վարձքը բոլ վզին, ախպէր, — ասաւ  
նա շէմքից. — ասում էի՝ մի բանի տէր էլ դու դառնաս...

Ու գնաց:

Երկու օրից յետոյ սակայն նա դարձեալ եկաւ և ան-  
կեղծօրէն յայտնեց, թէ էլի շշկլւել է. պէտք էր քանդել  
ոչ թէ մեծ հաճարենու տակ, այլ նրա կողքի հաճարենու,  
ուր հենց նշաններ են նկատուում. հողը նստած է մի քիչ:  
Այդտեղ անպատճառ մի բան կայ: Եւ, վերջապէս, չի կա-  
րող պատահել, որ չլինի. չէ՞ որ առաջ, մեղանից շատ ա-  
ռաջ, այդտեղ գիւղ է եղել. եկեղեցի կայ. և շատ բնա-  
կան է, որ մարդիկ թուրքերի երեսից փախչելու ժամա-



նակ իրենց գանձերը թագցրած լինեն այդտեղ: Ի զուր  
չէ, վերջապէս, որ երազում միշտ ցոյց են տալիս:

Հայրս սովորաբար լռում էր, տատս սակայն առաջ-  
այ պէս շարունակում էր իր կասկածանքն ու կշտամ-  
բանքը յայտնել: Բայց քեռի Սիմօնն ամեն անգամ ասում  
էր հպարտ արժանապատուութեամբ.

— Կը տեսնես հիմի՝ կը գտնեմ, թէ՛ չէ: Կը տեսնէք...

Անցաւ մի ամիս, երկու ամիս, քեռի Սիմօնը բան  
չէր գտնում և կինը շարունակ գալիս էր տատիս գան-  
գատելու, որ մարդը գիշերները տանը չի մնում ու խընդ-  
րում էր եղբօրը բան հասկացնել: Իսկ մինչ այդ ձմեռը  
եկաւ. ձիւնը ծածկեց գիւղ ու անտառ, և գետինը սառաւ  
քարի պէս: Երբեմն այնպէս ցրտեր էին լինում, որ ծտե-  
րը երամով մտնում էին գոմերը և գայլերը գիշերները  
ոռնում էին գիւղի մօտ: Քեռի Սիմօնն այժմ ման էր գա-  
լիս իր հին, մաշած քուրքն ուսերին. իր երեկոները նա  
անցնում էր օդաներում կամ գալիս էր մեր տանը զրու-  
ցելու: Եւ ամեն անգամ երբ խօսք էր լինում գանձի մա-  
սին, նա տխրութեամբ նայում էր վառարանին և կրկնում.

— Սպասէք, սպասէք մի գարունը բացւի... կը տես-  
նէք... Մի բան որ տեղը գիտեմ...

Եւ, իսկապէս, մարտին, երբ ձիւները կամաց-կամաց  
հալ ընկան և գետինը փափկեց, քեռի Սիմօնն այժմ աւե-  
լի մեծ եռանդով վերսկսեց իր աշխատանքները: Այժմ նա  
ասում էր ոգևորւած. «Ըհր, եա էսօր, եա էգուց» .. Բայց  
օրերն անցնում էին օրերի ետևից և ոչինչ չէր լսւում,  
թէ քեռի Սիմօնը մի բան է գտել. ու մի օր էլ յանկարծ  
լսեցինք, որ նա հիւանդացել է՝ սաստիկ հազում է ու  
տնքում: Կնոջ ասելով՝ մի գիշեր անտառից եկել էր ու  
անկողին մտել: Տատս իսկոյն գնաց եղբօրը տես:



Չանցաւ սակայն մի երկու օր, քեռի Սիմօնը վախճանւեց:

Մեռնելուց մի ժամ առաջ նա յայտնել էր կնոջը գանձի տեղը և յանձնարարել՝ գտնել մի հաւատարիմ մարդ՝ հողի տակից այդ պահուստը հանելու:

— Խոստացիր որ կը կատարես, — ասել էր քեռի Սիմօնը:

Կինը խոստացել էր և նա հանգիստ փակել էր աչքերը:

Այժմ յայտնի չէ ինձ՝ կինը կատարե՞լ է նրա կտակը թէ՞ ոչ, բայց ես այսքանը կարող եմ ասել, որ քեռի Սիմօնի ընտանիքը մինչև այսօր էլ ապրում է առաջւայ պէս չքաւոր, իսկ անտառում՝ աւերակ եկեղեցու շուրջը, կան բազմաթիւ փոսեր՝ պատուտակներով ծածկւած ու հին տերևներով լիքը. և ամեն անգամ, երբ տաւարն արածելու ժամանակ անզգոյշ մողիները կամ նոյն իսկ կովերն ընկնում են նրանց մէջ՝ տաւարածներն անլուր հայհոյեանքներ են ուղղում փոսեր կտրողի հասցէին:

Իսկ այդ բոլորը քեռի Սիմօնի կտրած փոսերն են:

ՍՏ. ԶՕԲԱՆ





\* \* \*

Էս լուռ գիշերին մտքերիս հետ փակ  
 Յիշեցի անդարձ օրերս նորից.  
 — Որքան տառապանք ապրել եմ մինակ,  
 Որքան մուժ օրեր լուռ, անկարեկից,  
 Ու որքան տանջանք ապրել եմ մինակ:

Պայծառ հաւատով ես կեանք տենչացի,  
 — Որքան դառնութիւն, կսկիծ կար ձեր մէջ  
 Օրեր իմ տխուր, գիշերներ լացի  
 Որ դրոշմւել էք թախիծով անվերջ  
 Եւ բաց ճակատիս և փակ սրտիս մէջ:

Լէյլի

\* \* \*

Գու այստեղ հետս ես, այնպէս մօտ, իմ քով,  
 Կասես հէքեաթումն եմ կամ երազում...  
 Համբուրում եմ քեզ ու հարբում թոյնով,  
 Գուրգուրանքներիդ հրում տապակում:

Սրտիս լարերը հնչում են մեղմիկ,  
 Օրհներգում տենչանք, փայփայանք ու սէր.  
 Համբուրում եմ քեզ ջերմագին, լռիկ,  
 Լռութեան մէջն են իմ իսկ տանջանքներ:

Հզօր իմ կամքով պահում եմ գաղտնի  
 Թէ որքան սիրում, հեծում է հոգիս,  
 Ի՞նչպէս ամեն ժամ վառ կարօտով լի  
 Ես միշտ քեզ հետ եմ, միշտ քոնը, հոգիս...

Բայց դու հէքեաթ ես ու սոսկ երազանք,  
 Մի վայրկեան... և դու թռւնր ու անցւոր...  
 Ու նորից արցունք, ու նորից տանջանք  
 Անդարձ հէքեաթի—ցնորքի համար:

Արուս Բ.



## ՅԱՐՈՒԹԻՒՆ ՄԵԼՔՈՒՄԵԱՆ

(Ա. Կ Ն Ա. Ր Կ)



Մեր «ժողովրդական» հեղինակները (կամ լաւ է ասենք ժողովրդի կեանքից գրող հեղինակները) հայ գիւղացուն դարձնելով իրենց երկերի նիւթ՝ մեծ մասամբ վերջինիս նկատել են իբրև մի միջոց հասնելու համար աւելի կողմնակի քան ուղղակի նպատակների: Մեծ մասամբ ենք ասում, որ տեղիք չտանք կարծելու թէ մեր հեղինակները ուղղակի նպատակներ էլ են ունեցել: Մեր ժողովրդի կեանքի զարգացման պայմանները և դրանցից բխած հայեացքները հէնց այդպէս էլ պիտի անդրադառնա-

յին մեր գրականութեան մէջ: Ժողովուրդը լուսաւորելու, հասարակութիւնը կազմակերպելու, ազգը ազատագրելու անհրաժեշտ պահանջները մեր հեղինակներին դարձրին քարոզիչներ, ռահւրաններ, հրապարակախօսներ, և նրանց գրական ուղղութիւնը դարձաւ աւել կամ պակաս չափով տենդենցիոզ: Հայ գիւղացին միջոց էր մի որևէ հասարակական գաղափարի արտայայտման: Ազգային, հասարակական, դասակարգային և այլ տենդենցները այսպէս թէ այնպէս խանգարել են, որ հայ հեղինակը հայ գիւղացուն դուրս բերէր նախ իբրև մարդ, որի հոգեկան կեանքը պատկերած լինելուց յետոյ թող հեղինակի դիտումից անկախ և ինքնաբերաբար հայ գիւղացին երևար իր ազգային, հասարակական կամ դասակարգային գոյներով: Մեր հեղինակները մեծ մասամբ քիչ են հետաքրքրուել հայ գիւղացու մարդկային կողմերով:



Հայ գիւղացին ամեն բան եղաւ մեր վէպերում և պատկերներում՝ բացի մարդ լինելուց:

Ահա այս թերին էր, որ պիտի լրացէր մեր նոր հեղինակների ձեռքով: Արդեօք նրանք են այդ նոր առաքեալները թէ դեռ երկար պիտի սպասենք այդ օրւան: Դժւար է պատասխանել: Բայց հատուկոր աղնարկները, հազադէպ փաստերը երբեմն գրաւում են մեր ուշադրութիւնը այդ կողմից՝ եթէ մենք զգայուն ուշադրութիւն ունենանք...

Հանգուցեալ Յարութիւն Մելքումեանը, զանգեղուրցի, ուսուցիչ գաւառական դպրոցի, երիտասարդ ուսանող Դորպատի համալսարանում և պատերազմի շրջանում սպայ ռուս և հայ բանակներում՝ հետաքրքիր է ահա վերոյիշեալ տեսակէտից:

Սկսնակների գործի մասին վերջնական խօսք չեն ասում սովորաբար:

Պատասխանատու եզրակացութիւններ էլ չեն անում:

Բայց գուշակութիւններ, ենթադրութիւններ կարծում ենք թոյլատրելի է, մանաւանդ որ մահը,—տարերային մի հանգամանք,—արդէն վերջ է տւել այս յուսալի սկսնակին:

Յարութիւն Մելքումեանը իբրև սկսնակ՝ ամենից առաջ թերութիւններ ունի. նոյնիսկ այնպիսի թերութիւններ, որ ոմանց աչքում նսեմացնեն նրա մի քանի արժանիքները: Եւ անշուշտ, գրական գործի անբնական վախճանը այլ ևս թոյլ չի տալու, որ Մելքումեանի մի քանի փորձերը արժէք ունենան: Ի՞նչ օգուտ, կասէք, եթէ անգամ շատ յուսալից հեղինակ էր նա, չէ՞ որ սրանից աւելի ոչինչ չպիտի տայ, և եղածն էլ թերութիւններով լի է:

Բայց մենք այդպէս չէինք նայիլ խնդրի վրայ: Մեզ համար ևս խնդիրը փակւած է, բայց Մելքումեանի մի քանի փորձերը կարող են մեր միւս սկսնակների համար գեղեցիկ օրինակ ծառայել թէ ի՞նչպէս պիտի մօտենալ հայ գիւղացուն գեղարւեստական երկի մէջ: Եւ ինչ որ չկարողացաւ դառնալ Մելքումեանը մահւան արհեստական խափանումով՝ թող մեր սկսնակները այն աչքի առաջ ունենան:

Մեր առջև են Մելքումեանի սակաւաթիւ պատմւածքները գիւղական կեանքից. «Գիւլվարդը», «Ալումը», «Ճատունց Անուշը», «Քեաֆուր Աւագը», «Հաճոյքի համար» և այլն:

Ի՞նչ է դրանց նիւթը. ըստ երևոյթին գիւղական օրւայ չարիքը—կուլակներ, խեղճութիւն, տգիտութիւն, բռնութիւն, բան-



տարկւած սէր, նախապաշարժունք... Մեր նախկին «գիւղական» վէպի ծանօթ տիպերը մէջտեղ են.— ահա 13 և 17 տարեկաններ իբրև ամուսիններ, չըբեր մի հարս, սեռապէս անկարող մի ամուսին, նոր են պսակել, դեռ ամեն ինչ խաղաղ է. ամուսինը գնում է Բագու փող բերելու, վերադառնում է գիւղ. սովորական պատմութիւն. բայց հարսը զաւակ չունի: Սա խնդիր չէ ամուսինների համար: Դրութիւնը բարդել է նրանով, որ սկեսուրը մէջ է ընկել այս խնդիրը լուծելու. ոչ ոք չգիտէ թիւրիմացութեան բուն պատճառը, հարսի չըբերութիւնը որպէս հետեանք տղայի անկարողութեան... Հարսի լեզուն փակ է, տղան լուռ է, բայց սկեսուրը, որ թոռան մէջ տեսնում է իր շարունակութիւնը, իր իղձերի կատարումը՝ հալածանք է յարուցել «լեզուն լալիկ» հարսի դէմ: Ի՞նչ պէտք է անել այս անել կացութիւնից դուրս գալու համար: Սկեսուրը առաջարկում է մի աւելի անել միջոց— հարսը պիտի իր բարձր փոխէ մի ուրիշ երիտասարդի հետ... Նա շարած է իր կատաղի սկեսուրի այս առաջարկից: Բայց սկեսուրը ոտնատակ է տւել ընտանեկան սրբութեան գաղափարը. այստեղ նրա եսն է, որ սանձարձակ բողոքում է թիւրիմացութեան դէմ. նա ուզում է իր սերունդի մէջ շարունակել. նա տարերային մի մղումն ունի, նա ստիպում է, կուռւմ, բռնադատում... Եւ ելքը գտնւում է— հարսը ինքնասպանութիւն է գործում: («Գիւլվարդ»):

Ահա մի քեաֆուր Աւագ, որ Հնձան գիւղն է եկել հաստատուել: Ո՞վ է նա, ռրտեղից, ի՞նչ անցեալ ունի. ոչ ոք չգիտէ: Եկել ոսկերչութիւն էր անում, յետոյ վարժապետութիւն արաւ: Մշտական տեղը Հնձան գիւղն է, բայց թափառում է նաև հարեւան գիւղերում: Երբեմն ծեծւած տուն է դառնում: Չորս կին էր առել, հինգերորդն էլ կառնէր եթէ չարգելէին: Ծեծում էր իր կանանց: Զաւակները փչանում էին: Մնաց անկին, անզաւակ: Մեռաւ միայնակ: Նա ժամագրքի լուսանցքներում մի յիշատակարան էր թողել, ուր ինքը խոստովանում է իր անլուր, անթիւ, ստոր ոճիրները և մեղայ է գալիս: «Շատ ու շատ կեանքերի քաղցըր հիւթը ծծեցի. ծծեցի, արբեցի, խնդացի ուրիշների տանջանքով, իսկ այժմ անզօր և ոսկրացած եմ ես: Մեղայ... Զարգարի տասը տարեկան աղջիկը գեղեցիկ էր, նորաբողբոջ վարդի կոկոն. սիրեցի նրան, փչացրի նրան, կորցրի նրան. իմ յանցանքը միայն ես գիտեմ, Տէր...», և այլն:



Ահա Տանձոտ գիւղի քահանան, որ մի կերպ ամուսնացել և քահանայ էր ձեռնադրւել: Անդորր, կուշտ ապրում էր. բայց ահա կեանքի թիւրիմացութիւնը. կինը մեռնում է, թողնելով հինգ զաւակներ: «Ասենք երեխաների բանը հեշտ էր. հայրը կարող էր նրանց բարեկամներին տալ խնամելու. ինքն է, որ չէ կարող առանց կնոջ ապրել: Նա դեռ երիտասարդ է, երեսունհինգ տարեկան առողջ տղամարդ»:

Ո՞ւր է ելքը... Քահանան գտնում է այդ ելքը. «ո՛վ իցէ, որ ոչ մեղ իցէ», որբեայրի Շամամին բերում է մօտը իր զաւակներին խնամելու և իր խնդիրը լուծելու: Չորս տարի ապրեցին. բայց Շամամը յոգնեց «թաւամազ տէրտէրի հաճոյքներից», իր «եթիմ»ն էլ մեծացել է: Հեռանում է տէրտէրից: Դարձեալ անել կացութիւն: «Փարաջան շարտել և ամուսնանալ չէր կամենում, որովհետև քանի տէրտէր է՝ ուրիշի ցանածը ինքն է հնձում»: Հիմա էլ ուրիշ ելք է գտնում. իր աղջիկը տալիս է որբեայրի Խանումին և խնամիական երևոյթով փակում է իր ներքին հաշիւը նրա հետ: Բայց Խանումն էլ մեռաւ: Եւ ահա տէրտէրը պսակում է իր 15 տարեկան որդուն և նրան քաղաք ուղարկելով ինքըն է ապրում նրա կնոջ հետ: Բայց, ահա և փորձանքը: Հարսը յղիացաւ: Խայտառակութիւնը ծածկելու համար տէրտէրը անյայտացրեց նորածնին, և իր հարսին ամբաստանեց անբարոյութեան մէջ և դուրս արաւ տանից: («Հաճոյքի համար»):

Ուրիշ պատկեր: Մի աղքատ Ալում է ապրում իր համար. աղքատ է, բայց պարտք չի սիրում. «պարտքը ի՞ժի աղու է»: Մի դժբախտութիւն էլ ունի—«ո՛վ կիմանար թէ հինգ խիզանի տէր կըլինէր»: Անել դրութիւն է. կարիքը սեղմում է. բայց Ալումը որոշել է անխօս տանել իր լուծը: Բայց գիւղի հարուստ Աբգար բէկը չի ուտեցնում իր ինքնասիրութեան, որ Ալումը իրենից պարտք չի վերցնում: Ուրեմն արհամարհում է: Ուզում է կոտրել նրան: Ի հարկէ ամեն չարիքի համար պատրաստ մարդիկ կը գտնւեն: Գիւղում պարապ գայլեր շատ կան: Պնակալէզներն էլ իրենց գոյութեանը իմաստ տալ գիտեն: Աբգար բէկը դաւ է նիւթում Ալումի դէմ: Խմբովին մի սուտ մուրհակ են սարքում և Ալումին վճարել տալիս: Ելք.—Ալումը սպանում է Աբգարին և ինքըն գնում «բանտ»:

Ահա վերջապէս և ճատունց Անուշը. առողջ, կրքոտ և գեղեցիկ, որի ամուսինը Մաթոսը պանդխտութեան է գնացել: Տանջ-



ւում է սիրակարօտ գեղեցկուհին: Երազներին արթնացած՝ իզուր գրկախառնւում է իր ծոցը պառկող իննը տարեկան կարօին: Ելքը գտնում է. Անուշը իրան տալիս է Ալէքին: Բայց փորձանքը դարձեալ փակեց ճամբան: Ահա Անուշը յղիացած է: Գաղտնիքը յայտնում է տատմէրին: «Հնարագէտ» տատմէրը վիժել է տալիս Անուշին: Հիւժւում է Անուշը, հիւանդանում և մեռնում:

Ահա մի քանի պատմւածքների շոր կմախքը: Ինչպէս տեսնում էք ըստ հրեոյթին արդէն վաղուց մշակւած տիպեր են սրանք: Դէպքերը նոյնպէս:

Բայց սկսնակի ձեռքով անփոյթ մշակած այս պատմւածքների միջին երբեմն բաներ են փայլում, որ արդէն սովորական չեն: Նախ և առաջ նկատելու է այն վերլուծման մեթոդը, որ կիրառում է հեղինակը հայ գիւղական կեանքը պատկերելիս: Ի՞նչ է տեսնում Մելքումեանը հայ գիւղական կեանքում, ի՞նչ է որոնում նա այնտեղ: Արդէն հասարակ բովանդակութիւնը, որ վերև բերինք, ցոյց է տալիս, որ հեղինակը հայ գիւղական կեանքի մէջ տեսնում է շատ խորը հարցեր, մարդկային ապրումներ, հոգեֆիզիկ դրամաներ և որոնում է նրանց լուծումը:

Կարծում էք հեշտ է լուծել այն խնդիրները, որ արծարծում է մարդը Մելքումեանի երկերում: Ոչ նահապետական կեանքի ոչնչացումը, ոչ ամուսնական հարցի լուծումը, ոչ տնտեսական յարաբերութիւնների հարթումը չպէտք է կարողանան հարթել այն խնդիրները, որ դնում են մեր առջև Մելքումեանի հերոսները: Այդ խնդիրները կապւած են մարդու հետ և ոչ թէ նրա դիրքի, կոչման, հասակի և այլ արտաքին հանգամանքների հետ: Մելքումեանի յարուցած հարցերը,—սէր, նախանձ, կիրք, եսականութիւն,—բոլորը մարդկային են և ոչ հայ-գիւղացիական:

Յար. Մելքումեանի մեծ շնորհքը հրեում է նաև նրանում, որ նա գաղափարախօս և փիլիսոփայ չէ: Նրա պատմւածքները կարդալիս ձեր աչքի առջև են գալիս ոչ թէ մտքեր, դատողութիւններ, ալ մարդիկ, որոնք ապրում, զգում են. պատկերներ, որ անցնում-դառնում են կենդանի գոյներով: Մելքումեանի տիպերը տարերային ուժով են ապրում: Նրանք բուռն են, կրքոտ, անսեզոն: Հեղինակը նրանց դուրս բերելով երբեմն կենցաղական, երբեմն տնտեսական, երբեմն բնական միջախայրում՝ բաց է թողնում նրանց, որ արտայայտեն իրենք, ինչպէս որ կան,—ազատ, անվերապահ, անխնայ:



Մեղքումեանը օրիգինալ է, անհարթ և սայթաքող: Գրում է թափթփած ձևերով: Չափի զգացումը պակասում է նրան: Անհոգ է հանգոյցների մէջ, չափազանցումներ շատ ունի: Բայց և դրանց կողքին նա ունի դիւրին երեակայութիւն, զգացմունք, առողջ շունչ, սիրոյ մի, արեւելեան ասենք, ոռմանտիզմ, որ գրւածքին տալիս է հարազատ շունչ և կոլորիտ: Լաւ գիտէ ժողովրդական բարբառը, բնորոշ դարձւածները: Գիտէ տիպեր գծել հէնց միայն ոճական մի շարժումով:

Ամեն տեսակ թերութիւն կարելի է գտնել մեր յիշած առաւելութիւնների հէնց կողքին. բայց մի առաւելութիւն բարձր է Յար. Մեղքումեանի գրւածքներում: Նա գերծ է ամեն տենդինցից: Նա լաւ հասկացել է իր գործը.—հայ միջավայրում որոնել և դուրս բերել մարդկայինը:

Սխալւած չէինք լինիլ գուշակելով, որ եթէ Յ. Մեղքումեանը ողջ մնար և շարունակէր գրական գործը՝ մեզ պիտի ընծայէր յատուկ այն հեղինակը, որին սպասում ենք.—մի հեղինակ, որ հայ գիւղացու մէջ որոնում և գտնում է մարդը և միայն մարդը:

Մի հեղինակ, գէպի որը ձգտում են նաև Յար. Մեղքումեանի ժամանակակիցները՝ գրգռելով մեր յոյսերը—Ռէն, Ստ. Զօրեան, Մանուէլեան, Վալադեան, Մարգար և ուրիշները:

Գ. ԳԵՄԻՐՃԵԱՆ



## «ՊԱՏԱՆԻ»-Ի ԿՈՐՈՒՍՏՆԵՐԸ

Պատերազմի, յեղափոխութեան և հակա-յեղափոխութեան այս արհաւիրակից տարիներում թւում է, թէ մեռնելն այնքան դարձանալի չէ, որքան կենդանի մնալը: Երիտասարդ, սկսնակ գեղարւեստական գրողների այն սոււար խումբը, որ սերտ հաւաքւել էր «Պատանի»-ի շուրջը՝ դեռ վերոյիշեալ հասարակական անակընկալներէից առաջ, այսօր այնքան թափուր ու ծանծաղ է երևում նրա շարքը, որ մարդ ակամայից մահւան սարսուռի առաջ է ըզգում իրեն: Մեր օրերի, տարիների ամեն մի շարժում, անգամ հիւանդութիւններ, կարծես յատկապէս բռնել են մեր ծաղիկ հասակների օձիքից ու պոկ չեն գալիս նրանցից: Դեռ պատերազմի երկրորդ տարին «մեր» Ներսէս Մանուչարեանին, այդ իր դասի՝ բանւորի երգչին, կախեցին նրա համար, որ դէմ էր պատերազմին ու ազիտացիա էր մղում իր զինւորակիցների մէջ: Արտ. Թումանեան—սպանւեց 1917 թւի Վանի վերջի նահանջի ժամանակ իբրև անձնուրաց հայրենասէր հերոս: Ռուբէն Մամաջանեան, մեր յուսատու երաժիշտներից, սպանւեց Վլադիկավկազում 1918 թւի քաղաքացիական կռիւ ժամանակ, որպէս կար միւր բանակի յաղթանակին նախանձախնդիր սպայ: Յար. Մելքումեանը, այդ մեր յուսատու գիւղական կեանքի բելետրիստի անժամանակ վերահաս մահը, որի մասին «Ալմանախ»-ի այս գրքում տպւած է առանձին յօդւած, Արմենակ Բորեան—«Պատանի»-ի մօտիկ աշխատակից բանաստեղծ, նահատակւած Բագււի 26 նշանաւոր կոմմունիստների հետ միասին: Կապուտիկեան Բարունակ—այդ մեր շնորհալի բանասէրը, մահացած տիֆից, և վերջապէս Աւագ Կոծինեանի եղեոնական վախճանը: Եւ ս'ի գիտէ, քանի-քանիսնների մասին մենք դեռ ոչինչ չգիտենք...

«Պատանի»-ի ընտանիքի համար ծանր էր առանձնապէս Աւագ Կոծինեանի մահը նրանով, որ նա ամենանւիրական աջակիցներից էր մեր գործին՝ գաւառից: Նա իր գրական ու գործա-



կալական եռանդով ցոյց տւեց, որ առանց Կոժինեանի «Պատանի»-ն զուրկ կը մնար մի բեղմնաւոր գործչից. դրա համար էլ խմբագրութիւնն ամեն մի նոր քայլ անելիս, միշտ հաշւի էր առնում իր յօտիկ աշխատակցի կարծիքն ու պատրաստակամութիւնը: Լինելով գաւառական հասուն ու ինտելիգենտ ուսուցիչ, նա աշխատում էր իր աշակերտներից գաւառական գրողների կադրաստեղծել, որի համար նա գրական-գեղարւեստական զրոյցներ էր կազմակերպում ու տոն տալիս իր նպատակին: Չորս տարի գաւառում մնալուց յետոյ նա իրեն նետում է Բագու, մտնում «Արեւի» խմբագրատունը, — որպէս աշխատակից: Բանւորական քաղաքը ի վերջոյ խօսում է նրա մէջ նորանոր հովերից և ահա Փետրւարեան Յեղափոխութեան օրերից Կոժինեանը կանգնում է ժամանակի հրամայական պահանջների հանդէպ և դառնում է կոմմունիստների գաղափարապաշտ ու պատասխանատու գործիչ: 1918 թւի մեծ նահանջին նա իր բազմաթիւ ընկերների հետ ստիպւած է լինում անցնել Անդրկասպեան երկիրը և նոյն անսպառ թափով գործել ու կիրառել իր գաղափարները՝ որպէս պարագլուխ: Այնուհետև նա գնում է Մոսկւա և կուսակցական հրահանգներով ուղևորւում է դէպի Անդրկովկաս, բայց ճանապարհին, Նովորոսսիյսկում, անցած տարւայ սեպտեմբերին ձերբակալւում է նաևի մէջ մի հայ սպայի կողմից և դենիկինեան վճիռը դատապարտում է նրան մահւան պատժի կախաղանի միջոցով — որպէս Բագուի գործօն կոմմունարներից մէկը:

Մեր ընկերների եղեռնական մահերի դիմաց կանգնելով մի խօսք միայն ունենք ասելու.

— Հպարտ ենք մենք մեր զոհերի համար:

Յարգանք ձեր անյայտ շիրիմներին, մեր անմոռաց ընկերներ:

Ն. ՏԻՐՈՍԵՆՅ





# ՀԱՅ ԳՐԱԿԱՆՈՒԹԵԱՆ ՎԻՃԱԿԸ

(Հայ գրողների կարծիքով)

## Ա Ն Կ Ե Տ Ա

Դեռ 1917 թ. վերջերին, երբ մեր գրական աշխարհում համեմատական կենդանութիւն կար և ուսական յեղափոխութիւնը մեր առջև բացել էր պայծառ հեռանկարներ՝ ապագան դարձնելով դիւթական մի երկիր, — այդ ժամանակ մեր մէջ միտք յղացաւ մի հարցարանով (անկետով) դիմել մեր գրողներին ու քննադատներին և նրանց կարծիքն իմանալ հայ գրականութեան ներկայի ու ապագայի մասին: Եւ այդ նպատակով կազմեցինք մի հարցարան: Սակայն քաղաքական ձախորդ իրադարձութիւնները և մեր ժողովրդի գլխին պայթած ահաւոր աղէտները, որ հիմն ի վեր կործանեցին ամեն տեսակ ծրագիր ու յղացում, անիրագործելի դարձրին և մեր ցանկութիւնը: Բայց ներկայ թւին, երբ փոթորիկն անցաւ կարծես և մեր երկինքը փոքր ինչ պարզւեց, մեր վաղեմի միտքը նորից այցելեց մեզ: Եւ այս անգամ արդէն այդ պատրաստի հարցարանով դիմեցինք մեր գրողներից նրանց, ովքեր այն ժամանակ գտնւում էին Թիֆլիսում, մնացած հեղինակներին, որ գտնւում էին Թիֆլիսից դուրս, անկարող եղանք դիմել՝ խզած հաղորդակցութեան պատճառով:

Բերում ենք ահա հարցարանը և նրա պատասխանները:

ՍՏ. Զօրեան

1) Ինչ է Ձեր կարծիքը գեղեցիկ հայ գրականութեան ներկայի մասին. ա) վիպասանութիւն, բ) դրամա, գ) քնարերգութիւն:

2) Ինչպէս էք նայում գեղեցիկ հայ գրականութեան ապագային:

ա) Արդեօք, ներկան երաշխաւորում է նրա ապագայ առաջադիմութիւնը:

բ) Որո՞նք են, Ձեր կարծիքով, նրա գրականները:



3) Ի՞նչ կարծիք ունիք ռուսահայ ու թիւրքահայ գեղարուեստական բարբառների մասին:

ա) Ասպագան այդ բարբառներից որի՞ն է պատկանում:

բ) Ցանկալի՞ է, արդեօք, նրանց ձուլումը. թէ մէկի կամ թէ միւսի չքացումը:

4) Ի՞նչ կարծիք ունիք ժողովրդական բարբառների մասին:

### Յարգելի պարոն!

Ահա ինչ կարող եմ ասել իբրև պատասխան Ձեր անկէտին.

Գեղեցիկ հայ գրականութեան ներկան ես այնքան էլ յուսատու և մխիթարական չեմ տեսնում, նոյն իսկ աչքի առջև ունենալով պատերազմը և հայ ազգի վերջին տարիների տառապանքները: Սօսքս մանաւանդ վիպասանութեանն է վերաբերում: Ո՛ւր է նա, այդ հայ վիպասանութիւնը: Ինձ թւում է, որ առհասարակ մենք վաղաժամ ենք գործածում այդ բառը հայ գրականութեան մասին խօսելիս: Անցեալի մի քանի քիչ թէ շատ գեղարուեստական երկեր դեռ իրաւունք չեն տալիս մեզ ասելու, թէ կայ հայ վիպասանութիւն բառիս ընդարձակ իմաստով: Ասացի անցեալի, որովհետև ներկան այն էլ չի տալիս, ինչ որ տուել է անցեալը: Պոօշեանցը 24 տարեկան էր երբ գրեց իր «Սոս և Վարդիթերը», Ռաֆֆին աւելի երիտասարդ հասակում տուեց իր «Հարեմը»: Կարելի է վիճել այդ երկերի գեղարուեստական կշռի մասին, բայց չի կարելի չը հիանալ նրանց հեղինակների համարձակութեամբ և ընդարձակ ծրագրով: Ներկայ հայ վիպագրութիւնը վերին աստիճանի վեհերոտ է: Նա վախեցնում է իր ստուերից: Կարծես, նա յոյս չ'ունի իր ոյժերի վրայ: Նա չի ձգնում դուրս գալ փոքրիկ պատմուածքների և պատկերների նեղ շրջանից: Նա լողում է գետի ափերում դողդողալով և չունի քաջութիւն նետվելու խորը հոսանքի մէջ: Հարկաւ, գեղարուեստական երկի ստեղծագործական արժէքը նրա թերթերի քանակութիւնից չի կախված և մի փոքրիկ պատմուածք կարող է ունենալ աւելի մեծ գեղարուեստական կշիռ, քան մի մեծատոր վէպ, բայց այժմեան փոքրիկ երկերն էլ որպէս այդպիսին ինձ չեն գոհացնում: Եւ մի բան, որ աւելի է վշտացնում ինձ, դա տեմպերամենտի պակասութիւնն է մեր ներկայ վիպագրու-



Թեան մէջ, այն ինչ հեղինակի տեմպերամենտն է, որ կրկին ներշնչում է կեանք և կենսունակութիւն և դարձնում նրան ընթերցողի համար հետաքրքրական:

Վերագրել այս տխուր երևոյթի պատճառն ամբողջովին պատերազմին, կամ հայ ազգի վերջին տարիների տառապանքներին, կը նշանակէ պարապել ինքնախաբէութեամբ: Եթէ չեմ սխալվում, մօտ 15 տարի է, որ հայ վէպ լոյս չի տեսնում: Ո՛ւր էր նա պատերազմից առաջ 10 տարուայ ընթացքում:

Գուցէ մի փոքր աւելի մխիթարական է հայ դրամայի վիճակը: Մի քանի քիչ թէ շատ շնորքով գրված պիեսներ, իրանց մակերևոյթականութեամբ հանդերձ, ինձ յոյս են ներշնչում, որ մի օր, վերջապէս, մենք ունենալու ենք դրամա, արուեստների այդ թագուհուն: Սակայն այդ կը լինի միայն այն դէպքում, երբ հայ դրաման չի հեռանալ կեանքի սահմաններից, ուզում եմ ասել երբ խորը կուսումնասիրէ մարդու հոգին և արտաքին, էֆէկտներով չի տարվի:

Քնարերգութեան մասին վարանում եմ մի որոշ բան ասել, որովհետև ես շատ քիչ եմ ծանօթ մեր երիտասարդ ու պատանի երգիչների գործերին: Սակայն, ինչ որ կարդացել եմ, թոյլ է տալիս ինձ յուսալու, որ մեր ծերացած և ծերացող քնարերգակները կունենան արժանաւոր ժառանգներ:

Այս է իմ պատասխանը Ձեր առաջին երկու հարցերին:

Գալով ձեր երրորդ հարցին, այն է, թէ ինչ կարծիք ունեւ ոուսահայ և թիւրքահայ գեղարուեստական բարբառների մասին, չի կարելի ասել, թէ ասպագան որին է պատկանում: Ապագան պատկանելու է երկուսին էլ, բայց երկուսին միացած: Ոչ մէկը նրանցից չի յաղթել և ոչ մէկը չի պարտվել: Նրանք կը միանան ու կը ձուլվեն, և մենք կունենանք մի հարուստ և սքանչելի գեղարուեստական լեզու: Ռուսահայ բարբառը ձուլարանի մէջ կը ձգէ իր ժողովրդական անողջութիւնը և իր դրամատիզմը, թիւրքահայ բարբառը՝ գրաբարից վերցրած ընտիր բառերը և ֆրանսերէնից իւրացրած նրբութիւնները:

Ինչ վերաբերում է ժողովրդական բարբառներին, նրանք վաղ թէ ուշ չքանալու են, իրանց տեղը տալով օր օրի վրայ աւելի ու աւելի տարածվող և աւելի ու աւելի մշակվող գրական մաքուր լեզուին: Եւ այդ մասին չը պիտի ցաւել, այլ ընդհակա-



ուակը: Այդպէս է եղել բոլոր ազգերի տեղական բարբառների վերաբերմամբ, նոյնն է լինելու և մեր բարբառների վերաբերմամբ:

## Շիրվանգադէ

1919 թ. 6 ապրիլի, Թիֆլիս

Ես մեր բանաստեղծների, վիպասանների ու դրամատուրգների գործերը տարիներ առաջ եմ կարդացել:

Սխալ կանէի, եթէ մեր գեղեցիկ գրականութեան վրայ կարծիք յայտնէի հին տպաւորութեան տակ:

Էն ժամանակից դէսը շատ են փոխւած իմ գրական ճաշակն ու հասկացողութիւնը և իմ աշխարհահայեացքը: Ինչ որ էն ժամանակ թւում էր գեղեցիկ ու հերոսական, այժմ տգեղ է ու բարբարոսական: Ես վերջին տարիներս, երբ դէպք է լինում՝ վերադառնում եմ իմ հին կարդացածներից մէկին՝ կամ միւսին՝ հիասթափւում եմ յաճախ: Ընդհանուր տպաւորութիւնս ու կարծիքս էն է, որ մեր գեղեցիկ գրականութիւնը առողջ ու ամբողջական գործեր շատ չունի:

Մինչև այժմ մեր գրականութիւնը հարազատ հող չի ունեցել իր ոտի տակ, մեծ մասով գաղութային գրականութիւն է եղել: Բանաստեղծի ոտը հարազատ ու իրական հողի վրայ պիտի լինի, նրանից յետոյ միայն կարող է բարձրանալ, թէկուզ գլուխը մինչև երկինք հասնի:

Հայոց ապագայ գեղեցիկ գրականութեան զարգացման գրաւականը ազատ Հայաստանն է, ազատ հարազատ հողը, ժողովուրդը:

Էդ ազատ Հայաստանն էլ կըտայ մեր գրական ուժեղ ու կենդանի լեզուն, որ լինելու է ժողովրդական բարբառների, գրաբանի ու եղած գրական լեզւի համադրութիւնը: Հայ ժողովրդական կենդանի բարբառների ազդեցութիւնն է լինելու տիրական:

Չընչին է հայ ժողովրդական բարբառների միջի եղած տարբերութիւնը, կայանում է զխաւորապէս կը-ի և ում-ի մէջ: Էդտեղ էլ գերակշռելու է կովկասահայ բարբառը: Էս չընչին տարբերութիւնները մի կողմ թողած: Հայ ժողովրդական բարբառները մի լեզու են և յայտաբերում են մի ամբողջական հայութիւն:

Յովհ. Թումանեան



## ԻՄ ՊԱՏԱՍԽԱՆԸ ԱՆԿԷՏԻՆ

Գեղեցիկ հայ գրականութեան ներկայիս: Ո՞րն է այդ, ո՞ւր է այդ: Ես այդպիսի բան չեմ տեսնում, որովհետև չկայ և չէր էլ կարող լինել այն պարզ պատճառով, որ նախ աշխարհաւեր պատերազմը, յետոյ յեղափոխութիւնը և դրանց ընթացքում մեր ազգի կրած գերմարդկային տառապանքներն իր սաղմի մէջ խեղդեցին այն, ինչ որ կարող էր լինել մեր գեղեցիկ գրականութեան ներկան: Եւ այս անշուշտ միայն մեզնում չէ, այս երևոյթը պէտք է որ, անտարակոյս, ընդհանուր լինի այս հինգ տարւայ ընթացքում բոլոր ազգերի համար, որոնք այսպէս թէ այնպէս, ուղղակի թէ անուղղակի ընկել են պատերազմի հարւածների տակ:

Ուրեմն խօսք կարող է լինել միայն անցեալի մասին, այսինքն մեր այն գրականութեան մասին, որ ունէինք նախ քան պատերազմն ու յեղափոխութիւնը:

Ճիշտ է, մեր գեղեցիկ գրականութեան այդ անցեալը միևնոյն ժամանակ և նրա ներկայն է, որովհետև չէ՞ որ մեր նոր սերունդը նոր բան չունի կարգալու, եթէ ոչ միշտ միևնոյն հեղինակները սկսած Րաֆֆիից մինչև ամենավերջին յուսատու սկսնակ գրողը, բայց և այնպէս նա անցեալ է և անցեալ էլ կըմնայ, դառնալով պատմութեան սեփականութիւն և առանց իր հետևողական զարգացումն ունենալու ասպագայի համար:

Սրանով ես ուզում եմ պատասխանած լինել Ձեր երկրորդ հարցակէտին—«Արդեօք ներկան երաշխաւորում է նրա ասպագայ առաջադիմութիւնը»:

Պատասխանս, ինչպէս տեսնում էք, բացասական է, և անթէ ինչու:

Համաշխարհային պատերազմը և նրա հետևանքով բռնկած յեղափոխութիւնը, որ նոյնպէս սպառնում է համաշխարհային բնոյթ առնել, այնպիսի խոր անջրպետ են քաշել անցեալ և ասպագայի միջև, հնի և նորի միջև, որ որևէ կամուրջ ձգել, որևէ յաջորդականութիւն սահմանել միանգամայն անհնարին պիտի լինի: Մեր աչքերի առջև հսկայական յեղաշրջում է կատարւում մարդկային կեանքի բոլոր ասպարէզներում և առանձնապէս ցարդ եղած ընդհանուր մտահայեացքի մէջ: Վերագնահատում են հին արժէքները, տապալւում են յաւիտենական ճանաչւած ճշմարտութիւնները, խորտակւում են հին կուռքերը, մի խօսքով՝ հին աշխարհը ճարճատում է հիմն ի վեր և պիտի փլի անխուսա-



Վիւլիօրէն, տեղի տալով նոր հիմունքներով ստեղծւած մի նոր, գիւռ ևս անձանօթ աշխարհի:

Այժմ կատարւում է միայն քանդման պրոցեսը, և այս պրոցեսը շուտ չի վերջանալ, որովհետև քանդելու են այնպիսի շատ քաներ, որոնք դարերի արմատներ ունեն:

Քանդման այս տարրերային պրոցեսը հարկաւ չի կարող անցնել առհասարակ գեղարւեստի և գեղեցիկ գրականութեան կողքով, առանց նրանց ձեռք տալու. գեղեցիկ գրականութիւնն ևս իր բոլոր ճիւղերով (վէպ, դրամա, քնարերգութիւն) պիտի ընկնի ընդհանուր պերտուրքացիայի շրջապատոյտի մէջ և պիտի վերակազմւի սոցիալ-տնտեսապէս, քաղաքականապէս և մտաւորապէս վերաստեղծւած նոր աշխարհի գեղարւեստական պահանջներին համապատասխան:

Հայոց գրականութիւնն ևս, որ իբրև մի փոքրիկ ազգի գրականութիւն՝ միշտ գնացել է քաղաքակիրթ մեծ ազգերի գրականութեան ետևից, ազգւելով և ներշնչւելով նրանից, պիտի ենթարկւի նոյն փոփոխութիւններին, ինչպէս և մեր ամբողջ ազգային կեանքը:

Այսպէս, ուրիմն, ներկայի վրայ հիմնւած որևէ գուշակութիւն անել ապագայի համար՝ աւելորդ ժամավաճառութիւն կըլինի:

Այսքանը միայն կարելի է ասել, որ մեր գեղեցիկ գրականութիւնը ապագայում ինչպիսի փոփոխութիւններ էլ որ կրելու լինի մտքերի յեղաշրջման և քաղաքական-սոցիալական նոր կեանքի ազդեցութեան տակ, իբրև արդէն քաղաքականապէս անկախ մի ազգի գրականութիւն՝ աւելի կորով ու թափ պիտի ստանայ, ստեղծագործական աւելի ազատ թռիչք, զերծ անցեալի բազմազան կաշկանդումներից: Իրա առհաւատչեան մեր ցեղի անվիճելի ինտելեկտուալ ունակութիւնն է, որը ազատ կեանքի մէջ, իր զարգացման անկաշկանդ պայմանների մէջ աւելի բեղուն ու զեղուն պիտի դառնայ, և այն ժամանակ մեզ թերևս աջողւի դուրս գալ օտարների ազդեցութիւններից և մեր սեփական ուղին հարթել դէպի ընդհանուր գրականութիւնը:

Մնում է լեզւի հարցը:

Հայկական խնդրի լուծումով և Միացեալ Հայաստանի վերաստեղծումով ինքն ըստ ինքեան լուծւելու է արևմտահայ և արևելահայ բարբառների միաձուլման հարցը: Ինչպէս որ իրարից պատնէշով բաժանւած երկու ջրամբարների ջուրը պատնէշի



քանդումով պիտի խառնեն իրար, այնպէս և նախկին Ռուսա-  
 Հայաստանը նախկին Տաճկա-Հայաստանից բաժանող պետական  
 սահմանի վերացումով մեր ազգի երկու հատւածները պիտի միա-  
 խառնեն իրար ոչ միայն իրենց բարբառներով, այլ և իրենց  
 առանձնայատուկ բարքերով, սովորոյթներով և այլն: Դա բնա-  
 կան է և անխուսափելի: Եթէ ուշի-ուշով հետեւելու լինենք մեր և  
 տաճկահայոց մամուլին ու գրականութեանը, առաւելապէս մա-  
 մուլին, մանաւանդ վերջին ժամանակներս, երբ տաճկահայ գրե-  
 թէ ամբողջ մտաւորականութիւնը հարկադրւած էր տեղահանուել  
 Կովկաս և ապրել մեր մէջ, մենք անշուշտ կընկատենք արդէն  
 այդ միաձուլման պարզ նշանները: Երկու հատւածներս իրարից  
 վերցրել ենք, գիտակցաբար և թերևս աւելի շատ անգիտակցօրէն  
 ու բնականաբար, արտայայտութեան շատ ձևեր, ոճեր, բառեր  
 ու պարբերութիւններ: Այդ փոխառութիւնը կատարել ենք առա-  
 ւելապէս մենք կովկասահայերս, որովհետև մեր ճապաղ, անձկուն,  
 բառերով ոչ-հարուստ և աներաժշտական լեզուն մեծ կարիք ունի  
 այդ թերութիւններն ուղղելու. և դրա համար աւելի լաւ աղբիւր  
 չի կարող ունենալ, քան տաճկահայոց գրական հարուստ ու գե-  
 ղեցիկ լեզուն: Երբ անկախ ու ամբողջական Հայաստանն արդէն  
 իրականութիւն կըլինի և մենք կունենանք մեր սեփական պե-  
 տական մեքենան՝ ի միջի այլոց մի ընդհանուր կրթական վար-  
 շութեամբ ու ակադեմիայով, մեր ազգի այժմեան երկու հատ-  
 ւածների բարբառների միաձուլումը կըկատարուի աւելի արագօ-  
 րէն և բնական ճանապարհով, և մենք կունենանք մի ընդհանուր  
 գրական լեզու՝ հաւասարապէս հասկանալի և ընդունելի ամենքի  
 համար:

Ինչ վերաբերում է Ձեր վերջին հարցակէտին — ժողովրդա-  
 կան բարբառների մասին, այդ բարբառներն ապագայում ընդհա-  
 նուր կրթութեան տարածումով աւելի արագօրէն, քան այժմ,  
 պիտի կորցնեն իրենց բուն ժողովրդական ոգին գրկելով մեզ  
 այն անգնահատելի ծառայութիւնից, որ մատուցանում են նրանք  
 մեր գրականութեանը իբրև ազգային լեզուի հարադատ ոճերի,  
 դարձւածքների և առանձին բառերի շտեմարան: Միակ ցաւալի,  
 սակայն անխուսափելի կորուստը, որ պիտի կրի մեր գրականու-  
 թիւնը և մասնաւորապէս գեղեցիկ գրականութիւնը:

Նար-Դոս



## Յարգելի պարոն,

Ձեր տւած հարցերին պատասխանում եմ.—

Հայ գեղեցիկ գրականութիւնը, ինչպէս և հայ կեանքը, ապրեցին իրենց վտանգաւոր ու ծանր ճգնաժամը: Հաւանականօրէն հեռու չեն նրանց լուսաշող օրերը:

Ներկայի մասին ոչինչ չը կայ ասելու: Մի երկու թեթև ցուքերը երաշխիք լինել չեն կարող: Հին արժէքների յետին շիթերն են դրանք, որոնք անշուշտ պատմական նշանակութիւն կարող են ունենալ: Միմիայն այդքան: Ներկան ոչինչ չունի ասելու՝ ապագայի յառաջադիմութեան մասին: Սպասել պէտք է այն վիպասանութեան, դրամային և քնարերգութեան, որ առաջներս է: Մեր քաղաքական նոր կեանքից և մտաւոր ապագայ միջավայրից է կախւած ամեն ինչ: Իսկ այդ կեանքն ու միջավայրը կարող են տրամագծօրէն տարբերւել մինչև այժմ եղածներից և կատարեալ անակրնկալներ առաջացնել: Համաշխարհային պատերազմը շատ աւելի խոշոր յեղաշրջումներ է պատճառելու, քան պատճառեց Ֆրանսիական Մեծ Յեղափոխութիւնը:

Ապագան, ուրեմն, յղի է մեծ սպասումներով: Իժևար է գուշակութիւն անել: Մեր մինչև այժմ ունեցած պատկերացումներից բոլորովին պիտի տարբերւին հայ կեանքն ու ըմբռնումները:

Գալով գրական երկու բարբառներին—նրանց միացման քայլեր 10—15 տարիից ի վեր լինում են արդէն երկու կողմից ես: Ապագայում կարող է գոյութիւն ստանալ հարուստ մի բարբառ դրական, որ ինքնաբերաբար և բնական կերպով կազմւելու է երկու բարբառներից: Քերականութիւնն ու տառադարձութիւնը, հաւանօրէն, ոուսահայ բարբառն է տալու, իսկ լեզուի հարըստութիւնը, նւագայնութիւնը և ճկունութիւնը կը մատակարարի թիւրքահայ լեզուն: Այժմէն իսկ նկատելի է այդ: Ռուսահայը ճգնում է ճոխացնելու իր գրական լեզուն և կոկելու թիւրքահայ բարբառի տւեալներով:

Ժողովրդական բարբառները մեռնում են և կը մեռնեն հետըզհետէ: Նրանք գրական լեզուին կը թողնեն իրենց լաւագոյն տարրերը և իրենք կը ոչնչանան բնական մահով: Անխուսափելի այդ: Ձանքերը՝ նրանցից որևէ մէկով գրականութիւն ստեղծելու—ապարդիւն կը լինին:

Ձի՞ թւում Ձեզ, որ 1914-ից ի վեր ոչ թէ հինգ տարի է անցել, այլ կարծես յիսուն տարի: Այդպիսի մտաւոր ոստումներ



ըը իրենց անակնկալներն են ունենում՝ մանաւանդ գեղարւեստական ըմբռնումների համար:

Սպասենք ուրեմն: Հեռու չէ վերագնահատումների, նոր արժէքների և նոր հասկացողութիւնների ժամանակը:

Վ. Փափագեան

1919, Ապրիլ 8/26. Թիֆլիզ.

### Յարգելի պարոն Զօրեան.

Ձեր անկետային հարցերին պատասխանելը առնւազը դժւար է ինձ համար: Բայց կաշխատեմ որոշ չափով գոհացնել Ձեզ:

Իուք հարցնում էք՝ ի՞նչ է իմ կարծիքը գեղեցիկ հայ գրականութեան ներկայի մասին. վիպասանութիւն, դրամա, քնարերգութիւն:

Մեր աւագ արձակագիրները թողել են մեծ վէպերն ու վէպիկները և մշակում են դրաման: Այստեղ երկար կըլինէր, թերևս և դժւար, բացատրել բուն պատճառը մի երևոյթի, որ նկատւում է նաև ուրիշ ազգերի գրականութեան մէջ: Այսպէս թէ այնպէս՝ մեր աւագ արձակագիրները՝ Գր. Զոհրապ, Շիրւանդադէ, Շանթ, Մուրացան, Փափագեան, Արփիար, Ահարոնեան, Զարդարեան, Թլկատինցի, Զապէլ Նսայեան, Երուստան, Քիւֆէճեան, Զիֆթէ-Սարաֆ և այլն՝ քիչ բացառութեամբ արդէն պաշտօնաթող արձակագիրներ են կամ գուցէ սկսում են դադարել: Սրանցից ոմանք սայթաքել են իրենց ճամբին՝ ուղղելով դէպի հրապարակախօսութիւնն ու վարնոց ուսմանտիղմը, բայց ոմանք ունեն տաղանդաւոր երկեր և մինչև իսկ ուժեղ տաղանդներ են: Սրանց յաջորդում են մի շարք երիտասարդներ, որոնց գրական արւեստի ըմբռնումը աւելի է քան դրա գործադրումը և որոնց պակասում է հների թափը, տարերայնութիւնը, ներուժութիւնը: Հներից ոմանք նոր ճամբայ բացին դէպի գրականութեան հայրենացումը՝ դէպի ինքնուրոյնացումը նիւթով և արւեստով՝ միաժամանակ մնալով համաշխարհային: Բայց նրանց մէջ պակաս չէ եւրոպական արւեստի հիպնոզը և ընդօրինակումը: Այսպիսով մեր ներկայ վէպը դեռ մշակման փուլի մէջ է և գուշակութիւնը հակառակ է նրա յաղթանակը հաւաստելու: «Դէպի համայն մարդկութիւնը՝ հայրենիքի ճամբով»—ահա սա է նրա նշանաբանը, որ երևում է նրանց տաղանդաւոր ներկայացուցիչների գործերից:

Գալով դրամային՝ պէտք է ասել, որ Սոււնդուկեանից յետոյ



երկար լուելով՝ վերջին տասնամեակին սկսել է ծաղկել ի հաշիւ վիպագրութեան: Իբրև մի տեսակ «գործնական» արւեստի ճիւղ՝ դրաման տենդայլն արագութեամբ պահանջում է իր ստեղծագործումն ու մշակումը: Ահա թէ ինչո՞ւ մեր դրամատուրգիան մեծ ճիգ է ցոյց տալիս և արդէն սկսել է մի նոր դարագլուխ թատերական արւեստի՝ Նա աւելի կը դարգանայ և առաջ կանցնի վէպից, որովհետև մինչ՝ վերջինս պահանջում է քաղաքական և հոգեկան կատարեալ խաղաղութիւն՝ դրաման կենսունակ է նաև քաղաքական խոռվայոյզ օրերին, շնորհիւ թատրոնի:

Ինչ վերաբերում է քնաշերտութեան՝ իմ կարծիքն այն է, որ մեր աւագ բանաստեղծների և կրտսերների մէջ մի ինչ որ հոգեկան մեծ անջրպետ կայ: Հները, ինչ թւում է շատ աւելի հաւասարակշիռ ու ներդաշնակ էին հէնց իրենց սկսնակ ժամանակ, քան մեր սկսնակները հիմա: Հները աւելի հեշտ գտան իրենց աշխարհը և այդ աշխարհի ճամբան, քան նորերը, չընայած որ նրանք աւելի աննպաստ պայմանների մէջ էին իբրև սկսնակներ՝ քան մեր նոր սկսնակները: Հներն աւելի անփոխ էին ձևի, տաղաչափութեան և արւեստի այլ պահանջների մէջ, բայց շատ աւելի խորն էին, ուժեղ և անմիջական: Նորերից շատերը ընդհակառակը իրենց տւել են յանգերի, տաղաչափութեան մշակման, կոտորտութի, հնացած մոդերնիզմի, սրանք աւելի մակերեսային են, վաղանցուկ, անհայրենիք, կերտում են մտքով: Իուրեանի անկեղծութիւնն ու պարզ վսեմութիւնը չէք գտնի ոչ Սիամանթօի և ոչ Վարուժանի մէջ: Բայց այսպէս թէ այսպէս՝ ոմանք ունին մի որևէ շունչ, անշուշտ բանաստեղծի շունչ, բայց ոչ երկարողի, ոչ խորը: Նրանց դեղը հայրենիքն է:

«Արդեօք ի՞նչպէս եմ նայում հայ գրականութեան ապագային»: Ես կասկած չունեմ, որ հայ գրականութիւնը պիտի դառնայ աշխարհահռչակ մի գրականութիւն: Ես հաւատում եմ և արդէն իսկ զգում եմ մեր ցեղի այն խտացած ուժը, թագուցիալ ասելիքը, երկու աշխարհների և հին ու նոր ժամանակների համադրութիւնը, որ պիտի երևայ մեր ապագայ գրականութեան մէջ: Եւ «ներկան երաշխաւորում է նրա ապագայ առաջդիմութիւնը»՝ այս Ձեր հարցումը իբր պատասխան կը վերադարձնէի Ձեզ:

Որոնք են, իմ կարծիքով, նրա գրականները: — Այն բազմադարեան կենսական փորձը, որ ունի մեր ժողովուրդը՝ ապրելով զանազան երկրների մէջ, շփուելով այլազան ազգերի, մարդ-



կանց հետ, ապրելով ամեն տեսակ վիճակներ, կրելով ամենամեծ տառապանքը, ունենալով ամենադաժան ապրումներ և ծարաւի լինելով կեանքին և կուլտուրային: Նրա գրականութեան ապագայ առաջդիմութեանը գրաւական են այսպիսի դաժան պայմանների մէջ ծաղկող հէնց ներկայ գրականութիւնը:

Ի՞նչ կարծիք ունեմ՝ ոուսահայ եւ թիւրքահայ գեղարւեստական քարքառների մասին: Գուցէ ուզում էք ասել՝ զրական քարքառների մասին:— Թիւրքահայ գրական լեզուն բառարանով անհամեմատ հարուստ է ուսաստաններից, նա ենթակայ է աւելի վարպետ գրիչների ջանադիր մշակման, արդէն համարեա վերջնապէս մշակւած է, բայց նրա բառապաշարը մեծագոյն մասով կազմւած է հնաբանութիւններից, բառարաններից հանած պեղածոյ բառերից և խոշոր չափով ինքնահնար բառերից—նորաբանութիւններից: Այդպիսի բառապաշարի, ինչպէս նաև յաճախագէտ ֆրանսաբանութիւնների ու այլ օտարաբանութիւնների պատճառով լեզուի համաձայնութիւնը դառնում է մշակւած, բայց շինծու, սակաւարիւն: Բայց ինչ որ է՝ ինձ դուր է գալիս Զորապի կուռ, ժուժկալ, ճիշտ և հասարակ լեզուն. մասնաւորապէս հեաաքրքիր է Թլկատինցու, Քիւֆէճեանի, Երուխանի և մի քանիսների փորձերը՝ պատւաստել լեզուն ժողովրդական լեզուի հարստութեամբ: Իմ կարծիքով՝ Խրիմեան, Սրւանձտեան, Պարոնեան և վերոյիշեալները արդէն գտել են թիւրքահայ գրական լեզուի ճշմարիտ ուղին և նրանցից տարբեր ճամբայ ընկնողները շատ հեռու չը պիտի գնան:

Ինչ վերաբերւմ է ուսաստան գրական լեզւին՝ ես առ այժմ միայն Ղ. Աղայեանի լեզուն եմ ճանաչում իբրև միակը, որ հասել է որոշ զարգացման և մշակման: Թուժանեան մի բան աւելացրեց Աղայեանի լեզւին և մի բան էլ պակասացրեց: Մնացածները դեռ պիտի մշակեն իրենց լեզուն՝ եթէ արդէն դա ուշ չէ իրենց համար: Ընդհանրապէս ուսաստան հեղինակները լեզուի մշակման այնքան էլ հակամէտ չեն...

Ռուսաբանութիւնը ճարակում է ուսաստան լեզուն: Շատերը գրական ասպարէզ են գալիս կատարեալ անգէտ գրիչներով:

Բայց չընայած այս ամենին՝ ուսաստան լեզուն միւս կողմից էլ աւելի մօտ լինելով երկրին՝ այսպէս թէ այնպէս ենթակայ է կենդանի լեզուի շորշոփին և վերջապէս որոշ առաջդիմութիւն էլ



նկատուում է նրա զարգացման մէջ՝ համեմատած նախկին տասնամեակներին հետ:

«Ապագան այդ բարբառներից որի՞ն է պատկանում»:—

Այդ գիտեն կլեմանսոն, Լլոյդ Ջորջը և Վիլսոնը:

«Ցանկալի՞ է արդեօք նրանց ձուլումը, թէ մէկի կամ թէ միւսի չքայցումը»:— Ցանկալի է նրանց ձուլումը: Լաւ է, որ չէք հարցնում թէ կարելի՞ է:

«Ինչ կարծիք ունեմ ժողովրդակաւն բարբառների մասին»:—

— Ժողովրդական բարբառները նման են հողի հիւթին, որից սընուում է ծառը: Առանց նրա մշտական սնունդի չի կարող ապրել և ոչ մի գրաւեզու: Ահա այստեղից է մեր երկու գրաւեզուների ապագան զուշակելու դժարութիւնը: Մինչև հիմի մեր երկու գրաւեզուները սնուում էին իրենց ժողովրդական բարբառներով: Այժմ այդ գրաւեզուներից արեւմտեանը ենթակայ է մի մեծ վտանգի— իր սննդատու ժողովրդի կամ ցրելուն իրենից աւելի զօրեղ ուսահայ բարբառի ժողովրդի մէջ, կամ իր երկրում կազմելու մի թոյլ փոքրամասնութիւն՝ եկւորների մէջ: Այսպիսով գուցէ արեւմտեան ժողովրդական բարբառը տեղի տայ արևելեան ժողովրդականին և դադարի կենդանի շունչ տալուց իր գրաւեզւին: Կամ գուցէ արեւմտահայ ժողովուրդը գաղթավայրերից ի մի հաւաքելի երկրում (քաղաքական և տնտեսական բարեյաջող պայմանների մէջ ի հարկէ): Այն ժամանակ արեւմտեան գրաւեզուն կըշարունակէ ապրել, այլ և ծաղկել: Հնարաւոր է նաև, որ երկու ժողովուրդներն էլ միասնական կեանքում առաջ բերելով բարբառների նոր խառնուրդ՝ դիւրացնեն նաև միասնական կեանքով ապրող երկու գրականութեան գործը և ստիպեն որ սրանք ևս մերձեցնեն կամ ձուլեն իրենց լեզուն: Մի խօսքով՝ սա աւելի քաղաքական հարց է քան լեզական-գրական, ուստի և ոչինչ հաստատապէս ասել չեմ կարող: Ընդհանրապէս իմ սկզբունքն է. — Արևելահայ և Արևմտահայ հատաձևերը թողնելու են Պոլսի և Թիֆլիզի գրաւեզուների անհարազատ ճամբան և ամեն մէկը մերձենալու է իր ժողովրդական լեզւին, որ ասել է՝ այն ընդհանուր ազբիւրին, որ չընայած իր արտաքին տարբերութիւններին՝ ներքուստ միևնոյն լեզուն է, պարզապէս՝ հայոց լեզու... Վանցու և Երևանցու բարբառները միևնոյնն են իրենց համաձայնութեամբ, իրենց ոգով, մինչդեռ Պոլսի և Թիֆլիզի գրաւեզուները իրարու խորթ են իրենց ոգով և համաձայնութեամբ՝ չընայած բառապաշարի



նամանութեան: «Դէպի Երկիր» — ահա մեր նշանաբանը, սա նշանակում է դէպի հայրից լեզու:

Յարգանք՝ Դ. Գեմիրեան

1919 9 օգոստոսի. Թիֆլիզ

1. Հայ գրականութեան ներկան, ըստ իս, աննախանձելի է, թէև ունեցել ենք Սուէդուկեանի նման թատերագիր և ունենք Յովհ. Թումանեանի նման բանաստեղծ և Շիրվանդադէի նման վիպագիր:

2. Հայ գրականութեանը, իմ կարծիքով, փայլուն ապագայ է սպասում: Հայ հանճարի կատարուն ծաղկմանը և թևատարած սաւառնմանը մինչ այժմ խանգարել են անկախ կեանքի բացակայութիւնը, ազգային կենդանի օչգանկովի յօշոտումը և քաղքենի դասերի գերիշխանութիւնը մեր ժողովրդի ներքին կեանքում: Երբ ստեղծուի ազատ և միացեալ Հայաստան և հայ աշխատանքի ժողովուրդը՝ հայ աշխատանքի մտաւորականութեան ղեկավարութեամբ՝ իր ձեռքն առնի իր բախտի տնօրէնութիւնը, հայ հանճարը հնարաւորութիւն կը ստանայ վերջապէս այն թոխքները, որոնց նա ընդունակ է:

3. Արևմտահայ գրական բարբառը աւելի մշակուած է ու կուր, քան արևելահայը, բայց և աւելի արհեստական: Արևելահայ բարբառը, եթէ նոյնքան մշակուի, աւելի գեղեցիկ կը լինի ու արտայայտիկ: Արևելահայ բարբառը աւելի է մօտ թէ գրաբարին, թէ ժողովրդական լեզուին (այլաբարտեան բարբառին), քան արևմտահայը:

Ապագան ոչ մէկին էլ չի պատկանում, այլ նրանց համագործին (սինթէզին): Միացեալ հայութիւնը պիտի ունենայ և կունենայ մի գրական լեզու, և այդ լեզուն կը լինի աշխարհիս ամենաճոխ, ամենագեղեցիկ և ամենից արտայայտիկ լեզուներից մէկը:

4. Ժողովրդական բարբառները՝ գրաբարի հետ միասին՝ համարում եմ լաւագոյն աղբիւրը նոր հայերէնի համար: Ով գիտի միայն գրաբարը նա կը կաղի հայերէնում աջ ոտքով:

Տիգրան Յովհաննիսեան

Թիֆլիս

10 ապրիլի 1919 թ.



Մեր գեղեցիկ գրականութեան ներկան որակում չունի այն պատճառով, որ ցայտուն անուններ ու գործեր չկան հրապարակի վրայ: Մի երկու վիպական անուններ (Կ. Միքայէլեան, Միք. Մանուէլեան, Ստ. Զօրեան) դեռ ևս գրչի հզօրութեան չեն տիրացել և նոյնիսկ դժուար է ասել, թէ հայ միջավայրը կարող կըլինի առնութիւն մատակարարել նրանց դուրեկ վրձինին: Նոյնը կարելի է կրկնել նաև գրամայի նկատմամբ (Վ. Վալադեան): Քնարերգութեան բնագաւառում Վ. Տէրեանի մուսան ահա քանի տարի է, որ խլացրել է միւս ձայները: Մեր բոլոր մատաղ քանաստեղծները շարունակում են հարկ մատուցանել Վ. Տէրեանի քնարով յարուցած մօտիվներին, մի հոգեվիճակ, որ մենք որակել ենք «մօնութեան մղձաւանջը» անունով: Երիտասարդ քանաստեղծների մէջ երջանիկ բացառութիւն է կազմում թիւրքահայ Վէսպէրը, որը գիտէ առնական նուագներ կերտել և դա շնորհիւ նրան, որ երգչի հոգուն տիրում է ցեղի ու հայրենիքի վերածնութեան կարօտը:

Ասացինք, որ հայ գեղեցիկ գրականութեան ներկան որակում չունի: Աւելի ճիշտ կըլինի ասել, որ այժմ տիրում է գեղեցիկ գրականութեան բացակայութեան շրջանը: Սակայն մեր գրականութեան անցեալը և հին վարպետների դեռ ևս հնչող ձայնը գրաւական է, որ գրական պարապութիւնը երկար չպիտի շարունակէ: Գեղեցիկ գրականութիւնը, ինչպէս և հոգևոր մնացած կարգի երկերը պարապ և անօդ տարածութեան մէջ չեն ստեղծում: Պատերազմի, մեծ յեղափոխութեան և մեր ազգային ոգորումների հետևանքով կերտում է հայ պատմութեան նոր շրջանը, որի նկատմամբ կարելի է լուսաւոր գուշակութիւններ անել: Այդ նոր շրջանում իրար պիտի խառնելն երկու տարբեր ապրումներ—անցեալի յիշողութիւնները՝ լի թախիծով, սոսկումներով և փսոսանքով և ապագայի որոնումները, ուր մտքի վարանումը կցորդուած կըլինի խիզախութեան հետ: Այստեղ հնարաւոր է և՛ բովանդակաւ կրօնական շղարշով պարուրած և՛ ցայտուն ընկալիչներ: Մեր ապագայ տնտեսական ու քաղաքական միջավայրից շատ բան է պիտու: Կըկարողանան արդեօք եղած հայ գրիչները նոր պայմաններում ունկնդիր հանդիսանալ նոր ձայներին, նկատել նոր ներկերը և ըստ այնմ լարել իրանց եռանդը, թէ անցեալի անցուդարձերը, հին հասարակակարգի փլուզումը նրանց արդէն դարձրել է մտաւոր անկարներ—այս հարցին



դժուար է պատասխանել: Հաւանօրէն մեր արդի գրողներին շատերը կապաւինեն իրանց յիշողութիւններին: Բայց և համոզւած ենք, որ նրանց փոքրաթիւ մասը նոր կորովի ոյժերի հետ սպասաւոր կը կանգնէ նոր պահանջներին և կը սպառէ գրական բացակայութեան այս շրջանը: Մեր ազգի անսպառ և աննկուն աշխարհաշէն եռանդն է մեզ իրաւունք տալիս նման եզրակացութեան յանգելու:

Մեր ազգի քաղաքական ամբողջացումը, նրա հաւաքումը միևնոյն պետական յարկի տակ հրամայական է դարձնում ուստահայ և թիւրքահայ բարբառների ձուլման խնդիրը: Ազգը չի կարող տարբեր բարբառներ գործադրել պետական և հասարակական հաստատութիւններում և այստեղից էլ պիտի սկսուի ձուլողական աշխատանքը: Գիտակցական, կազմակերպուած վերաբերմունքը շատ բան կարող է անել այստեղ: Յիշենք, որ դպրոցին վերապահուած է խոշոր գեր: Եթէ հայկական երկու հատուածների հոգևոր ղեկավարները զլանան ձեռնամուխ լինելու բարբառների ձուլման աշխատանքին, ապա հարցի լուծումը կը մնայ տարերքին, այսինքն բնական մրցմանն ու զարգացմանը: Լեզուն կենդանի է նրա գործածողների թւով: Այս հանգամանքը պէտք է որ դիրակշռութիւն տայ նախկին ուստահայերի բարբառին: Միւս կողմից արդէն պարզ է, որ ուստահայերը պիտի կազմեն հայկական պետականութեան (իբրև ապարատի) ունաշարը: Սա էլ մի գրաւական է, որ նրանց բարբառը սուաջնութեան վիճակում պիտի լինի: Այսպիսով կան տուեալներ, որ այժմեանից նշմարելի են դարձնում ուստահայ բարբառի գերիշխանութիւնը: Պարապ հարց է, թէ ցանկալի է բարբառների ձուլումը կամ նրանց մէկի չքացումը: Ուժեղը պիտի յաղթի և մենք յաղթութիւնը գուշակում ենք յօգուտ ուստահայերի:

Հէնց որ հայ լեզուն տէր ու տիրական ունեցաւ, հէնց որ հայ պետութիւնը հոգատար կանգնեց մեր «աննիւթ գանձին», — հայ հոգևոր բարեմասնութիւններին, ապա դրանով վճիռ պիտի արձակուի նաև հայ ժողովրդական բարբառներին: Նրանցից ոչ մէկը յաւակնութիւն չի ունենալ պետական լեզու դառնալու, բայց նրանցից ամեն մէկը կը դայ բառերով և պատկերաւոր դարձուածքներով հարստացնելու մեր գրական լեզուն, նայած թէ տուեալ ժողովրդական բարբառը որպիսի տաղանդով օժտուած ներկայացուցիչ կը տայ մեր գրականութեան:



Մենք հաւատով ենք նայում մեր գրականութեան ապագային: Հոգևոր զէնքը երբէք հայը բաց չի թողել իր ձեռքից: Եւս առաւել նա այդ չի կարող անել ազգերի և վարի խաւերի ազատագրութեան պահուն, երբ խօսքին ու գրչին վերապահուած է այնքան վճռողական, այնքան վիթխարի դեր: Եթէ հայ մարդիկ հրաժարուեն քաղաքական փնթիութիւնից և պայծառ հայրենաշէն ծրագիր առաջադրեն մեր գրական ոյժերին, ապա դրանով նրանք հրահրած կըլինեն ազգի մէջ պահուած ոյժը, ստեղծելով գրական ճակատ, ուր կըլիսամբի թոյլը և յաղթական ճաճանչներ կարծակէ հզօրը:

Գ. ԱՆԱՆՈ Ն

18 հոկտ. 1919. Երևան

### ՍՏ. ԶՕՐԵԱՆԻ ԱՆԿԷՏԱՅԻՆ ՊԱՏԱՍԽԱՆ.

1. «Ի՞նչ է ձեր կարծիքը գեղեցիկ հայ գրականութեան ներկայի մասին»:

Գեղեցիկ հայ գրականութիւնը երեկւայ գրականութիւն է: Նա մեր կեանքի ներկան չէ անդրադարձել: Նա ունի անցեալ և մօտաւոր անցեալ: Պատերազմն ու յեղափոխութիւնը ստեղծեցին հասարակական պայքար, իսկ պայքարի շրջանում գեղարւեստական ստեղծագործութիւնը կանգ է առնում: Ի՞նչ վերաբերում է մեր մօտաւոր անցեալի հայ գեղարւեստական գրականութեանը, ըստ իս, նա ունի հետևեալ պատկերը: Վիպասանութիւնը տակաւին յանգած է մնում Շիրվանդադէի ստեղծագործութեան վրայ, սնւելով նրա բէալիստական տարրերով: Անկասկած, նոր վիպագրողների խումբը շատ յուսալի գրաւականներով է օժտւած, սակայն նոր ուղիներ նա տակաւին չէ հարթել: Դրաման մնում է նախկին վիճակում: Սունդուկեանի արժանաւոր յաջորդ Շիրվանդադէի գծած սահմաններից նա չէ անցել: Իսկ ոչ-բէալիստական ուղղութեամբ ներկայացւած գործերը եղակի են և պատահական: Քնարերգութիւնը հարուստ է ըստ ամենայնի, նրա ուղիները հարթւած են նորագոյն աւագ և մասամբ կրտսեր բանաստեղծների կողմից: Քնարերգութիւնը ունի բազմակողմանի բովանդակութիւն ու մօտիւններ: Նա արդէն յաղթահարել է հին տրագիկոյիաները և թևակոխել նոր շրջաններ: Հայ գրականութեան ընդհանուր բնոյթը գէմօկրատական է, օժտւած ըստ մեծի մասին քաղքենի հոգեբանութեամբ, տողորւած մանր բուրժուական գաղափարներով ու տենչերով: Նրա գեղարւեստական արժէքը անժըխ-



տելի է որպէս կենդանի անդրադարձումն մեր երեկւայ իրականութեան:

— «Ի՞նչպէս էք նայում գեղեցիկ հայ գրականութեան ապագային»:

Գրական վերոյիշեալ երեք ձևերն էլ իրանց բովանդակութեամբ ու գրական աւագ և կրտսեր մշակներով ըստինքեան գրականներ են, որով երաշխաւորում է ապագայ հայ գեղեցիկ գրականութեան առաջադիմութիւնը, պայմանով սակայն, եթէ մեր վերապրած աղէտաւոր հնգամեակին յաջորդեն աղատ և խաղաղ կեանքի տարիներ, հաստատուն ճշմարիտ դէմօկրատական կարգեր: Ըստ որում կատարւած տնտեսական և հասարակական արմատական յեղաշրջման յաղթանակը բերելու է գեղարւեստական ընդլիզմ և բեղմնաւորելու է ըստ մեծի մասին վիպագրութիւնն ու դրաման, մինչ յետաշրջման դէպքում տիրող կըդառնայ բոմանտիզմը, իսկ գրական գերակշռող ձևը կըլինի քնարերգութիւնը՝ չափական և արձակ բանաստեղծութիւնը: Առաջին դէպքում նոր գրականութեան մէջ արտացոլող տենչերի ու խոհերի առանցքը լինելու է կօլլեկտիւիզմը, իսկ երկրորդ դէպքում՝ ինքնամփոփ անհատապաշտութիւնը, որ բուրժուական գրականութեան կարմիր թելն է կազմում:

— «Ի՞նչ կարծիք ունիք ուսանայ և թիւրքահայ գեղարւեստական բարբառների ապագայի մասին»:

Այդ խնդիրը պայմանաւորւած է հայութեան քաղաքական ապագայով: Եթէ երկրագործ Հայաստանի ժողովուրդը միանայ ուսանայ հատուածին, ապա միացեալ Հայաստանում ուսանայ գրական լեզուն ամենակարճ ժամանակում կըդառնայ միակ տիրապետողը: Ապագան պատկանելու է նրան: Իսկ թիւրքահայ գրական բարբառը կըսահմանափակւի պօլսահայ և այլ եւրոպական հայ գաղութային գրականութեամբ: Այդպիսով մէկի գերակշռութիւնը դառնալու է անհրաժեշտութիւն, սակայն երկու գրական բարբառների ձուլումը՝ երբէք:

— «Ի՞նչ կարծիք ունիք ժողովրդական բարբառների մասին»:

Ինչ վերաբերում է ժողովրդական բարբառներին, դրանցից մի քանիսը հայ գրական լեզուի համար՝ ինչպէս միշտ՝ ապագայում էլ հանդիսանալու են մի-մի շտեմարաններ իրանց հարուստ ու կենդանի բառամթերքով:

Սուրխաբեան

